

# WANTOK

NIUSPEPA BILONG YUMI OL PAPUA NIUGINI STRET - 26 YIA NAU

32 pes

Namba 1,136

Wik i stat long Fonde, Epril 4, 1996

50 toea

## PAINIMAUT BILONG LIDASIP TRAIBUNEL

# Bonga kisim K20,000 bikos ol pipel i askim

*Loya Sarea Soi i tok Mista Bonga i kisim mani bikos ol pipel i askim long mekim projek*



□ Kanage em i wanpela mama pes stret. Na tu em man nogut bilong putim skin long ol meri.

Wanpela de baga i go waswas long Ela Bis long Mosbi i stap. Boi nogut rausim trausis na waswas wantaim pens tasol.

Klostu long Kanage em 4-pela mama bilong Kerema waswas i stap.

I no longtaim na Kanage singaut long ol: Hei ol maunten meri bilong Kerema! Lukaut long sinek bai kam aninit long wara. Sinek i save painim maus gras pis ya.

Trangu ol mama ron i go antap long nambis na singaut i go daun long Kanage: Papa sinek we?

Na Kanage askim 4-pela mama ya: Yupela i no save lukim sinek i save lusim ples hait na kam ausait long 6 klok apinunm, na painim rakrok long nait?

Wanpela mama i kisim pinis Tok Pisin bilong Kanage na kwiktaim em bekim: Hai mi save long sinek yu toktok long en. Em i wanpela rabis sinek stret. Nogat nus, nogat ai, nogat yau, nogat tel, liklik maus na bikpela het. Em i no save toktok tasol bikhet i pulap long het bilong em.

Bus Dokta Manki  
WEWAK

**Lukim moa TOK  
PILAI long p15 na p21.**

### YAKAM KELO i raitim

LOYA bilong Timothy Bonga i tokim kot bilong Lidasip Traibunel olsem Mista Bonga i kisim K20,000 long Praim Minista bihainim askim bilong ol pipel long Nawae ilektoret.

Loya Sarea Soi i tok Mista Bonga i kisim dispela Diskresen Fan o mani we Praim Minista i ken yusim long laik bilong em bikos ol pipel bilong em askim long mani bilong wokim projek.

"Mista Bonga i bihainim wankain rot olsem olgeta arapela memba bilong palamen i save mekim long kisim dispela mani bilong Praim Minista".

Em i tok gavman i nogat strongpela polisi i banisim dispela mani bilong Praim Minista.


Tasol ol memba i save soim ol pepa bilong wok ol i laik mekim long kisim dispela mani.

Ombudsmen Komisnin i bin painimaut olsem Mista Bonga i kisim K20,000 long dispela mani bilong Praim Minista long 1991.

Em i soim ripot olsem mani ya i bilong Asar Bisnis Grup husat i save ronim kau prosek.



□ Mista Bonga.



□ Sir Rabbie Namaliu.

Mista Bonga em olpela memba bilong Nawae Open long Morobe provins na bihain em kamap siaman bilong Lae Siti Atoriti (LCA) long Lae taim em risain long politiks long 1991 bikos long dispela wok painimaut bilong Ombudsmen Komisnin.

Siaman bilong Lidasip Traibunel, Jastis Maurice Sheehan i askim Mista Bonga sapos em i bin bihainim stretpela rot bilong kisim dispela mani.

Tasol Mista Soi i tok Praim Minista i bin oraitim pinis dispela mani long han bilong Mista Bonga we i soim olsem ol rot na ol samting i orait. Em i tok dispela em i tru.

Jast Maurice Sheehan i askim gen sapos loya bilong Mista Bonga i save long ol arapela memba bilong palamen i bihainim wankain rot olsem Mista Bonga long kisim dispela mani bilong Praim Minista.

Loya bilong Mista Bonga i tok, dispela Diskresen Fan bilong Praim Minista i nogat strong lo o polisi i banisim.

Dispela i no wankain olsem ol arapela mani olsem ilektorel Developmen Fan (EDF) we i gat strongpela lo na was i stap long en.

Mista Soi i tok tru olsem Ombudsmen Komisnin i mekim ripot long wok painimaut bilong ol.

Tasol em wantaim Mista

Bonga i laik tokaut klia long wanem samting ol i bin mekim. Dispela em, ol i laik tokaut long wanem kain rot o wanem hap em Mista Bonga i wok long skelim ol mani i go long ol wok na ol pipel bilong em.

Em i tok bikpela samting em yumi mas luksave long mani i stat long wanem hap na i go long wanem hap na husat i kisim.

Long dispela rot, ol i laik tokaut long kot.

Loya bilong Bonga i putim aut nem bilong ol sampela nupela witnes gen long dispela toktok bilong ol. Dispela em ol manmeri husat i wok long opis bilong Fainens dipatmen na opis bilong Praim Minista.

Sir Rabbie Namaliu i bin Praim Minista long taim Mista Bonga i bin stap long palamen.


Ombudsmen Komisnin i laik sasim Mista Bonga long 16 sas olgeta tasol em i tok nogat long olgeta 16 sas.

Lidasip Traibunel bai sindaun long 29 Epril long dispela mun long na tokaut long ol disisen bilong em bihain long em i skelim olgeta toktok na ripot bilong Mista Bonga i kam.



**Mandawali  
katim  
nupela  
kaset.  
Lukim  
stori long  
pes 18.**

**NEKS WIK: 8-Pes Ragbi Lig Nius insait long WANTOK**



# TOYOTA LAND CRUISER

**SAPOS ROT IBAGARAP NA YU  
PAINIM HAT LONG IGO...  
GO WANTAIM 4WD  
LAND CRUISER!**

**LUKIM MIPELA NAU LONG ELA MOTORS  
ISTAP OLGETA HAP LONG PAPUA NIUGINI!**

**Ela Motors**  
PVT (PANG) LTD.

EM5354



**PLIS  
RIPOT**



**Simbu:** Wanpela pasindia long ka i bin dai na ol katim nus bilong draiva long wanpela birua we i bin kamap long Simbu provins las Fraide. Provinsal plis komanda Aloysius Eviaisa i tok dispela ka we daiman i bin stap long en i bin wok long go olsem long Kundiawa taim ol sampela raskel lain i bin sut long en.

Mista Eviaisa i bin tok sem katres we i bin kisim nus bilong draiva i bin kilim dai man i bin sindaun long sia bilong pasindia. Plis i bin autim niem bilong daiman olsem Goyia Maragu bilong Simbu provins yet. Long narapela birua, wanpela yangpela man i bin ron long ka wantaim Simbu etnimitreta Joe Bal na em i pondaun nating na dai. Nem bilong man ya em long Diau martin bilong Simbu yet.

Long wankain taim tu, wanpela Katolik pris i bin dai bihain long wanpela birua long rot long dispela wik Trinde, Mist Eviaisa i bin tok. Nem bilong pris ya em Pater Peter Kuman. Em i bin dai bihain long ka we em bin draivim i pam wantaim narapela truk insait long Isten Hailens provins.

**Finsafen, Morobe provins:** Ol i holim pasim na sasim wanpela meri komyuniti tisa long Finsafen distrik insait long Morobe provins bihain long dai bilong wanpela yangpela manki las Fraide.

Ekting provinsal plis komanda, Simon Yipam i tok plis i holim pasim na sasim Martha Laviong wantaim 30 krismas na em i wanpela komyuniti skul tisa long Amarong komyuniti skul insait long Pindiu eria bilong Finsafen distrik, Morobe provins. Ol i sasim em long kilim dai wantaim naip Iba Ruanong. Mist Yipam i bin tok Ruanong i bin laik stapim Laviong husat i wok long pait wantaim man bilong em husat i wanpela sku tisa tu taim meri ya i bin sutim em long bros na kilim em i dai.

**Kamkumung, Morobe provins.** Long dispela wik Trinde long Lae, wanpela 25 sita bas we i bin karim ol pikinini i go long wanpela sios sevis long Lae i bin krugutim wanpela meri Simbu na em i dai. Bas ya i wok long karim ol pikinini i go long wanpela sios sevis na em bin krugutim meri ya klostu long Kamkumung maket long Trinde.

Ol lain husat i bin lukim samting i kamap i tok meri Simbu ya i bin dai kwitaim bihain long bas i krugutim em tasol. Ol plis i bin tok bihain long draiva i kamapim dispela birua, em yet i bin go long plis stesen long putim ripot long en.

**Mosbi, NCD:** Plis long Mosbi siti i wok long mekim wok painimaut nau long tripela trabol long bagarapim meri we i bin kamap long las Sarere. Asisten komisina, Philip Taku i tok namba wan trabol i bin kamap long Erima we eitpela man i go insait long wanpela haus na bung long bagarapim wanpela meri.

Long Siks Mail, siksipela man i bin go insait long Erima hostel na bagarapim wanpela meri long hap. Namba tri trabol i bin kamap long Badili we 11- pela man i bin bungim tupela meri taim ol i wokabout wantaim ol boipren bilong ol. Ol man nogut i bin rausim tupela boipren bilong ol na bagarapim wanpela long ol meri taim narapela i bin ranawe.

# Lo bilong kilim man i abrusim Ombusu

**SUPRIM** Kot i rausim pinis sas bilong kilim man indai long dispela wik. Suprim Kot i rausim dispela sas long Charles Bougapa Ombusu bihain long em i apil egensim disisen bilong nesanel kot long kilim em indai.

Charles Ombusu bilong ples Kurou long Oro provins na i gat 21 krismas nau i bin holim na bagarapim yangpela meri long gaden long 9 Julai 1993. Meri ya i go tokim papa bilong em na em i kisim sotgan na i go painim Ombusu. Tasol Ombusu tu i gat sotgan na em kirap kilim indai papa bilong meri ya.

Nesanel Kot jas, Jastis Tracey Doherty i bin sasim Charles Ombusu long las ya Fraide 17 Februari, 1995 long em i mas kisim 5-pela krismas long holim na bagarapim meri na em i mas indai long sas bilong kilim man.

Sief Jastis, Sir Arnold Amet i tokaut long Tunde olsem Suprim Kot i rausim dispela

## YAKAM KELO i raitim

sas bilong 5-pela krismas na sas bilong indai we kot i putim antap long Ombusu. Charles Ombusu i no gat sas nau tasol em bai i stap long kalabus na wetim loya bilong em (Pablik Solisita) na loya bilong gavman (Pablik Prosekyuta) long bung gen. Tupela bai bung gen long 17 Epril na glasim dispela hevi bilong Charles Ombusu long ol bai holim gen long nesanel kot o nogat.

Dispela i min olsem dispela kot bai kamap olsem nupela kot gen long nesanel kot. Olsem na sapos tupela loya i skelim olsem i no gat arapela poin moa long tok pait long en, bai tupela i bihainim tasol disisen bilong Suprim Kot long larim Charles Bougapa Ombusu i go fri.

Sief Jastis, Sir Arnold Amet i tokaut olsem ol i bin brukim toktok ya i go tupela bikos long apli bilong Ombusu. Ol i lukluk long sas bilong holim na

bagarapim meri. Na bihain ol i lukluk long sas bilong kilim man indai.

Taim ol i skelim gen long lo, i no gat rot long ol bai joinim tupela sas wantaim na mekim kot long en. Ol han bilong lo i oraitim tasol long ol i mas harim tupela sas ya long narapela narapela taim.

Sir Arnold Amet i tok bikpela luksave bilong lo em olsem man i mas kisim sas long wan wan asua bilong em. Long dispela, em i gat tupela asua we kot i mas harim wanpela pastaim na mekim sas bilong em na bihain em i ken harim narapela na givim sas o mekim-save long man ya. Dispela i min tu olsem loya husat i kot egensim Ombusu i mas tokaut long wanpela kot em i laik kamapim pastaim.

Kot bilong Charles Ombusu long las ya em kot i no bin brukim i go tupela olsem nau Suprim Kot i toktok long en. Kot bilong las ya bin harim o joinim tupela asua wantaim olsem wanpela kot tasol na

kamapim dispela disisen bilong kilim em.

Long dispela as, Sief Jastis i tok ol i skelim olsem join kot bilong holim meri na bagarapim na kilim man indai i no stret na inap bagarapim jastis o disisen bilong kot. Em i tok ol i skelim olsem pasin bilong kilim man indai i bikpela hevi tumas na kot bilong em i bikpela tru. Olsem na arapela kot i no ken join wantaim dispela hevi bilong kilim man indai.

Kot bai kamap long tupela wik bihain insait long nesanel kot long lukluk gen na skelim sapos ol i ken brukim kot ya i go tupela hap na kamapim nupela kot gen.

Long dispela taim nau, sas bilong Charles Ombusu i mas dai long han bilong lo long kilim narapela man indai na 5-pela krismas sas bilong em long bagarapim meri em Suprim Kot i rausim pinis. Em i nogat sas nau.

## Ol memba yet siaman long palamentri komiti grup


**PALAMEN** yet i save bosim wok bilong em na i no gat ausait lain i save go pas long en. Bikos em i save makim ol memba yet olsem ol komiti bilong wanwan palamentri komiti grup.

Memba bilong Wewak, Bernard Narokobi i tokaut long las wik Fraide olsem bipo, gavman i gat dispela grup husat i save go pas long stretim potnait pe bilong ol memba. Na tu i arapela grup bilong stretim ol hevi bilong ol memba long palamen. Dispela grup tasol i save wokim pe bilong ol memba. Ol i kolim Salaris and Numeresen Komiti. Tasol nau, palamen i senisim na kamapim Pablik Akauns Komiti we ol memba bilong palamen yet i stap siaman long en.

Mista Narokobi i tok nau em gavman yet i holim olgeta wok insait long palamen yet na ol memba i stap olsem siaman long ol. Dispela i soim olsem wanem hevi o toktok i kamap long ol memba na wok bilong ol, palamen yet i stretim insait na pinisim long ol yet.

Mista Narokobi i tok bikpela hevi long dispela kain pasin em, sampela memba i save kisim bikpela mani na sampela i save kisim liklik. Na dispela i ken bagarapim gutpela tingting na wok bilong lida long lukautim pipel na sevim kantri.

Em i tok olgeta man i save kisim gutpela pe na ol i save wok gut. Em i makim long



• Bernard Narokobi

em yet olsem long bipo taim em i bin stap olsem ministra, em i save kisim olsem K3,000 long wanpela potnait. Tasol nau gavman i pusim em i go stap sait long oposisen, em i save kisim olsem K300 o K400 long potnait. Em i tok ol lida, ol jas bilong kot na ol bikman husat i go pas long opis bilong gavman i mas kisim gutpela pe long mekim gut wok bilong ol. Memba bilong Wewak i tok tu olsem nau gavman i gat dis-

pela pasin bilong makim ol palamentri komiti bilong lukautim wanwan eria bilong gavman bisnis insait long palamen. "Dispela em inap long Spika bilong palamen i ken mekim long makim ol komiti".

Dispela pasin we gavman yet i makim ol komiti inap kamapim pasin we gavman bai makim ol memba yet husat i stap long pati bilong dispela lida. Na dispela inap sevim interes bilong gavman bilong dispela taim bikos memba yet i stap long siaman bilong komiti. Ol dispela toktok i bin kamap long las wik taim bikpela kibung i bin kamap long toktok long 20 Yia bilong Mama Lo insait long Papua Niugini.

Dispela bung i bin bungim planti ol bikman bilong gavman, ol loya, ol saveman bilong lo, ol bos bilong bikpela kampani insait long Papua Niugini na tu ol politiks lida tu.

Tripela lida husat i bin namba wan lain bilong kamapim Independens long kantri na tu ol i bin sanapim dispela mama lo bilong kantri; Sir Michael Somare, Bernard Narokobi na John Momis i bin kamap tu. Ol i bin traim long mekim kliia sampela tingting na askim we ol manmeri i askim long lo bilong kantri long 1972 i kam inap nau. Na tu ol i tokaut tu long ol kain kain rot ol i bin bihainim na mekim long kamapim ol dispela lo bilong kantri long taim bilong Independens i kam.

## Pelika skelim mani bilong Menyamya pipel

**MEMBA** bilong Menyamya, Thomas Pelika i skelim K550,000 bilong Ruel Eksen Program (RAP) i go long sosel sevis insait long ilektoret bilong em. Menyamya em insait tu long Morobe provins.

Mista Pelika i tokaut long las wik long bung bilong Join Distrik Plening Baset Praioriti Komiti olsem K170,440 bilong RAP mani bai i go long wok bilong sosel eria.

Bikpela tru em K54,720 bai i go long baim hap skul fi bilong ol studen long Menyamya hai skul. Menyamya hai skul em wanpela nupela hai skul tu long kantri. Mista Pelika i tok ol lain bilong em long Menyamya na Aseki i save painim hat long baim skul fi bilong ol pikinini.

Olsem na skul bilong mipela i bihain tru long ol arapela provins na mipela i no gat inap saveman bilong mekim wok na developim eria bilong mipela. Mista Pelika i tok. Mista Pelika bai baim wanwan lon mova bilong katim gras na givim i go long 23 komyuniti skul insait long ilektoret bilong em. Dispela bai kos olsem K11,500.

Haus sik long Menyamya baim kisim wanpela nupela ambulens kos bilong em istap long K40,000. Menyamya na Aseki Soka Asosiesen bai kisim K19,500, ol sios na yut grup bai kisim K19,500, grup bilong ol mama K10,000 na wok bilong karimaut lo na oda bai kisim K14,720. Mista Pelika i makim K40,000 bilong baim jenereta bilong Aseki, K14,000 bilong

televisen dis bilong pulim ol televisen i go long Menyamya na K11,000 bilong Menyamya wara saplai projek.

Eria bilong ekonomik sevis tu i kisim K22,560 bilong nupela ka bilong Agrikals na Laivstok divisen, K10,000 bai i go long ples bilong skelim pis, K10,000 bai i go long masin bilong wokim hani na K1,000 bilong wokim ples bilong binatang i kam na putim kiau bilong wokim hani. Long skelim dispela olgeta RAP mani memba bilong Menyamya, Thomas Pelika i brukim:

Edministresen K64,000, nupela rot K114,000, rot mentenens o stretim ol rot K52,000, ekonomik sekta o wok bisnis K43,560, sosel sevis K170,440 na pablik yutilitis olsem jenereta K65,000.

Insait long dispela bung bilong Join Distrik Plening na Baset Praioriti Komiti, ol i tokaut olsem bai Morobe Provinsal Interum Gavman i no inap lukautim moa Anga Developmen Kopresen. Ol bai rausim Anga Developmen Kopresen na dispela Join Distrik Plening komiti bai kisim ples bilong Anga. Dispela em nupela senis we i kamap bikos long senis bilong Provinsal Gavman rifom we i kamap na rausim olpela Provinsal Gavman sistem.

Anga Developmen Kopresen em bisnis han bilong Morobe Provinsal Gavman long bipo long kirapim na bringim sampela gutpela developmen na sevis i go long ol pipel bilong Menyamya na Aseki eria.

**WANTOK**

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea

Published Weekly, Thursday, for

**Word Publishing Company Pty. Ltd.**

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty Ltd.

Acting General Manager and Group Editor in Chief: Anna Solomon

Advertising Manager: James DeLisle

Editor of Wantok: Leo Wafiwa

Advertising Deadlines:  
Display Bookings and Camera ready copy: Tuesday midday.  
Classified Advertising: Wednesday 2pm.

Papers distributed by air throughout PNG.

Available by airmail subscription within Papua New Guinea and overseas.

Australia and New Zealand Representatives: Tonkin Media Pty. Ltd. P.O. Box 101, Avoca Beach, NSW, 2251 Australia  
Sydney, James Tonkin, (043) 851746, Melbourne, Glen Smith, (03) 8072311

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.



# Palamen pasim planti lo tumas "25 nupela lo wanwan yia"

NUPELA rifom lo long Provinsal na Lokel level Gavman i makim 20 gavana long ol provins. Tasol ol em eksekutiv han bilong palamen long karimaut wok kabinet i kamapim. Loya na tisa bilong lo, Tony Regan i tokaut long dispela long las wik Fraide.

Mista Regan i tok nem gavana i min olsem 20 gavana bilong wanwan provins i gavman o bos nau long provins bilong ol. Na wok lo i makim long ol i mas karimaut bai i no gat nau. Bikos wok bilong ol em wanpela han bilong mama lo olsem eksekutiv bodi bilong palamen. Tasol nau ol em gavana bilong provins na i no moa eksekutiv bilong palamen.

Papua Niugini i wok long kamapim planti nupela lo we i soim olsem 25 nupela lo i wok long kamap long wanwan yia, Mista Regan i tok.

Mista Regan i tok nau gavman bilong PNG i wok long kamapim planti nupela lo klostu klostu na i no givim inap taim long ol lo long wok gut pastaim.

Em i tok long 1975, gavman bilong PNG i pasim 70 lo na dispela lo i wok i kam inap dispela taim nau we planti nupela lo na senis long lo i wok long kamap. Dispela i makim olsem 25 nupela lo i wok long kamap long wanwan yia long dispela nupela taim i kam nau.

Tasol wanpela bikpela hevi we palamen i no strongim long wok bilong lo i wok o nogat em; Lejislesa (han bilong karimaut lo) i no save sekim wok bilong pala-

## YAKAM KELO i raitim

men. Lejislesa em ol memba bilong palamen tu i stap long en wokim ol lo. Tasol ol i no save go bek na sekim wok bilong palamen na lukim olsem ol lida na ron bilong palamen o kabinet i go orait o nogat, Mista Regan i tok.

Em i tok Lejislesa i gat pawa long strongim na karimaut lo na mekim i kamap olsem mama lo bilong dispela kantri. Na wok bilong em i traim long mekim gavman i kamap olsem tru lida bilong pipel tu.

Em i tok bikos Lejislesa i no save sekim wok na ron bilong palamen na kabinet, palamen i go het long pasim planti nupela kain lo we i nogat inap taim na wok painimaut i kamap pastaim long ol. Em i sutim tok long Suprim Kot long mekim disisen long sapotim wok bilong gavman long kamapim nupela lo bilong Provinsal Gavman Rifom. Dispela em long taim olpela primia bilong Westen provins, Isidore Kaseng i kamapim kot egensim dispela rifom long kot long dispela yia.

Mista Regan i tok dispela lo i mas raun long olgeta memba i luk-save insait long 28 de pastaim. Orait bihain ol i ken pasim na mekim i kamap lo. Long dispela as nau, husat bai was na lukautim pawa bilong mama lo bilong kantri?, Mista Regan i askim. Wok bilong Suprim kot em long lukautim na strongim pawa bilong mama lo long i mas wok. Em i

askim tu watpo na palamen i pasim ol nupela lo na i no sekim Lejislesa na olpela lo gut?.

Bikos nau bai i gat 20 Gavana long wanwan provins na ol bai kamap Gavana na i no eksekutiv.

Dispela em sampela samting we palamen i hariap long pasim nupela lo long rifom sistem na i no luksave long pawa na wok tru bilong dispela Provinsal na Lokel level Gavman rifom. Mista Regan em wanpela biknem loya tasol nau em i save skulim ol studen long yunivesiti long Lo. Em i askim gavman long traim go bek gen na luk-luk insait long wok bilong Lejislesan na bilong gavman na traim skelim hevi i stap long wanem hap tru.

Em i tok long rekot em i gat, ol memba bilong palamen long bipo, 1972, ol i save tromoi planti askim tru long floa bilong palamen. Ol memba i save resis long tromoi askim long ol hevi na samting ol i gat long en. Tasol inap nau, ol memba i no moa askim planti askim olsem bipo.

Dispela i min olsem sapos gavman o kabinet i kisim planti askim long ol memba, em bai traim long mekim ol wok bilong em long stretim hevi na askim bilong memba. Tasol sapos no gat planti askim long taim palamen i kibung, bai gavman i go slip bikos i nogat planti samting long mekim. Na dispela i ken mekim ol i lusim tingting long ol liklik wok bilong lo na taim ol i kamapim nupela lo, ol bai abusim sampela han wok bilong bihainim long pasim lo, em i tok.

# Ol Esia nogat bisnis join vensa - Miriye

POLISI bilong gavman long luk-luk i go long Not (Luk Not Polisi) i no soim wanpela gutpela bisnis wok wantaim long ol bisnis bilong Papua Niugini.

Siaman bilong Melanesian Samba ov Komes na Industri, Gabriel Miriye i tok gavman i westim bikpela taim tru long raun na toktok wantaim ol Melanesia kantri long pulim moa bisnis i kam long PNG. Tasol ol bisnis manmeri bilong PNG i no save join wantaim ol long mekim wok bisnis. Ol Melanesian yet wantaim ol politikis pren bilong ol long hia i save mekim bisnis bilong ol yet.

Mista Miriye i tok ol Melanesian em ol giaman lain bilong paulim ol manmeri. Ol i no kristen olsem mipela long Papua Niugini. Lotu bilong ol em Budis na Muslim na ol bai kamapim hevi tu long kristen lotu long mipela sapos ol i kam planti long PNG.

"Gavman i wok long go het long kisim ol Melanesian i kam

tasol ol no kristen olsem mipela. Ol bai bagarapim lotu bilong mipela na paulim planti samting mipela i gat long PNG", em i tok.

Mista Miriye i tok Luk Not Polisi i gutpela tasol ol i no kam mekim bisnis o wok bung wantaim ol bisnis lain long PNG. Ol i sanap bilong ol yet na yusim ol risos bilong mipela na amamasim tasol ol politikis lain bilong PNG.

Long dispela kain pasin, bai ol mani lain bai i gat moa mani yet na ol lus lain bai lus moa yet long mani. Bikos wok bisnis i stap wansait tasol. Mista Miriye i tok.

Em i tok PNG i mas sanap olsem independens kantri insait long Melesia na i no ken paulim tingting na pasin bilong em i go long hap bilong Esia. Bikos taim moa Esia i kam long PNG, bai ol i ken kamapim hevi long senisim ol pasin bilong mipela.

Em i tok kain pasin bilong ol Melesia i no wankain olsem pasin bilong mipela. Na dispela i no pasin mipela pipel bilong PNG

i laikim bikos ol i gat pasin bilong pulim ol samting bilong narapela man na yusim, em i tok.

Siaman bilong Melanesian Samba ov Komes na Industri i tok tu olsem sapos ol Melesia i ting ol i bikpela bisnismen, olsem wanem na ol i no inap winim 100 bisnis manmeri bilong PNG. I luk olsem ol bisnismen bilong Melesia i wok long kam tasol long ol politikis man bilong Papua Niugini, em i tok.

Em i tok sapos wanpela liklik bisnismen i winim nesanel ileksen long 1997, bai bikpela senis tru i kamap. Bikos dispela em ol liklik bisnismen bilong PNG yet husat i wok hat tru i kam na i nogat save long wanem kain bisnis poroman wantaim ol Melesia na arapela Esia kantri tu.

"1997 em yia bilong senis bikos ol lida bilong tude i wok long yesa tasol na oraitim ol bisnis long Esia kantri long kam long kantri bilong PNG", em i tok.

# Gavman i mas karim hevi long ol bagarap

GAVMAN i mas karim hevi blong ol bagarap i kamap long bus, graun, solwara na ol samting i stap long ol. Olpela mausmeri bilong Papua Niugini long Amerika, Meg Taylor i tokaut. Misis Taylor i tok gavman i mas was na lukautim ol samting long graun, solwara na bus bilong PNG. Bikos PNG em namba wan kantri insait long wol long i gat Envaromen Lo we ol papa bilong dispela kantri i kamapim long 1972.

Dispela em lo we i tokaut long olgeta samting i stap long bus, solwara na graun i stap long lukaut bilong ol pipel yet long ples. "Ol dispela samting em ol pipel bilong ples i papa long en bikos ol i save kisim helpim na sapot long ol. Ol i save i gat bilip long ol samting i stap long bus olsem spirit, pawa bilong kisim long mekim gaden, kaikai, painim abus na ol planti samting moa. Ol i gat ol diwai na lip we ol i save yusim long marasin na planti arapela samting we i sevim laip bilong ol long ples".

Misis Taylor i tok ol pipel i save stap poroman o klostu wantaim ol bus, solwara na graun bilong ol. Na dispela em wanpela samting lo bilong kantri i bin luksave na i laik lukautim na strongim.

Bikmeri ya i tok sapos wanpela bagarap i kamap long bus, graun na solwara bilong ol pipel, bai ol pipel i kisim taim long hangre na ol bai sot tru long planti samting long laip na sindaun bilong ol. Bikos ol bai lusim olgeta kaikai o sapot bilong ol long kisim sapot. Em i makim piksa long ol kantri olsem Afrika we i nogat kaikai bikos i nogat gutpela bus olsem mipela i gat long wokim gaden.

Em i tok Konstitusenenel Plening Komiti (CPC) long 1972 i bin mekim

gutpela wok long kamapim lo we i luksave na banisim bus, graun, solwara na ol samting i stap long en. Na CPC i wok long mekim gutpela wok tu long skulim ol manmeri long lukautim gut ol dispela samting bilong ol.

Meg Taylor i mekim dispela toktok long las wik insait long 20 Yia bilong lo long Papua Niugini. Misis Taylor i tok nau planti nupela lo i wok long kamap we ol i sut long ol wok na samting we i stap long graun, solwara na bus bilong mipela. Na ol dispela senis i wok long kamap wankain olsem planti kantri long wol. Ol i kamapim lo bilong bus, graun na solwara olsem ol wanwan han lo tasol olgeta i sut long bikpela nem Envaromen Konstitusenenel.

Em i tok taim ol i bin lukluk long ol dispela lo, em i amamas long lukim Manus provins i skelim gut ol dispela lo bilong em na kamapim polisi bilong strongim wok bilong Edukesen long provins bilong em.

Misis Taylor i tok wok bilong Envaromen Plening Ekt i mas sanapim balens o skel blong mekim plen long ol samting i stap long bus, graun na wara na tu win yumi save pulim long kisim laip. Dispela em bikpela samting Provinsal na Nesanel Gavman i mas skelim na sanap strong long en long mekim gutpela lo we i banisim ol dispela samting bilong ol pipel.


Olsem na em i tok sapos wanem bagarap i kamap long ol dispela samting na ol pipel i painim ples bilong mekim gaden, ol i no pulim gut win bikos win i doti, wara i doti na arapela moa bagarap i kamap, gavman i mas karim dispela hevi. Bikos em yet i mekim lo we i no sevim o lukautim ol pipel na ol samting em i gat long bus, graun na solwara bilong em.

## 4. RAIT BILONG OL PIKININI

Wanem disisen o tokorait yumi mekim, tingting long welfea, o gutpela sindaun bilong pikinini i mas stap namba wan long tingting bilong mipela. Konvensen long Raits bilong ol Pikinini i tok gavr an i mas helpim ol famili long lukautim pikinini, sapos ol yet i nogat strong long lukautim. Yu save tingting long welfea bilong ol pikinini tu?

Atikel 3 Konvensen long ol rait bilong ol pikinini.

LUKIM MOA RIPOT LONG NEKS WIK





# WANTOK

NIUSPEPA BILONG OL PAPIA NIUGINI STRET

## Tingim Jisas na amamasim Ista

Ista em i wanpela taim bilong amamas insait long kantri bilong yumi. Dispela i bikos yumi em wanpela kristen kantri.

Ista em i taim we Jisas i bin dai long diwai cross bilong sevim yumi long sin bilong yumi.

Yumi mas tingim gut dispela na yumi mas soim respek long Ista.

Tude ol manmeri i save mekim go kam nabaut na nau yumi wok long lusim dispela tingting bilong pasin bilong Ista.

planti ol manmeri na famili na ol manmeri bai i mekim ol kainkain amamas bilong ol yet long makim dai bilong Jisas na tu long kirap bilong en ken.

Tasol insait long ol dispela amamas yumi mekim long makim Ista, yumi mas noken lus tingting long givim prais long God.

Dispela i bikos em i bin salim pikinini bilong em long kam bilong sevim yumi taim em i bin dai long cross. Na taim em i bin kirap ken em i winim yumi olgeta long bai yumi free long sin.

Long dispela Ista wiken yumi mas tingim dispela na soim respek. Yumi mas tingim tu olsem insait long wol planti ol pilot bilong flaim balus na tu planti ol astranot i bin flai i go long mun, na nau ol i stat mekim wok bilong go long Mars.

Tasol yumi mas tingim ol dispela pilot na astranot i wok long flai antap yet tasol Jisas husat i bin dai na taim em i hangamap long cross, em i bin flai antap tumas bilong sevim yumi. Nogat man or meri bai winim Jisas.

Long dispela Ista yumi mas tingting na stap isi na amamasim gut dispela taim

Hepi Ista long yupela olgeta



*Yangpela Saure na Rawo greduet...* • Damien Horiambe bilong ples Saure long Wewak, Is Sepik, na Maryland Dise bilong ples Rawo, Sandaun provins i sanap wantaim famili bilong tupela bipo long tupela i greduet long Yunivesiti ov Papua Niugini long Waigani, Mosbi long stat bilong dispela yia. Mista Horiambe i greduet long Ats na Ms Dise i greduet long Indastrel Saikoloji. Foto: Ivan Bayagau.

# WANTOK

NIUSPEPA BILONG OL PAPIA NIUGINI STRET

P.O. Box 1982 BOROKO  
telepon Namba: 25 2500  
Feks Namba: 25 2579

**PE BILONG  
WANPELA YIA  
52 NIUSPEPA**

PLES	AIR
Mosbi	K30.00
Arapela PNG eria	K60.00
Australia na NuSilan	K92.00
Esia pasifik na Japan	K123.00
Amerika na Yurop	K180.00

## Operesen bilong sekuriti fos ino senis bihain long gavman rausim "ceasefire"

INOGAT bikpela senis i kamap long operesen bilong ol sekyutiti fos long Not Solomons provins bihain long nesenel gavman i rausim "ceasefire" o pasin bilong stop pait long Bogenvil long tupela wik i go pinis. Ol ripot i kam long Buka i tok stap long distrik i kwait na ol wok bilong gavman, ol praiwet bisnis na pablik i go het tasol olsem long pastaim bipo long ol BRA paitman i bin go na kamapim ol bagarap long kilim dai ol ami na plis long Not Bogenvil tupela wik i go pinis.

Wanpela samting tasol we i kamap na pablik i lukim long Buka em nau, ol ami, plis na resistens grup i raun fri na mekim ol wok bilong ol. Tu, ol ami i sanap gen long ol sekpoim nau. Pastaim ol i bin pinis long mekim dispela wok bikos ol no bin gat inap mani long go hetim dispela wok.

Antap long ol nomol duti bilong ol, ol ami na ol lain resistensi wok long kwestenim ol man we ol i saspektim ol long helpim ol BRA paitman long taim ol bin stap long not

### VERONICA HATUTASI i raitim

Bogenvil eria. Dispela i karamapim sampela ol siefs bilong Selau eria na ol arapela yangpela pipel long Malasang, Solos na Selau eria. Ripot long Buka i tok ol bekim we planti long ol dispela sief na pipel i mekim em ol ino sapotim wok bilong ol BRA tasol wanem samting ol i wokim i bin wantaim pret bikos ol BRA i holim gan na ol i pret long laip na sindaun bilong ol. Long hap bilong Buin, i gat ripot olsem ol ami nau i strik long sekyuriti insait long ol kea senta wantaim ol man husat ol i saspektim ol long helpim ol BRA.

Tasol komanda bilong Difens Fos, Brigidia Jenerel Gerry Singirok long las wik i bin tokim ol pipel long Buka olsem rausim sispai ino min olsem ol i strongim pait wantaim ol BRA ami long go het strong. Nogat. Em ino lukim pasin bilong pait olsem rot bilong pinisim ol trabel long provins na olsem em i

bin strongim ol wok long painim gutpela sindaun (peace process) long go het strong yet.

Ripot i tok tu olsem long Buka nau, sampela opisa bilong Not Solomons etministresen i bungim hevi long go hetim wok bilong ol bikos ol ami na ol lain reseisten i kisim ka bilong ol na yusim long wok bilong ol. Dispela em bikos ol ami ino bin sot long ka taim hevi long Buka i kamap tupela wik i go pinis tasol long wankain taim gen, sampela ol gavman opisa i wok long kisim taim tru long mekim wok bilong ol long dispela taim.

Planti pipel long Buka distrik i sapotim strong disisen we nesenel gavman i mekim long rausim "ceasefire" long Bogenvil, ripot long Buka i tok. sampela i pret long givimaut tingting bilong ol long dispela samting tasol Brigidia Singirok i bin asurim ol pipel insait long ol miting we ol bin holim namel long ol ami, ol siefs na ol arapela lida long Buka olsem ol ami bai inoken bagarapim naring ol man bihain long gavman i rausim sispai.



## Ol Koiari na Koitabu bai stopim hausing prosek

### KENNEDY EDENE i raitim

WANPELA BIKPELA hausing prosek insait long Sentrel Provins bai i no nap go het sapos ol lain husat i wok long toktok long mekim dispela i no bungim tupela moa grup bilong ol papa graun. Ol narapela tupela papa graun grup o klen em ol Gorohaga Koiari na Koitabu husat tu i mas toktok long dispela samting i paul yet long husat tru i papa bilong graun long dispela prosek em ol bai mekim i no save long wanpela samting yet nau.

"Mipela ol Gomfanabeika Len Asosiesen husat i makim ol Koiari i no save yet long wanpela samting long dispela bikpela mani prosek we ol bai mekim long Bantama sait long Maghi Haiwe na wanem taim tru bai kamap," Siaman Uriu Inara i tok.

"Sapos dispela i tru, Asosiesen nau i singaut long dispela ol lain husat i wok long toktok wantaim ol Gorohaga klen bilong Tubuseria na delopla long noken westim taim bilong ol long wanpela sait tasol," em i tok. Ol Koiari na ol Koitabu i tok olsem dispela graun em tubuna bilong ol wantaim i papa na

i save stap namel long ol yet. Tupela klen i tok olsem tupela wantaim i mas kisim sampela kain samting long dispela graun na i no bilong ol Tubuseria tasol. Ol lain long Koitabu na ol Koiari i singaut long ol Tubuseria long kam na ol bai toktok wantaim long dispela samting. Ol i tok tu olsem ol i les long stopim dispela prosek tasol ol i laik prosek ya i mas go het taim olgeta samting i redi. Dispela samting nau i stap long ol Tubuseria i mas lukluk na singautim ol Koiari na Koitabu long kamap na mekim toktok.

"Ol i noken kisim dispela benefit long ol yet long wanem dispela em graun bilong ol tumbuna bilong mipela husat i save painim abus olsem na ol i mas wok bung wantaim mipela," em i tok.

Inara i tok moa olsem sapos ol Tubuseria i les long sindaun wantaim ol Koiari na Koitabu na stretim toktok, ol bai kisim wanpela kot oda long stopim dispela prosek.



# Wewak polis sasim tupela polisman

POLIS long Wewak, Is Sepik provins, i sasim pinis tupela arapela polisman, wanpela long sas bilong traim long repim meri na arapela long sas bilong yusim krangi mani.

Bihainim dispela tupela sas bilong tupela polisman ya, Provinsal Polis Komanda, Sief Inspekta Raphael Huafole i givim tok lukaut olsem ol polisman husat i mekim raskol pasin bai kisim mekimsave aninit long lo.

Dispela long wanem, Sief Inspekta Huafole i tok, wok bilong ol polisman em long lukautim lo na mekim lo i wok. Na i no long

brukim lo we ol i sapos long karim aut wok aninit long en.

Long sait bilong sas bilong traim long repim meri i bin kamap long mun Janueri long dispela yia.

Long mun Janueri long dispela yia, wanpela skul meri bilong Passam Nesenel Haiskul i bin kisim balus na i go pundaun long Boram ples balus long Wewak long nait. Taim skul meri ya i go kamap long Boram ples balus, em i luksave olsem i nogat sampela lain i go wet long ples balus long kisim em.

Em nau skul meri ya i lukim tupela polisman. Wanpela bilong

dispela tupela polisman, skul meri ya i save long em.

Bikos em i save long wanpela bilong tupela polisman ya, em i go na askim tupela long helpim em.

Sief Inspekta Huafole i tok tupela polisman ya i kisim dispela skul meri na kisim em i go long Sambri kem klostu tasol long Wewak Polis Stesin. Ol i go kamap long Sambri kem na dispela polisman we skul meri ya i save long em i lusim skul meri ya wantaim dispela arapela wanwok bilong em. Na polisman we skul meri ya i save long em i kisim ka na i go.

Em nau dispela arapela polisman ya, Komanda Huafole i tok, i

pulim skul meri ya i go insait long bus na traim long repim em (skul meri). Tasol skul meri ya i singaut na sampela pipel long Sambri kem i harim na i go long sekap. Ol i go na polisman ya i lukim ol na em i lusim skul meri ya na ranawe.

Mista Huafole i tok meri ya i no bin givim ripot long polis long hevi em i bungim. Tasol taim em i stap long skul na bungim hevi long tingting bilong em, em i tokim prinsipal bilong skul long hevi em i bin bungim. Na prinsipal i givim ripot i go long polis long dispela wik Mande, April 1, 1996.


Polis i karim aut wok sekap na i holimpasim dispela polisman.

Polis bai sasim tu dispela arapela polisman we skul meri ya i save long em long sas bilong helpim wanwok bilong em.

Long sas bilong yusim mani krangi, polis i sasim Sinia Konstabel Luke Aikas, 30 krismas, bilong ples Tingo long Lorengau, Manus provins.

Mista Huafole i tok polis i sasim Konstabel Aikas long yusim krangi K379 fiul bilong ka taim em i wok long Pagwi polis stesin.

Polis i tok taim em i wok long Pagwi polis stesin, Konstabel Aikas i 200 lita fiul bilong yusim long wok long tripela dram na salim long ol manmeri long pablik.



*Yunivesiti wokim na givim...* • Literesi na Tokples dipatmen bilong Yunivesiti bilong Papua Niugini i wokim pinis na givim wanpela buk ol i kolim "Kritikel na Developmen Literesi" na givim i go long Yunaited Nesen Fan bilong ol Pikinini ol i kolim UNICEF. Dispela buk i toktok long literesi developmen insait long kantri. Long dispela poto, Profesa Otto Nikitel (sindaun) wantaim tupela arapela wanwok bilong em na UNICEF opisa long PNG, JK Gupta, i soim dispela buk.

## Kosmeri pipel laikim DPI stesin

KOSMERI em i wanpela eria we i stap long het bilong Wara Sepik klostu long bodamak bilong Is Sepik provins na Enga provins. I gat 5-pela ples i stap long Kosmeri eria. Ol ples ya em Marumatta, Besomo, Meska, Iraru na wanpela arapela ples.

I kam inap long nau, sapos yu toktok long gavman sevis, ol pipel bilong dispela 5-pela ples long Kosmeri eria bai askim yu long wanem samting em gavman sevis. Bikos ol i no lukim yet o trupela gavman sevis i no i go kamap long ol yet. Ol i stap long tudak. I no longtaim i go pinis, kaunsela bilong Kosmeri eria, Paul Bonai, i tokim Wantok olsem longpela taim tru nau em wantaim ol pipel bilong em i no lukim ol kisim trupela sevis bilong gavman.

Em i tok em wantaim ol pipel bilong em i traim na wokhat long bringim developmen na gavman sevis i go kamap long eria bilong ol. Tasol i nogat gutpela wokbung na helpim i bin kam long olpela provinsal gavman sistem. Em i tokaut olsem wanpela gutpela eksampel em etpos we i save sevim ol pipel long eria bilong em long Kosmeri, i nogat marasin long longpela taim tru nau.

Bikos long etpos i nogat marasin long longpela taim, Mista Bonai i tok, planti manmeri na pikinini i dai pinis. Long wanem i nogat ol marasin olsem klorokwin long helpim long stopim ol sik olsem malaria na ol arapela strongpela sik.

## Mariwana putim 7-pela man long han bilong polis

POLIS long Madang i holimpasim na sasim pinis 7-pela man long sas bilong holim spak-brus mariwana wantaim ol. Provinsal Polis Komanda, Sief Inspekta Robert Kalasim, i tok polis i holim dispela 7-pela man long Yomba komyuniti skul na painim tripela kilogrem spak-brus mariwana wantaim ol. Dispela 7-pela man polis i holimpasim na sasim ol, Sief Inspekta Kalasim i tokaut olsem 5-pela i bilong Is Sepik provins, namba 6 man i bilong Manus provins na namba 7 man i bilong Madang provins yet.

Em i tok krismas bilong dispela 7-pela man em namel long 17 na 28. Komanda Kalasim i tokaut tu olsem ol polisman bilong em i holimpasim na saim tripela arapela man long sas bilong paitim na kamapim bagarap long bodi bilong wanpela man. Em i tok dispela birua i kamap insait long wanpela pait long hap bilong Trans-Gogol long mun i go pinis (Mas). Komanda Kalasim i tok dispela tripela man, bilong ples Gouua, i paitim man ya wantaim ol poroman bilong em bihain long ka bilong ol i gat hevi long ensin na i stop long rot.

Em i tok ol wokman bilong em i holimpasim na sasim tu arapela tripela man bilong ples Malangai long hap bilong Sidor long sas bilong kukim haus. Em i tok dispela tripela man i kukim wanpela haus bihainim wanpela hevi bilong graun.

## Madang Ramu rot projek go moa long 1997

WOK bilong stretim bikipela haiwe rot long Madang na Ramu bai stat long neks yia, 1997 bihain long projek ya i winim wanpela kontrak. Dispela projek bilong stretim gut na putim kolta long Madang Ramu haiwe i bin kisim luksave na helpim bilong Yuropien Union (EU) long 1994 taim EU i wok long givim ol helpim insait long Madang provins. Ol helpim bilong EU i karamapim tu ol wara saplai, nupela skul na arapela projek moa.

Dispela projek bilong stretim Ramu Madang haiwe i bin kisim yesa long K22 milien long stretim rot ya.

Long dispela wik ripot i kam long opis bilong Woks olsem long mun Septemba bai ol i tokaut long kontrak bilong statim dispela projek. Taim ol i givim aut kontrak, bai wok i stat long neks yia, 1997. Toksave (tenda) i bin go aut pinis long niuspepa long 27 Februari long dispela yia long askim ol

kampani husat i save mekim dispela kain wok long aplai long winim dispela kontrak.

Ripot long Woks opis long Mosbi i tok nau yet em ol i stap insait tasol long stretim ol plen na wokim ripot bilong dispela wok i ken bihainim. Na ol i givim 6-pela mun nau long nem bilong ol kontrak i kamap long ol i makim.

Ripot long provinsal Woks opis long Madang i tok ol i wet tasol long wanem taim bai wok ya i ken stat. Bai i gat tupela hap bilong projek ya. Namba wan bai ol i statim wok long Ramu Suga i go pinis long Usino Tenof. Bihain bai ol i statim gen long Gogol Bris na i go olgeta. Tasol namba tu seksen bai i no inap stat hariap inap olgeta plen bilong namba tu seksen i redi gut long wok i go het bihain long namba wa seksen i pinis.

Long las yia, olgeta primia na nau Deputi Gavana bilong Madang provins, Mathew Gubag i tok helpim bilong EU istap pinis long provins. Olsem na ol i wetim tasol Woks Dipatmen long putim aut tenda bilong pulim kontrak kampani bilong wokim dispela rot. Dispela em wanpela bikipela helpim EU i putim antap long ol arapela helpim olsem wara saplai insait long ol liklik distrik long Madang provins long 1994.

Mista Gubag i bin tok em i laikim bai wok ya long putim kolta long haiwe ya i kamap hariap. Tasol em samting bilong Nesenel Woks olsem na ol bai wet tasol. Mani bilong wokim dispela wok em K22 milien we EU i bin promis long 1994 long Edministreta, Wep Kanawi husat i bin lukautim edministresen bilong Madang taim provinsal gavman i stap long saspensen.

Mista Gubag i bin tokaut long las yia olsem sapos dispela rot i kamap gutpela na ol i putim kolta long en, bai planti samting i kam long Madang na i go aut long Lae na ol hailans provins tu. Projek ya bai karamapim wok olsem putim kolta long rot, stretim baret long arere bilong rot na brukim ol maunten we ol ka i save raunim na mekim rot i go stret.

Dispela Ramu Madang haiwe em wapela bipela rot we olgeta de ol manmeri na kago i save kam long Lae na Hailans long en Na tu ol manmeri i save kam long Manus, Wewak, Vanimo na Madang yet na bihainim dispela rot i go long arapela provins. Mista Gubag i bin tokaut tu olsem Woks Dipatmen i mas skelim gut gutpela taim bilong mekim dispela wok. Bikos long taim nogut, bai ren i pundaun na bagarapim ol wok o mekim wok i go hat long pinisim.

# DOKTA WONG SOP BILONG KASKAS

FOR MORE COMPLETE PROTECTION

Daily use on skin will help fight

- \* Bacteria (Germicide)
- \* White spots, kaskas (Fungicide)
- \* Scabies sores (Parasiticide)

WHOLESALEERS: CB Chee, Cheong Supermarket, City Pharmacy, Daru Trading, Garamut, Johnston Pharmacies, Morobe Pharmacies, Spirit of Kokopo, PriceRite, Rabtred, SCS Trading, S&N Trading, Tangmow, Tropicana, TST.



STA em i namba wan holi de long kalenda bilong yumi ol Kristen manmeri. Bikos em i promis yumi tu bai kirap long dai.

Win bilong Jisas long Ista i soim yumi olsem seten bai lus, pen na wari bai kisim pe bilong en, ol samting nogut bai lus na indai bai no pinisim tru laip bilong yumi.

Long taim em i stap long dispela graun Jisas i bin promisim tupela samting i winim strong bilong ol man nating. Em i promis bai em i kirap bek long indai na em i promis bai yumi tu i kirap bek. Long Ista Jisas em inapim promis namba wan. Orait, nau yumi wet bai em inapim namba tu promis. Bikos em i kirap long indai, yumi tu bai kirap.


Dispela bilip long heven we bai yumi stap oltaim em i strongim bel bilong yumi. Long wanem yumi no laik dai. Yumi laik stap inap oltaim.

Tasol ating yumi save wari liklik. Dispela promis bilong heven em i samting tru o em i wanpela trik tok tasol? I gat wanpela man o meri i bin lukim heven na ibin kam bek na tok save long yumi? Yesa, i gat. Em Jisas tasol.

Olgeta Gut Nius stori bilong Ista i tok long em i bin kam bek planti taim na lukim ol aposel inap long 40 de. Em i toktok wantaim ol, em i kaikai wantaim ol, em i wokabaut wantaim ol. . . Na long dispela taim em i gat wanpela bodi i narakain tru.

Sen Pol long 1 Kor 15:36 i rait olsem: "Ol man i dai pinis, bai ol i gat wanem kain bodi taim ol i kirap bek? Bodi yumi planim em i save bagarap. Bodi i kirap bek, em i no inap bagarap. Bodi yumi planim em i samting nogut. Bodi i kirap bek em i gutpela tru. Bodi yumi planim em

## Katapila i kamap bataplai



FRANK MIHALIC i raitim

i no gat strong. Bodi i kirap bek em i gat strong. Bodi yumi plainim em i bilong graun. Bodi i kirap bek em i bilong heven."

I gat tupela taim we Jisas i bin kirapim bek sampela pipel. Em i kirapim bek Lasarus na em i kirapim bek wanpela yangpela meri. Tasol em i bin kirapim tupela i kam bek long dispela laip yumi i gat nau. Tasol yumi bai kirap long wanpela laip i narakain olgeta na i winim dispela olgeta.

Yumi Kristen i gat wanpela naispela tok

piksa bilong kirap bek bilong yumi. Yumi save tok olsem nau yumi olsem wanpela katapila. Yumi wokabaut long graun na ai bilong yumi pas long ol samting bilong graun tasol - olsem katapila stret. Bihain nau katapila ya i wokim wanpela liklik haus nabaut long en na em i go insait na i wet i stap.

I luk olsem em i dai tasol nogat. Nau em i kamaut long haus ya na em i narakain samting olgeta. Nau em i gat wing na em inap flai antap long win na em i fri. Em i no anka na pas long graun.

Sampela Kristen i gat wanpela narapela eksampel. Em i go olsem, dispela graun i olsem wanpela piksa yumi droim antap long wanpela hap pepa. Yumi inap droim olkain naispela samting long dispela pepa. Tasol em i pepa nating. Bihain yumi dai, orait, ol piksa nating i stap long dispela pepa bai kamap samting tru. Pol i rait long 1 Kor 2:9 olsem: "Ol samting bipo i no gat man i bin lukim o harim tok long en. Na i no bin kamap long tingting bilong man tu em ol samting God i bin redim i stap long ol man i save laikim em tru."

Olgeta aidia bilong Ista i save poinim dispela bikipela bilip bilong yumi ol Kristen. Olgeta naispela samting bilong dispela graun ol i olsem samting bilong katapila tasol. Na ogeta samting bilong heven i olsem olgeta naispela samting bilong bataplai.

## OL LIKLIK SIOS NIUS

### Planti pipel no ritim Baibel

Inglen na Wales: Planti manmeri husat i save go long sios i no save ritim buk Baibel long olgeta taim, wanpela ripot we Britis Foren Baibel Sosaiti i kamapim i tok.

Ripot i bin tok 15 pe sen long ol pipel we sevei o wok painimaut i bin karamapim ol i tok ol ino save ritim tru buk Baibel, Na narapela 17 pe sen i tok ol ino ritim buk Baibel liklik long las yia taim 33 pe sen i tok ol save ritim buk ya long wanpela taim insait long tupela wik.

Tasol 15 pe sen i bin tok ol i save ritim buk Baibel long olgeta de na narapela 18 pe sen i tok ol i save ritim buk ya long wanpela taim insait long wanpela wik.

Sevei i bin painimaut tu olsem wan kwata long ol dispela pipel husat i save go long sios long olgeta taim i bin tok long sampela taim insait long laip bilong ol, ol i ritim olgeta tupela hap bilong buk Baibel. Dispela em long Olpela na Nupela testamen.

### Engliken sios long Inglen na Ailan bung

Tripela opisal sevis o lotu bai kamap long selebretim o amamasim wok bung we bai kamap namel long Engliken Sios insait long Inglen na Ailan (Ireland) wantaim ol Luteran Sios lain long Baltik na Nodik rijon long Yurop.

Dispela yunien em ol i kolim long Porvoo Deklaresen.

Wanpela sevis bai i kamap long Briten, wanpela long Nodik kantri na narapela moa em long Baltik kantri.

Long Trondheim Katitrel insait long kantri Norway, ol amamas long dispela samting bai kamap long Septemba 1, 1996. Na long ol Baltik kantri, ol bai holim sevis long makim dispela samting long Septemba 8, 1996. Long Briten, sevis bai i kamap long London long Novemba 28 na ol bai holim dispela long bikipela haus lotu ol i kolim long Wesminista Abi.

Dekleresen long bungim Angliken na Luteran Sios insait long ol dispela kantri long wok bung wantaim i kamap bihain long 12 pela sios yet i bin wanbel long em. Evangeilka Sios bilong Latvia tasol i tingting yet long joinim ol dispela lain bikos em bai i kisim vot long ol sios memba bilong em long dispela samting na givim disisen bilong em.

### Ol Luteran long Hong Kong bai bung

Hong Kong: Samting olsem 300 sios memba bilong Evanjelikel Luteran Sios bilong Hong Kong i bin stap insait long namba wan bung wantaim ol i kolim long "Saina nait".

Astingting long dispela bung wantaim nait em i bilong toksave long ol sios memba bilong ol wanem samting i kamap long Saina long sait bilong Luteran Sios. Na tu redim ol Luteran Sios memba long Saina i tekova long Hong Kong long neks yia, 1977.

Progrem i bin gat long en taim long givim aut ol ripot wantaim poto, semon, ol tumbuna singsing bilong Saina na ol arapela samting moa olsem.

### Baibel Sosaitim givim sperituel helpim

Kinshaha, Afrika: Baibel Sosaiti long kantri Saiye i givim sperituel helpim i go long ol lain husat i bin bungim hevi long wanpela imejensi sik ol i kolim long Ebola, long taim Sosaiti i raitim kamap moa long 5,000 kopi long ol buklet ol i kolim long Nothing can Seperate Us from the Love of God. Dispela buklet o liklik buk i gat ol rot bilong kisim sperituel helpim, kaunseling na ol kain helpim olsem.

Binatang nogut ol we i save kamapim sik Ebola i bin kamapim bagarap na dai long planti pipel bilong Kikwit rijon long Saiya long las yia na tu pastaim long 1976.

Pasto Shindani husat tu em i presiden bilong Bandundu Baibel Sosaiti i bin autim tok amamas i go long Baibel Sosaiti long kamapim na givim ol long ol fri buklet we em i tok bai i helpim tru ol pipel wantaim ol gutpela toktok bikos planti nau i stap wantaim bikipela pret na sori long sik we i pinisim laip long planti wanlain bilong ol bai i kisim ol tu. Em bin tok tu olsem ol buklet ya bai i givim nupela hop na gutpela tingting i go long ol lain husat i kisim sik Ebola. Bikos Baibel i tok maski wanem sik i kisim man, dispela ino inap long stapim ol bilip manmeri long lav bilong God.

Ol liklik sios nius i kam long Luteran Sios niusleta ol i kolim long The Announcer.

# Amamas bilong Ista bai kukim Mosbi

### SAPE METTA i raitim

I LUK olsem planti tausen manmeri na pikinini bilong ol kainkain lotu bilong Papua Niugini bai bung long Mosbi siti, na kirapim paia wantaim ol kainkain amamas na lotu long dispela Ista wiken.

Wanpela long ol dispela sios em long Yunaited Pentekostel Asembli (UPA). Ol sios memba bai kam long olgeta kona bilong kantri na ovasis tu long bung wantaim insait long wanpela bikipela rivaivol kruset long Mosbi siti.

Dispela rivaivol kruset bilong ol i save kamap long olgeta yia.

Astingting long en em long sindaun bung wantaim na amamas long mekim lotu. Na kamapim tu ol arapela ektiviti we i ken strongim bilip na Kristen wokabaut bilong ol long telimautim Gutnius long olgeta manmeri long sios bilong ol. I gat samting olsem 70 han bilong Yunaitet Pentekostol Asembli sios insait long kantri na moa long 20,000 sios memba. Na i luk olsem hap long dispela namba bai kamap long dispela kruset long Mosbi long dispela wiken.

Man husat i go pas long dispela ogenaisesen, Peter Dege, i tok bikipela tingting we UPA sios i gat em long autim gutnius bilong oraitim ol kain hevi na sik long bodi bilong ol (sperituel hiling). Wanpela biknem evanjelis long wol, husat i memba bilong UPA intanesenel, Reveren Billy Cole bilong kantri Amerika wantaim narapela wanwok em Reveren John Wolfram bai i kamap long dispela kruset. Nau yet, ol sios memba i wok long kamapim ol spesel open ea bung long 9 Mail, Boroko, Godens na Koki maket. Na stat long tude Fonde i go inap long Sande, ol bai i holim bikipela kruset bilong ol long Sir John Guise Stadium.

Ol arapela sios grup long siti tu bai i kamapim tu ol kain ektiviti bilong ol yet na planti long ol bai i bung wantaim long karim diwai kruse i raun long siti na amamasim Ista.



□ Dispela em i taim nau bilong karim kruse olsem poto ya bilong Goroka i soim long Ista taim long sampela yia i go pinis.

### TONY LUKE i raitim

Resurrection Luteran Sios long Lae i bungim mani nau long skruim haus lotu i go bikipela.

Las wik Sande bihain long Inglis na Tok Pisin lotu, olgeta sios memba i bung na holim fan resing.

Grup bilong ol mama we ol i kolim long Mama Geyamsau i go pas long kukim kaikai. Na redim na salim long ol arapela sios memba. Man husat i go pas long ogenaisim dispela bung bilong

bungiom mani em opela Palamen memba bilong Morobe, Boyamo Sali. Mista Sali i tokaut olsem bai ol i holim wankain bung bihain taim long bungim inap mani. Na bai baim ol samting bilong skruim haus lotu olsem palang na nil na kapa. Long wanem nau yet namba bilong ol sios memba i go antap. Na haus lotu i liklik tumas. Olsem na long olgeta Sande, planti sios memba save sanap ausait long haus lotu na lotu.

Mista Sali i askim olgeta sios

memba insait long Lae siti long givim sapot long wok bilong bungim inap mani. Na dispela wok i mas karim kaikai. Planti grup bilong ol mama wantaim bilong ol yut i amamas tru. Na tokaut long givim sapot long dispela wok.

Wanpela mama, Lautu Yabong i tok dispela aidia bilong skruim haus lotu i go bikipela i kamap long stretpela taim stret. Long wanem em i lukim olsem planti pipel i no save lotu gut taim ol i sindaun ausait long haus lotu.

## Ol Lae Luteran bungim mani long skruim haus lotu



## Pasin kastom long mining bilong Ista

ISTA long ol Kristen long wol em i bikpela samting long kalenda bilong lotu. Ol bikpela samting we i stat long Holiwik i save go pondaun long Ista Sande. Ol kantri long wol i gat ol kastom pasin bilong selebretim o amamasim Ista. Long Yurop na Midel Is, ol kastam bilong amamasim Ista i bihainim ol bikpela kastam festival bilong singsing na kaikai. Na dispela i go wantaim astingting bilong ol Kristen sioslong kirap bilong Jisas long Ista. Dispela ol kastam i karamapim ol kain samting we sampela i kamap long ples klia na i go het yet. Kiau we bipo ol i save tambuim long kaikai long taim bilong Len (taim bilong apim kaikai o stap long kisim sampela kaikai long foapela wik bipo long Ista). Kiau em i mak bilong nupela laip we i min olsem kirap long dai long statim dispela nupela laip. Long Ijip na Yurop, animel rabbit o hea em i mak bilong fertility (long tok Inglis) o gutpela sain long karim planti pikinini. Long dispela na i save gat Ista rabbit, we dispela long periot o taim i save kamap long Ista na long selebretim dispela taim, ol i save haitim ol kala kiau bilong ol pikinini long painim.

Long PNG, yumi save bihainim pasin bilong ol Kristen long selebretim Ista. Dispela em long bikpela lotu sevis i save kamap long tingim dai bilong Jisas long Gut Fraide na kirap bilong em long Ista Sande. Pasin bilong selebretim Ista i go bek long bipo tru long taim ol Kristen Sios i kamap. Ista em i olupela selebren we ol kristen sios i save selebretim bihain long Sande. Long tokples Latin na Greece, ol i kolim Ista long Pascha. Ista em i bikpela festede tru winim ol arapela long kalenda bilong ol Kristen Sios. Deit o taim tru long Ista i pondaun. Ol Kristen long wes i save luksave long taim bilong ista long namba wan Sande bihain long paschal ful mun i kamap. Long ol, dispela taim i save kamap long Mas 21 samting. Sapos paschal ful mun i no bihainim taim bilong ful mun ol i makim long kalenda bilong yia, orait, Ista i ken pondaun namel long Mas 22 na April 22. Ol bin wanbel wantaim dispela rul bihain long planti toktokwe i sapatim na egensim dispela samting namel long planti ol kristen sios long bipo yet long senseri 8 (8th century).

Nau long dispela taim, ol sios i no wanbel yet long wanpela deit tasol ol i makim namba tu Sande long mun Epril olsem deit we Ista i pondaun. Ol kristen long wol bai i selebretim Ista long Epril 7 wantaim ol kain ektiviti. Em i taim tu we planti manmeri husat ino go lotu long sampela taim bai i go na strongim bek gen bilip bilong ol insait long ol wan wan peris long ples na kantri. Taim bilong Ista em i taim tu bilong sea, wokbung wantaim, mekim gut long wanpela arapela na soim lav.

## Amamasim Ista na tingim God long laikim tumas yumi

**Toktok bilong Ista i kam long Asbisop bilong Mosbi Katolik Asdalosis, Sir Peter Kurongku**

GOD i bin laikim tru wol na em i larim pikinini bilong em i dai long yumi ol man bilong graun. Na husat i bilip long en i ken stap oltaim.

Bikpela tes long lav bilong God long yumi em long salim pikinini bilong em Jisas i kam long graun na dai long sevim yumi. Na tu long givim Holi Spirit i kam long yumi. (John 20: 21-22).

Long taim yumi amamasim Ista, i gutpela long yumi givim sampela taim long tingim God Papa husat i laikim tumas yumi. Na em bin salim wanpela pikinini bilong em Jisas. Dispela long bihainim laik bilong Papa na dai long winim yumi long sin pasin.

"Jisas i no bin winim wanpela samting bilong em yet, tasol em bin bihainim laik long Papa bilong em long taim em i bin dai long kisim bek yumi long sin.

Santu Mark long Gutnius bilong em i tok "Pikinini bilong man in o kam long dispela graun long winim biknem, tasol long kamap olsem sevan o wokboi na tu long givim laip bilong em long peim bek yumi. (Mark 10: 45)

Taim yumi redi long selebretim dai, kirap na go long

heven bilong Jisas, moabeta yumi tingim tripela strongpela toktok we em i bin givim i go long ol aposel bilong em.

• Long laikim narapela man olsem yumi laikim yumi yet. (John sapta 15 ves 12).

• Long tingim em taim yumi selebretim Holi Komunio(Luke 122:19) na

• Long go hetim misin wok ministri we em bin statim long karim Gutnius i go long olgeta hap bilong wol. (Mak 16:15)

Long ol preia bilong yumi long taim bilong Holi Wik we i bin stat long dispela wik, yumi mas tingim na skelim hap toktok bilong Jisas we em bin mekim long taim em i hangamap long Diwai Kruse ol bin nilim em i stap. Dispela em "Em i pinis" (John 19:30).

Wanem tru mining bilong dispela hap toktok? Jisas i sevim yumi long dispela hap toktok bilong em o i gat sampela samting we bai yumi mas inapim yet. Tru, yumi stap long dispela graun long inapim wok bilong yumi long kisim salvesen.

Long Ista moning, i gat wanpela singaut olsem "Em i kirap pinis." Dispela iken bringim long yumi ol tingting long hop. Yumi i ken kirap wantaim nupela laip. Santu Pol i raitim olsem "Sapos Krais ino bin kirap, bilip

bilong yumi bai i lus nating." (Korintiens 15:14)

Bilip bilong yumi i olsem wanem tude? Em i strongpela, i go daun o i nogat olgeta? Long bilip bilong yumi long dai na kirap bek bilong Jisas, yumi tokaut olsem yumi ol disaipel bilong em.

Tru yumi ol disaipel bilong Jisas tasol hau bai yumi soim olsem yumi ol trupela disaipel? O yumi feil long bihainim em?

Yumi no inap long stap olsem ol Kristen long nem tasol. Nogat. Long kamap olsem Kristen tru, yumi i mas bihainim kain laip na ol pasin we i soim olsem yumi ol disaipel bilong Jisas tru.

Long tude em i tru long tok olsem bikpela wari na hevi long kantri i kam long ol birua insait long kantri yet na ino long ausait. Planti pipel nau i no soim rispek na digniti long wanpela arapela. I gat taim nogut, planti ol trangu lain na inogat samting i kamap long daunim ol dispela samting. Hevi long Bogenvil i stap yet na ino pinis yat. Westap ol man wantaim gutpela tingting? I gat taim long pasin bilong korapsen we ol bikman i save wokim ol paul pasin, paulim mani na wokim o, planit ol kain pasin nogut olsem long taim ol pipel i makim ol long stap olsem ol

lida bilong ol long komyuniti, provins na kantri. Planti pipel long dispela kantri nau i nogat wok na ol pipel i no kisim gutpela sevis nau. Ol trangu lain em ol dispela husat i kisim bikpela taim nogut na hevi yet ya.

Tasol ol dispela samting ino ken mekim yumi i givap. Nogat. Yumi i hiumen na yumi save wokim mistek long laip bilong yumi. Ol dispela mistek we yumi i mekim i soim olsem yumi nitim God, yumi mas gat hop na tras long em. Long bilip bilong yumi, yumi i ken kisim strong long taim bilong hevi na tu taim sin i daunim yumi. God i singautim yumi tasol em ino save fosim yumi long ansa o kamap olsem ol disaipel bilong em. Em i lusim disisen long yumi yet i skelim na bihainim em o nogat.

"God em i lav", John sapta 4 ves 8 i tok. Em i singautim yumi long serim lav bilong em wantaim ol arapela brata na susa bilong yumi. Mekim dispela olsem wanpela salens long taim yumi selebretim Ista.

Preia bilong mi long yupela olgeta long taim yumi amamasim na tingim dispela bikpela wik na taim bilong Ista.


# KAMAPIM TIM WANTAIM TOYOTA 1.8 KIJANG

Dispela stail Pikap nau kamapim ekonomikol 1.8 lita petrol enjin, bikpela eria bilong kago, bikpela visin kab disain, na planti moa moa yet. Dispela Pikap em i gutpela bilong Papua Niugini long yusim long planti laik. Kamapim Tim wantaim Toyota 1.8 Kijang Pickup tete long Ela Motors Nesinwaid!



**EM I STAP BILONG DILIVERI KWIKTAIM LONG NESINWAID! RINIM MIPELA NAU!**

PORT MORESBY	3229400
LAE	422322
RABAU	929100
MADANG	822188
GOROKA	721844
MT HAGEN	512888
WEWAK	862255
KAVIENG	942132
KIMBE	935155
TABUBIL	589060
VANIMO	871254
PORGERA	579348
KUTUBU	596385
BUKA	939915
LIHIR	943108
ALOTAU : WALTERS	
WORKSHOP	611174
ORO MOTORS	297002



**TOYOTA**

**Ela Motors**  
BPT (PNG) LTD.  
**NESINWAID**



# Tripela lokol level gavman long Menyama

ANINIT long nupela sistem bilong provinsal na lokol level gavman, Menyama distrik insait long Morobe provins nau bai i gat tripela lokol level gavman.

Long kamapim dispela tripela lokol level gavman, ol atoriti insait long Menyama distrik, long nau yet i wok long stretim ol samting na putim ol pepawok wantaim.

Long bipo yet i kam inap long nau, i gat luksave i stap olsem Menyama distrik i no wanpela komyuniti gavman eria. Bikos long dispela astingting na luk-

save, taim dispela tripela lokol level gavman i kamap insait long distrik, dispela bai i nupela samting long ol pipel bilong Menyama.

Ripot Wantok i kisim i tok olsem dispela tripela lokol level gavman em Kome, Aseki na Wapi.

Na ol interim presiden em: Aseki Lokol Level Gavman-Ezekiah Aino, Wapi Lokol Level Gavman-Jessy Tango na interim presiden bilong Kome Lokol Level Kaunsil em Solomon

Bomo.

Bihainim ol lo na senis bilong nupela sistem (provinsal na lokol level gavman), ol provinsal atoriti long Februeri 2 long dispela yia i rausim Distrik Plening Komiti na putim kamap Joint Distrik na Baset Praioriti Komiti.

Long las wik Fraide, komiti i bin bung long Menyama haikul na holim namba wan miting bilong en. Na i paitim toktok long K3 milien baset alokesen bilong dispela yia.

Ol interim memba bilong komiti

em nesenel memba bilong Menyama Thomas Pelika olsem siaman, Gavana bilong Morobe Jerry Nalau olsem namba tu siaman, Mista Tango, Mista Aino, Mista Bomo, Nelson Joseph (mausman bilong Wapi), Misk Amje (mausman bilong Kokai-Menya) na mausman bilong Aseki em Giamalu Koangio.

Ektng edministreta bilong Morobe, Ainea Sengero, husat i bin stap insait long namba wan kibung bilong komiti long las wik Fraide, i givim bikpela tok ama-

mas i go long ol pablik sevan long mekim Menyama i kamap olsem wanpela gutpela eksampel bilong kamapim developmen insait long ol rurel eria.

Nesenel memba bilong Menyama, Mista Pelika, i tokaut olsem bikpela mak bilong Rurel Eksen Program (RAP) mani bilong em bai go aut long ol sosel sekta.

Wanpela samting em long baim 50 pesen skul fi bilong olgeta sumatin husat i stap long Menyama haikul.

## Isi ya, tingim ol arapela tu

□ Tripela wokmeri bilong Pos na Telekomyunikesen (PTC) insait long Mosbi siti i lap wantaim na putim han, spun na fok long kaikai. Dispela em bihain long ol memba bilong PTC Wokas Yunien i bung na stap insait long Anuel Jenerel Miting bilong Yunien we ol opisal bilong Yunien i oganaisim na holim wantaim ol fainensal memba. Miting ya i bin kamap long tupela wik i go pinis. Foto: Sape Metta.



## Sepik kaunsela givim tok lukaut long ol gol baia

FUZO PAUL i raitim

KAUNSELA bilong Kosmeri eria long hap bilong Hansten Rens, Ambunti distrik, insait long Is Sepik provins i givim nau bikpela tok lukaut i go long ol lain husat i save go na baim gol long ol pipel bilong em.

Kaunsela Paul Bonai i givim tok lukaut na tambu long ol man long go long Kosmeri eria na baim gol long ol pipel bilong em. Bikos em i no amamas long sampela pasin we ol lain bilong baim gol i save mekim.

Arapela samting tu, Mista Bonai i tok, i olsem planti pipel bilong em long Kosmeri eria i nogat gutpela save long rit na rait. Bikos long dispela astingting, ol lain i go baim gol i ken giamanim na paulim ol pipel bilong em.

Mista Bonai i givim tok lukaut, bihainim wanpela luksave i stap long nau yet, we planti pipel insait long Wewak taun na tu ol arapela hap i wok long go long Kosmeri eria na baim gol. Tasol bikos long hevi bilong nogat gutpela save bilong rit na rait, ol pipel bilong Kosmeri eria i no save long hamas o stretpela mak bilong mani long salim gol bilong ol. Em i tok planti lain i wok long go long Kosmeri eria na giamanim na grisim ol pipel bilong em na yusim ol samting olsem laplap (klos) na sotgan ol long baim gol. Em i tok i gat luksave i stap olsem planti taim, ol sotgan ol lain long taun i save yusim long baim gol i nogat laisens o i no rejista. Tasol bikos ol pipel i nogat gutpela save, ol i save kisim.

Bonai i tok nau long dispela taim, husat man i laik go na yusim sotgan na laplap long baim gol long ol pipel bilong Kosmeri eria, i mas tingting gut. Bikos ol pipel bai tanim bek na putim ol dispela lain long han bilong lo.

Em i askim tu ol provinsal atoriti long luksave long dispela hevi. Na mekim sampela samting long helpim ol pipel bilong Kosmeri eria long salim gol bilong ol.

## Westen Hailans STD/AIDS komiti kirap gen

BIHAIN long wanpela yia na 6-pela mun (18 mun) long stap nating, Westen Hailans STD/AIDS Komiti i no longtaim i go pinis i bin bung gen long Maun Hagen long makin ol nupela komiti memba.

Wok bilong Westen Hailans STD/AIDS Komiti em long putim kamap ol polisi na tu kamapim STD na AIDS program insait long Westen Hailans provins.

AIDS na ol STD sik i wok long kamap moa bikpela insait long Papua Niugini na tu ol arapela kantri insait long wol. Sik AIDS i no kamap bikpela yet insait long Papua Niugini.

Tasol ol ripot ol atoriti i putim kamap i no longtaim i go pinis i

soim olsem namba bilong ol pipel husat i gat binatang nogut we i ken kamapim AIDS (HIV), i wok long surik i go antap.

Komiti siaman, Dokta Jim Radcliffe, wanpela sejen bilong Kudjip Nasaren haus sik i welkamim ol nupela eksekutiv bod memba-Dokta Daisy Sonza bilong Maun Hagen na Dokta David Symmons bilong Tinsley haus sik. Provinsal Disis Opisa, Bernard Bal, i kisim ken posisen bilong em olsem seketeri.

Ol i ilektim gen Dokta Alphonse Tay o nomini bilong em i go insait long komiti. Komiti i ilektim gen siaman bilong Ret Kros brens long Maun Hagen na representativ, Peter van Fleet, i

go insait long komiti.

Komiti i ilektim 6-pela memba eksekutiv bod long kamapim ol eksen plen, polisi gaidlain na wanpela mama lo bilong komiti.

Ol arapela helt opisa husat i kamap na stap insait tu long dispela miting em haus sik dentel opisa, Peter Wak, Ret Kros fes aid opisa, Jack Kuram, Komyuniti Rilesen Opisa, Inspekta Benson Osil na DHO Kuyuwa Kombowa.

Long dispela miting, Westen Hailans STD/AIDS Komiti seketeri Bernard Bal i givim ripot bilong ol samting na wok komiti i wokim long las 18 mun.

Maski olsem komiti i no bin

bung, Westen Hailans Helt dipatmen aninit long PDCO Bal na ol wokman bilong em i mekim planti samting.

Mani bilong komiti long nau yet em K2700 na K13,037 i kam long Wol Helt Oganaisesen oli spenim long ol autris program, ol bung long ol ples na skul edukesen.

Westen Hailans STD/AIDS Komiti i bin karim aut 4-pela woksop long Nondugl, Tabibuga, Konja na Maun Hagen taun. Helt dipatmen i kondaktim ol dispela woksop wantaim helpim i kam long Nesenel Yut Sevis na ol arapela bodi.

## Tingim ol meri na ol pikinini

PLANTI pipel i autim tingting bilong ol pinis long wanem samting i kamap nau long Bogenvil. Em i no isipela hevi long stretim. Yumi no inap long stretim dispela hevi kwiktai tru.

Olsem na mi laik skelim tingting bilong gavman long yusim ami long stretim dispela hevi. I gat gutpela na nogut i stap tu.

Pastaim mi laik lukim sampela rot em gavman i bihainim na tu ol rot em ol arapela kantri i bin yusim long pinsim kain hevi olsem i kamap nau long Bogenvil. Bikman bilong ami, Brigidia General Jerry Singarok i tokaut pinis olsem pait nau i kamap long Bogenvil i bihainim pait i bin kamap long Vietnam bipo.

Pait long Vietnam i kamap namel long ol asples nan ol lain Amerika. Yumi save harim olsem strong bilong Amerika i winim strong bilong arapela kantri long wol. Tasol yumi lukim olsem dispela strong bilong ami bilong Amerika i no bin inap long winim dispela pait long Vietnam. Liklik strong bilong Vietnam i winim dispela pait. Ol asples i winim dispela pait.



Yumi ken tingim olsem wankain i ken kamap long Bogenvil. Yu tingim, ol BRA i no waitskin. Ol i asples ya. Dispela i wankain olsem Vietnam. Em i ples bilong ol BRA. Ol i save long olgeta liklik hanrot i stap long bus. Wankain olsem Vietnam. Na ol i soim pinis olsem ol i inap long pait.

Long Vietnam, planti bagarap i bin kamap, na planti pipel i bin dai. Planti meri and pikinini i dai. Dispela i kamap long Bogenvil. Tasol bihain ol asples i win.

Bilong wanem na Sir Julius Chan is strong long yusim ol ami long stretim dispela hevi long Bogenvil? Ol ami i stap longpela taim long hap tasol hevi i no pinis

yet.

Mi yet mi no bilip olsem dispela pait nau long Bogenvil em i bin kamap long ol aspels. Hevi i kamap bikos CRA i bagarpim sindaun bilong ol pipel na ol i no liak bekim gut dispela bagarap ol i bin kamapim.

Sir Julius i givim tokorait long yusim ami long Bogenvil. Tasol em bai kisim mani long wanem hap long sapatim ami? Papua Niugini i sot tru long mani nau. Mi harim tokwin olsem dispela mani em bai gavman i dinaum long wol beng. Dispela bai min olsem yumi mas peim moa mani long rais na tinpis, moa mani long balus na sip na moa mani long kain samting ol keresin na sop. Mipela ol asples Papua Niugini bai peim dispela mani.

Hevi long Bogenvil bai kamap bikpela moa na hevi long ol arapela hap long kantri bilong yumi bai kamap bikpela moa.

Ating wanpela samting em gavman inap long taim gen em long larim ol amai bilong narapela kantri i kam na streim hevi namel long BRA na gavman. Tingim taim ol i bung long "Bung Wanbel" long Arawa na

askim ol ami bilong Fiji na Tonga long stap was long dispela bung.

Planti man meri na pikinini i kam long dispela bung long soim olsem ol i laikim dispela hevi long Bogenvil i pinis. Ol i no kam bikos gavman bilong Papua Niugini i singautim ol. Ol i bin kam bikos ol luksave olsem dispela ami bilong Fiji na Tonga inap long lukautim ol.

Ating gavman mas tingting long kamapim wankain tingting na larim ol ami bilong Yunaitet Nesens i kam na helpim ol pipel bilong Papua New Guinea long stretim ol dispela hevi.

Yumi lukim olsem long planti bikpela pait i kamap long wol, ol meri pikinini kisim taim. Ol BRA emm ol blakskin lain. Ol pipel bilong Bogenvil i wankain tu. Plis ol pikinini i nogat wanpela kros long dispela pait. Planti meri i nogat kros long dispela pait. Plis larim ol i stap. Noken bagarapim ol meri na pikinini.

Ol pipel bilong Bogenvil i no statim dispela pait. Yumi mas tanim kros na pait bilong mipela i go long ol lain husat i bin statim tru dispela pait.





## TOK SAVE IGO LONG OLGETA PAPAMAMA GRAUN LONG LONG NUPELA ROYOLTI SISTEM

## YUPELA IWOK LONG LUSIM PLANTI MONI MOA

Insait long badget toktok long namba twenti tu dei bilong Novemba, 1995, Honourable Chris Haiveta i bin tok:

"Mi laik tokaut long nupela rot o senis bilong takis long diwai na royolti igo long ol papa na mama graun bai stat nau"

em i bin tok tu olsem:

"Ol nupela senis long takis bilong salim diwai na royolti bai bihainim FOB prais. Royolti na takis bilong salim diwai bai stap olsem:

<u>F.O.B. LOG PRICE</u> <u>KINA/m<sup>3</sup></u>	<u>MARGINAL</u> <u>TAX RATE</u>	<u>ROYALTY</u> <u>K/m<sup>3</sup></u>
0 - 90	15%	K10
91 - 110	30%	K12
111 - 130	50%	K15
131 - 150	55%	K18
151 - 200	60%	K23
Above 200	70%	K23 plus 7.5%"

In volume 1 "Economic and Development Policies" presented by Honourable Chris Haiveta on the occasion of the 1996 Budget page 150 ; emphasis added.

Gavman i wok long kisim planti million kina aninit long nupela polisi, tasol ol papa na mama graun i lusim planti moni bikos gavman ino laik baim ol long nupela rot or senis long baim royolti.

Gavman iharim tok bilong ol timba kampàni na em ino laik kamapim hariap dispela nupela royolti sistem.

Nupela polisi i tok ol papa na mama graun bai ikisim namel long K10 na K23 na antap long dispela 7.5% long wan wan kubik mita. Prais bilong diwai long dispela taim istap olsem K160.

Fores Minista tasol igat pawa long givim tok orait long nupela royolti moni tasol em i no wokim yet. Na ol papa na mama graun i wok long lusim million Kina moni.


Gavman ino laik baim royolti, tasol i tok bai kirapim wanpela komiti bilong lukluk gen long dispela nupela royolti sistem.

### Dispela em wanpla rot bilong holim bek ol moni.

Aninit long nupela polisi, gavman i wok long kisim bikpela moni tru, tasol i no laik long givim royoti bilong yupela aninit long nupela polisi. Olsem na yupela i lusim planti moni long royolti pinis.



# Ol British Juda no amamas long raun bilong Kwin




• Foma Chief Rabbi, Lord Jakobovits



• Kwin, Jews i bin toktok long senis plan bilong em

## THE GOOD EGG



### *Gutpela Kiau!*

I STAP LONG OLGETA  
NAMBawan RITel NA HOLSEL  
STUA LONG PNG

OL JEWIS komyuniti insait long Gret Briten i bel kros nogut tru taim ol i harim olsem raun bilogn Kwin Elizabeth i go long Poland em bai em no nap raun i go long ol ples olsem Auschwitz o ol narapela ples em ol Nazi i bin kilim ol lain Jews.

Nau yet ol lain Jews komyuniti long Briten i mekim sampela strongpela singaut tru i go long kwin long las minit tru long traim senisim tingting bilong em na em i ken raun i go long dispela ol ples nogut long taim bilong ol Nazi.

Ol narapela bikman olsem Pope John Paul II wantaim ol presiden bilong Jemeni na Amerika, i bin raun i go na putim plaua long dispela ol hap ples long soim sori bilong ol. Tasol Kwin Elizabeth i no nap long mekim dispela.

Kwin bai raun i go inap long Krowkow long neks wik Wednesday tasol em bai i no nap go klostu liklik long Auschwitz long wanem ol raun bilong em i tait nogut tru.

Ol opisal bilong Briten i tokaut olsem, dispela em i wanpela State raun bilogn Kwin na ol lain long yet i mekim olgeta samting bilong em long raun na ol i lukluk tasol olsem na i gat planti samting em Kwin i mas mekim na bai nogat taim bilong em long raun i go olsem long Auschwitz.

Dispela ples Auschwitz long hap bilong Poland em ol Nazi Pati em ol lain bilong Adolf Hitler i bin kilim planti milien manmeri Jews. Rot em ol Nazi i kilim ol em long kisim ol i go insait long ol traipela has na opim ol marasain nogut we ol i smelim na ol bai dai.

Hitler wantaim ol lain bilong em long yia 1942 i kam antap inap long 1945 i bin kilim ol lain Jews long wanem ol i ting ol Jews em ol trabel lain. Olsem na nau yet i gat bikpela belkros long pait bilong dispela samting i stap yet na ol lain logn

Jemeni na Poland i save kisim bikpela sem tru long dispela samting.

Wanpela Foren Opisal bilong Poland i tokaut olsem tupela sait wantaim em long Briten na Poland i bin kisim toktok long ol raun bilong Kwin.

"Kwin i no kisim gutpela toktok long ol Foren Sevis long dispela samting. Em yet i no nap toktok long raun bilogn em tasol mi pilim olsem wantaim bikpela rispek i mas gat inap olsem wanpela hour long taim bilogn em long raun i go long dispela ples," Mista Arieh Hender wanpela eksekutiv bilong Bod ov Deputies bilong ol British Jews husat i bin helpim ol German Jews long ranawe long ol Nazi long 1930 i tok.

"Dispela em bai wanpela bikpela samting tru long pasin namel long Briten na ol Jewms lain husat i stap wantaim ol-olsem mama bilong Prins Philip-olsem na dispela em pasin nogut long abrusim dispela ples ol Nazi i kilim ol Jews."

Mama bilong Prins Philip, Princess Andrew bilong Greece i bin helpim long lukautim ol Jews long taim ol ol Nazi i wok long kilim ol long taim bilong Wol Wo 2 na nau bodi bilong mama bilong Prins Philip em ol i planim em long Isreal.

Olpela Sief Rabbi, Lord Jakobovits husat i bin makim Kwin long ol seremoni long tingim ol samting i kamap long Auschwitz i kalap nogut tru long dispela.

"Dispela i mekim mi kalap nogut tru long wanem i nogat wanpela taim bilong em bai em i soim sori bilong em taim em i stap klostu tru, " em i tok.

Raun bilong Kwin long i no go long dispela hap i mekim moa long 300,000 British Jews i no wanbel long dispela samting.



# Go pas long stres insait long bisnis

STRÉS (hevi long bodi) em wanpela kain samting we yu mas stretim yet long pasin bilong olgeta man-meri. Sampela taim ol hevi long bodi o skin les, pilim olsem skin i pen na sik, i no gat amamas em ol kain pasin bilong stres. Na dispela i sampela taim gutpela long mekim man i luksave long kain hevi olsem i stap na inap kamap. Tasol sapos dispela samting stres i winim man na mekim em i go belhat o kamapim kros nabaut, dispela inap abrusim mak bilong man i ken traim long stopim stres. Na dispela i no gutpela moa. Gutpela long skelim dispela kain pasin na wanem kain rot o pasin yu laik mekim long stretim dispela hevi. Traim long abrusim pasin o ol samting we i save kamapim dispela pasin bilong stres.

Plantu hevi inap mekim man i kisim stres o plantu wok inap mekim man i bungim stres na dispela inap mekim man i kamap les o sik. Wok insait long kampani em sampela hap we man inap kisim stres. Hevi stres i save kamap em long man i mekim ovataim wok, plantu wok, senisim wok, bodi bilong man i no gat strong, no gat wok, bodi i bungim hevi, no gat amamas long wok, kros, man i no mekim wok em i skul o trening long en, nogat gutpela poroman long wok, lo bilong kampani i hat tumas long wokman long wok na sindaun bilong man yet long haus wanwan. Ol dispela samting inap mekim man i kisim liklik stres level.

• Mi mekim strong askim long mi yet  
• Mi kros taim ol samting i no kamap gut long laik bilong mi  
• Mi wok strong na pilai strong  
• Ol poroman i no save kamap taim mi save ting long en

## TOKTOK BISNIS

wantaim

**BOB WHEELER**

- Mi laikim gutpela nem na luksave
- Mi wanpela hatpela man
- Mi save gat bikpela na strongpela laik
- Mi save laik strong long kisim samting
- Mi no save amamas tumas long ol samting mi kamapim
- Mi painim hat long go isi o mekim samting isi
- Mi no save wanbel hariap long ol hevi o kros
- Mi no save wari long ol samting i go olsem wanem, laik bilong mi em inap
- Taim mi save sik mi no save wari tumas
- Mi no save laik westim taim bilong mi long ol liklik samting
- Mi save laik bilas gut
- Mi wanpela hatpela man long bungim
- Mi save pilim olsem mi strongpela man long mekim samting taim mi stap wantaim ol bikpela man
- Tok beksait o sutim tok i save mekim mi kros moa

### Rot bilong kontrolim stres em olsem;

Luksave long wanem samting em stres na em i kamap long yu olsem wanem. Sapos yu luksave long dispela bai yu ken save long stret i kamap long yu olsem wanem na asua long bodi bilong yu em i save kamapim dispela hevi. Sapos yu luksave nau bai yu ken stretim dispela hevi.

Stretim gut pasin bilong yu long mekim disisen. Save bilong lukautim na go pas long

disisen i ken mekim yu save long rot bilong brukim na skelim ol disisen na yu ken kontrolim gut. Lainim long mekim samting we yu inap kontrolim na go pas long en. Na lusim ol samting we yu i no inap long lukautim o kontrolim.

Save gut long pasin bilong mekim bodi bilong yu i pilim gutpela o kisim win. I gat sampela kain rot na tingting we yu inap bihainim long mekim bodi bilong yu i amamas na stap isi.

Holim gutpela helt long bodi bilong yu. Kaikai gutpela kaikai na kaikai gut taim yu laik statim wok long olgeta moning. Strongim hevi bilong yu i mas stap wankain na kisim plantu slip. Stadi i soim olsem sapos yu stap fit o strong, bai yu i no inap bungim ol kain stres o hevi olsem long bodi bilong yu.

Yu mas gat gutpela tingting long yu yet. skelim gut olsem na samting mekim ol samting isi na gutpela. Skelim sindaun na pasin bilong yu olsem pasin bilong laik tru we olgeta man i gat long en. Wanem samting i kamap long laik em yu mas lukim olsem salens. No ken ting lukdaun long en na daunim yu yet olsem dispela em bikpela samting we inap winim yu. No ken gat tingting nogut long yu yet, arapela na laik olgeta.

### Lukluk stret

Traim long kamapim samting tasol i mas liklik. Amamas long wanem samting yu kamapim na arapela tu. No ken tingting plantu o wari tumas long ol samting yu i no mekim gut. Traim wok long strong long kamapim gutpela risal.

### Kamapim prensip

Pasin bilong i gat poroman o wanpela lain long toktok wantaim i gat bikpela helpim bilong em bikos yu inap toktok wantaim long ol samting na mekim ol samting wantaim. Dispela em yu skelim ol hevi na wok yu yet inap karim. Na dispela inap daunim hevi bilong stres na daunim hevi long helt bilong yu.

### Pasin bilong toktok

Kamapim pasin bilong toktok na askim arapela long gutpela rot long wanem samting yu laikim. Tokaut klia long gutpela rot na isi rot long wanem laik na tingting bilong yu. Lainim long tok nogat long ol lain husat i save askim plantu samting tumas long yu.

### Lukautim gut taim bilong yu

Skelim gut ol samting yu laik mekim. Skelim wanem em bikpela samting long yu na wanem em yu laikim long mekim tu. Plantu bilong mipela i save mekim plantu samting. Yumi no save mekim gut na tu yumi mekim samting hariap tumas. Dispela em bikos yumi no save stop na askim yumi yet long wanem samting tru em yumi laik mekim. Pasin bilong askim yu yet long wanem samting yu mas mekim na skelim gut ol samting em bikpela samting long helpim yu yet. Sapos yu save askim yu yet long ol samting yu mekim na wanem as yu laik mekim dispela, bai yu ken helpim yu yet long plantu samting. Sapos yu i no inap mekim ol dispela kain pasin, yu bai painim hat long skelim wanem samting em bikpela long yu na wanem samting em yu mas mekim.

### Redi long ol senis

Wanem kain senis i kamap long wok bilong yu o long laik bilong yu, em yu yu mas bungim na yu mas stretim long dispela taim. Bikpela samting em yu no ken lusim na abrusim ol dispela senis o hevi we i kamap long yu na no ken lusim wok bilong yu.

### Toksava bilong man i raitim dispela ripot

Long raitim dispela ripot, i gat 10-pela rot bilong wok wantaim stres. (The essential skills for managing stress at work in the 1990's) by Robert B. Burns (Business and Professional Publishing). Husat i laik lainim moa na save long dispela samting, dispela buk em inap helpim yu gut.



CATHOLIC BISHOPS CONFERENCE  
OF  
PAPUA NEW GUINEA & SOLOMONS ISLANDS

Plenti ol pipel long Bogenvil ol i stap wantaim draipela poret.

Pen na wari bilong ol i narekain olgeta.

Mipela ol Katolik Bisop bilong Papua Niu Gini na Solomon Ailan, mipela i sori tru.

Long dispela taim gan i winim gen kliapela tingtingk long Bogenvil.

Mipela i askim ol lain BRA:  
" Plis, pinisim dispela pait!"  
Mipela i askim ol sekuriti- fos:  
" plis, yupela i no ken mekim save ol pipel nabaut nabaut."

Mipela i askim yupela olgeta:  
" Plis, yupela i mas i painim gutpela rot long pinisim dispela krais na kamapim gutpela sindaun."



Sindaun na toktok, diskas na trast, dispela tasol i ken bringim gutpela sindaun i ken i stap oltaim.


Mipela i stap sori na mipela i laik autim tok-sori bilong mipela long famili bilong ol husat i bin dai long dispela pait nau tasol. Ol sekuriti- fos na ol polis ol i mekim wok bilong lukautim ol pipel na sampela bilong ol i bin lusim laik bilong ol na sampela lain i kisim bagarap.

Mipela i wari long ol pipel i stap wantaim draipela poret gen na taim nogut tru i painim ol gen.


Mipela i tokim ol papamama: "Hop na Pre".

Yumi pre,  
bai strong bilong Kraist i kirap bek,  
i ken helpim ol husat  
i stap insait long dispela krais,  
bai ol i ken painim wanpela rot,  
we blut i no kapsait, na bai i kamap  
long hamamas na gutpela sindaun.





• Antap: Tupela meri Japan i amamasim Japan de long ai bilong ol meri bilong narapela kantri long Mosbi. Piksa i soim ol i dring ti istap . . . Lep: Tupela pikinini Pakistan i amamasim bikpela de bilong Sen josep Intenesenel skul las wik taim ol i makim kantri bilong ol, we ol i apim fleg bilong ol . . . Bilo: Ol manmeri bilong Mosbi husat i bin go long wanpela semina, dipatmen bilong jastis i bin kamapim long skelim gen bikpela mama lo bilong kantri na lukluk long nupela gavman rifom na hau dispela mama lo i bai go wantaim rifom. Dispela tri-de semina i bringim planti manmeri bilong gavman na bisman long harim toktok bilong papa bilong dispela bikpela mama lo bilong kantri.



• Dispela em i wanpela drama o pilai we soim teksu draiva long lephan Ivan Jones i helpim pasindia Gordon Pambangi i go insait long kar. Kaiwosi tieta grup bilong Mosbi i bin kamap dispela drama long wanpela woksop, turisim autoriti i bin kamapim.

• Ol wokman bilong Moden Histori dipatmen bilong Nesenel Miusium na at galeri insait long Mosbi i putim gut ol hap ain bilong balua bilong wanpela general bilong Japan, Yamamoto long taim Wol woa 2.



## Olpela memba bilong 'Las Bet Ben' senisim laip

### SAPE METTA i raitim

LAIP namel long planti yangpela manmeri bilong tude i no kamap o luk gut. Bikos planti long ol i wok long kamapim kainkain pasin nogut.

Dispela em ol kain pasin nogut olsem spak na pait nabaut, smokim drag o mariwana (drug abuse), pamuk na mekim planti stil pasin nabaut.

Na taim ol i wok long i go hevi moa insait long ol dispela kain pasin nogut, planti bilong ol dispela yangpela ya i wok long bungim planti kainkain hevi long bodi bilong ol.

Ol i painim sik nogut (AIDS), kamap longlong, brukim bun nabaut, i go long kalabus. Planti bilong ol dispela yangpela i dai pinis. Na sampela i sik na stap nanu long haus sik.

Olsem wanem, i gat rot o i gat sampela kain we i stap long yumi i ken stapim ol dispela rabis pasin nabaut o nogat? Ating i luk olsem i gat we long yumi i ken traim het long stapim sapos yumi ken kamapim planti aweanes kempen.

Na wanpela long ol dispela kempen em long toktok long ol yangpela man na meri long tanim bel, lusim ol rabis pasin na bihainim gutpela kristen pasin.

Mi yet i save long sampela bilong ol dispela yangpela man antap long hailans, na tu insait long siti bilong Mosbi husat i stap insait long dispela pasin nogut.

Na i bin traim long lusim ol dispela pasin, tasol i hat tru. Bikos ol i pas tru long ol dispela pasin.

Tasol wanpela long ol dispela yangpela man em Gabriel Liri. Em i save stap long ples Gabi klostu long Hanuabada long Mosbi siti.

Laip bilong em long planti yia i go pinis i bagarap tru.

Em i save dring, spak na pait nabaut. Na taim em i raun insait long ol stua, em i save stilim ol samting.

Na long smokim spak brus o mariwana, em i pas tru. Na i save mekim dispela pasin long 7-pela de long wanpela wik.

Gabriel tu i bin wanpela man husat i bin lida long wanpela lokel rok ben we ol i kolim 'Last Bet Ben'. Ben ya i bin katim tupela kaset pinis wantaim Chin H Meen Studio.

Namba wan kaset em 'Las Bet Kampani' na namba tu kaset em 'Ai Tasol'. Em i save pilaim gita bilong dispela ben.

Gabriel i save mekim ol dispela kainkain pasin i go na long Epril las yia (1995) long Ista Wiken, wanpela yut grup bilong Elavala na Hanuabada i bin i go long Gemo ailan hapsait tasol long Mosbi bris. Na holim wanpela Ista kem miting.

Gabriel i bin kamap wantaim tingting bilong kamap long dispela kem miting. Taim em i kamap



□ Gabriel Liri i go pas long paitim gita na singsing, na bungim ol yangpela manmeri bilong Gabi/Lese Kavora Yut Felosip grup, we em yet i bin go pas logn statim.



□ Gabriel (sanap long raithan long haksait lain) wantaim ol memba bilong Gabi/Lese Kavora Yut Felosip grup, husat i gat planti memba nau.

**'Gabriel i tokaut long famili bilong em olsem sapos God i laik tekova long laip bilong em na laikim em long mekim wok bilong em (God), em i amamas tasol long kisim dispela salens.'**

long dispela kem miting, sampela kain samting i kamap long en.

Em i tok spirit bilong God i tasim bel bilong em. Na bihain long dispela ekspiens o samting i kamap long em, em i pasim tingting olgeta long noken i go

bek na holim na mekim ol rabis pasin we em i save mekim bipo.

Taim kem miting i pinis, em i go bek long haus bilong em long ples Gabi.

Na tokaut long ol famili memba bilong em long wanem samting i

bin kamap long em long Gemo ailan.

Gabriel i tokaut long famili bilong em olsem sapos God i laik tekova long laip bilong em na laikim em long mekim wok bilong em (God), em i amamas tasol

long kisim dispela salens.

Sampela de i go pinis na Gabriel i stat long i go long wanwan haus insait long ples Gabi. Na autim long ol manmeri na pikinini wanem samting i bin kamap long em long Ista kem miting.

Sampela taim long apinun, em i save kisim gita bilong em na kam aut arere long haus bilong em. Na pilaim gita na singim ol gospel singsing.

Em i save mekim olsem na pulim ol pikinini i go. Na ol i save bungim maus wantaim na singsing.

Bihain long wanpela wik taim Gabriel i lukim olsem planti yangpela manmeri i soim laik, em i kamap wantaim tingting bilong kamapim yut program.

Dispela em i namba wan taim bilong ples Gabi long i gat wanpela yut program bihain long planti yia.

Nau yet dispela yut grup we klostu i laik winim wanpela kristen bilong em i gat planti memba, we ol i kolim Gabi/Lese Kavora Yut Felosip.

Dispela bikpela grup ol i brukim i go long 4-pela liklik grup na tilim wanwan wok bilong ol. Wok bilong namba wan grup em long divosen, namba tu grup em long edukesen, namba tri grup em long long sevis, na namba 4 grup em long rekriesen.

Ol i save holim felosip long olgeta Trinde nait long ples Gabi yet. Ol memba bilong dispela yut i kam yet long Katolik na Yunaited sios.

Gabriel em i wanpela yut lida bilong dispela grup. Na long sait bilong Sande sevis, em i wanpela sande skul tisa. Na tu em i Rilijis Instraksen tisa we em i save kamap long Hagara Komyuniti skul, na Badihagwa Hai skul long skulim ol studen long hap.

Wantok i askim Gabriel olsem nau yu tanim bel na kamap Kristen, na yu senisim laipstail bilong yu, nayu lukluk bek long olpela laip bilong yu - yu ting olsem wanem?

Gabriel i bekim olsem lukluk bek long laip bilong bipo em i no gutpela liklik. Laipstail bilong bipo i save kamapim planti hevi na wari. Na sindaun bilong ol man na meri insait long komyuniti i no isi. Bikos planti bikhet pasin i save daunim tru ol gutpela pasin na gutpela sindaun.

Gabriel i tok taim em i lusim ol pasin nogut, em i lusim ol gutpela pren o poro bilong em tu wantaim. Na taim em i save lukim ol, em i save pilim sore long ol. Long wanem ol i pas yet wantaim ol rabis pasin.

Em i laikim olsem ol tu i mas lusim ol dispela rabis pasin, tanim bel na kamap Kristen manmeri. Na ol i ken lukim gutpela laip.

Gabriel i tok Kristen laip tu i no isi. Tasol kristen laip i moa gutpela long laip bilong olgeta pasin nogut.





**NEM:** Robin Sipi  
**KRISMAS:** 19 (man)  
**ADRES:** PO Box 285, Waigani, NCD.  
**LAIKIM:** Go long lotu na serim toktok long arapela. Mi laikim penpren long ol kristen brata na susa.

**NEM:** Paul Ari  
**KRISMAS:** 24 (man)  
**ADRES:** Department of Works, PO Box 82, Bialla, WNB  
**LAIKIM:** Pulim pis, lukim piksa, harim musik na pilai spot.

**NEM:** Nancy Sam  
**KRISMAS:** 21 (meri)  
**ADRES:** Wayalas Brothers, PO Box 134, Wabag, Enga provins  
**LAIKIM:** Wokim bilum, harim musik, go lotu na raitim leta.

**NEM:** Jenny Pendakuni  
**KRISMAS:** 19 (meri)  
**ADRES:** Wayalas Brothers, PO Box 134, Wabag, Enga provins.  
**LAIKIM:** Kukim kaikai, wasim kolos, harim musik na raitim pas.

**NEM:** Adox Sali  
**KRISMAS:** 18 (man)  
**ADRES:** Ufe Baptist Church, PO Box 477, Kimbe, WNB  
**LAIKIM:** Go long lotu na painim kristen meri.

**NEM:** Lobson Inowa  
**KRISMAS:** 18 (man)  
**ADRES:** c/ Laino Wadisen, Dassi Camp, PO Box 300, MAF Vanimo  
**LAIKIM:** Pilai soka, Basketbal, lukim vidio na waswas long solwara.

**NEM:** Jacob Londe (18 man), Christina Sande (20 meri), Waki Korowa (15 meri), Sent John (21 meri), Miriam Ongi (19 meri), Meli Kuri (14 meri), Roslin Joseph (21 meri), Silla Mokai (13 meri), Rejal Mindia (20 meri), Ketty Kewa (12 meri), Ranu Ketpa (13 meri), Serah Deni (22 meri), John Raki (21 man), Jacob Makop (20 man), Daniel Tamai (22 man), Roger Pita (18 man) na Joseph Rummit (22 man).  
**ADRES:** Mt Kamund CRC, PO Box 1757, Mt Hagen, Westen Hailans provins.

**NEM:** Dorish Mokho  
**KRISMAS:** 15 (meri)  
**ADRES:** Siassoya Primary School, PO Box 682, Wewak, E.S.P.  
**LAIKIM:** Pilai basketbal, ritimbuk, go long lotu, tok pilai wantaim ol pren na harim musik.

**NEM:** Nas Puio Kunolu  
**KRISMAS:** 17 (man)  
**ADRES:** Wabag High School, PO Box 423, Wabag, Enga province  
**LAIKIM:** Pilai volibal, soka na ridim buk.

**NEM:** Sandra Penao  
**KRISMAS:** 17 (meri)  
**ADRES:** Wabag High School, PO Box 423, Wabag, Enga province.  
**LAIKIM:** Ritim buk, pilai basketbal na lukim piksa long TV.

**NEM:** Margeret Kuriam Esokali  
**KRISMAS:** 17 (meri)  
**ADRES:** Wabag High School, PO Box 423, Wabag, Enga province.  
**LAIKIM:** Pilai basketbal, volibal, ritim buk na luim TV.

**NEM:** Kofi Adarkwah  
**KRISMAS:** 26 (man)  
**ADRES:** PO Box 421, Saltpond, Ghana  
**LAIKIM:** Raun, harim musik, ritim buk na pilai spot.

**NEM:** Nana Oppong  
**KRISMAS:** 25 (meri)  
**ADRES:** Mobil Service Station, PO Box 95, Mankessim, Ghana  
**LAIKIM:** Laikim ol manmeri Papua Niugini long kamap penpren bilong em.

**NEM:** Justina Eva Dansowa  
**KRISMAS:** 23 (meri)  
**ADRES:** PO Box 607 Sky 6, Agona Swedru, Ghana, West Africa.  
**LAIKIM:** Mi wanpela smatpela meri bilong Ghana na mi save trenim ol yangpela meri na ol mama long pasin bilong toktok wantaim man, slip wantaim man o mekim pren. Mi laik rait long ol manmeri husat i gat strongpela tingting na ol i mas toktok stret.

# Ol Nondi pipel bilong Sauten Hailans provins soim gutpela piksa bilong PNG long bihainim

**MICHAEL MONDA**  
i raitim

PLANTI taim yumi save harim long redio na ritim tu long ol niuspepa olsem ol memba long Palamen i no wok gut long bringim sevis i go insait long wanwan ilektoret bilong ol. Dispela kain tingting na toktok em i tru.

Tasol yumi yet ol manmeri long ples tu i no save skelim tingting bilong yumi yet gut. Na bihain save sutim toktok nating i go long ol bikman bilong yumi yet we yumi yet save makim ol long makim mipela long Palamen.

Long kirapim ol wanwan ples na bilong karim ol sevis i go insait long ol ples kanaka, i gat ol man we gavman i makim long en i stap long mekim dispela kain wok. I no dispela tasol i gat tu ol kainkain sevis we gavman save givim long en tu i stap. Sampela sevis na developmen i bikpela tumas we ol memba yet save paitim toktok long wokim. Na sampela em ol liklik tumas we ol man gavman i save makim long en i save wokim. Na wok bilong gavman em long givim mani tasol.

Planti taim mipela ol manmeri long ples yet i paul long ol sevis. Na save poinim pinga i go long gavman na long ol memba bilong yumi. Nau yet yumi lukim stori na pasin bilong wanpela lain man, husai i save kolim ol yet Kowangil-Lapiki.

Nondi em i wanpela ples insait long Yalibu distrik bilong Sauten Hailans provins. Dispela liklik ples i no bin kisim wanpela liklik sevis tru i go insait long ples stret bilong ol.

Ol bin kisim pinis kain sevis olsem komyniti skul no klinik. Tasol nau ol lain long hap ples i amamas nogut tru.



• Long lephan i go long rait em Peandi, Liwa na Pita. Dispela tripela man i go pas long putim bikpela pawa pos igo long hapsait bilong wara Lako. Nau ol i wet tasol long wokim ol waia basket.

Long wanem rot bai go insait long ples singsing bilong ol. Na tu gavman i givim sampela mani pinis long wokim bris long wanpela bikpela wara we ol i kolim Wara Laks.

Gavman i no sori nating long ol lain na givim mani long wokim bris. Nogat. Ol asples pipel bilong Nondi yet i soim gavman olsem ol i redi long kisim gavman sevis.

Long wanem ol man long hap yet i givim planti fri taim bilong ol yet long wokim rot stat long bikrot bilong Okuk Haiwe i go insait long ples bilong ol.

Ol i no bin askim gavman long baim ol. Na tu ol i no askim ol bikman o ol nupela kendidet bai resis long 1997 nesenel ileksen.

Ol i mekim wok olsem komyniti wok tasol wantaim nogat pe.

Kain bikman bilong Sauten Hailans provins olsem Robert Pasu na Philip Moiya i lukim olsem ol lain Nondi i gat bikpela laik long kisim rot i go insait long ples bilong ol. Olsem na ol i hatwok stret na askim ol bikman bilong gavman insait long provins long givim K6,000 long wokim nupela bris long dispela nupela rot we ol yet i wokim long en.

Ol asples pipel yet i brukim dispela K6,000. Na baim pinis 5-pela bikpela pawa pos we i kos samting olsem K2,000. Ol arapela hap mani bilong dispela K6,000 em ol i yusim pinis long baim trenspot, ol palang na nil wantaim ol waia bilong wokim

ston basket long putim 5-pela pos i go long hapsait bilong wara. Long narapela plen bilong ol, ol i tingting long moa helpim.

Long nau yet ol i tingting long askim ol provinsal na nesenel memba long helpim ol. Bikos ol i laik putim wasan long nupela rot ol yet i wokim long en.

Long dispela hap wok, tupela komyniti lida, Peandi na Nema i go pas long bungim ol pipel. Na tupela i tingting moa long askim ol pikinini bilong Nondi husat i wok nabaut insait long Papua Niugini long bungim mani na kisim pawa i go insait long ples singsing bilong ol.

Long wanem rot i go insait pinis. Na taim ol i wokim bris pinis, ka inap go insait olgeta long ples singsing bilong ol.

# Asua bilong mipela yet na mipela bai komplem tumora

**MARLENE ALMAN**  
i raitim

EM NAU, arapela yia em 1997. Em yia Pupua Niugini bai holim wanpela arapela nesenel jenerel ileksen. Ol pipel bai aninit long demokratik rait bilong ol bai makim ol man long makim ol long nesenel palamen. Nesenel palamen em hetkwata bilong demokratik gavman sistem insait long kantri.

Bikos long yia 1997 i no stap longwe tumas, planti pipel i wok long toktok long dispela bikpela samting we bai kamap long 1997. Planti i tok ol bai lukuk na glasim gut ol man i resis long ileksen na votim ol. Sampela i tok ol bai i no inap harim toktok bilong ol kendidet taim ol i karim aut kempen wok bilong ol long winim tingting na laik bilong ol pipel long givim vot i go long ol. Na ol arapela i tok olsem ol bai i no inap votim wanpela man. Yu save em Papua Niugini ya, wanwan man o meri i gat toktok bilong em yet long dispela 1997 jenerel ileksen. Sapos yu askim wanpela lapun man long ples, em bai givim yu tingting na toktok bilong em yet. Sapos yu askim wanpela wokman long taun, dispela man bai i gat tok pisin o Inglis bilong em yet long ileksen.

Long sait bilong ol politisen we long nau yet ol i stap olsem ol memba long nesenel palamen, i luk olsem olgeta i stat pinis long mekim kempen long wanwan ilektoret bilong ol long pulim sapat na tingting bilong ol pipel i go long sait bilong ol. Ating planti i stat long mekim dispela samting long yia i go pinis. Bikos ol i save olsem ol i

save olsem las minit kempen bai no inap bringim ol i go bek long nesenel palamen.

Ol sapota, famili na wanpisin bilong ol politisen tu i wok long helpim ol long karim aut kempen bilong ol. Ol i wok long putim kamap kainkain gris toktok long grisim ol arapela pipel long tromoi vot long politisen we ol sapotim o i bilong ples bilong ol. Sampela pipel i wok long kempen long kendidet bilong politikel pati we ol i memba o sapotim.

Long wanwan ilektoret insait long wanwan provins, kainkain samting i stat long kamap pinis aninit long tingting bilong resis na win long 1997 jenerel ileksen. Kainkain gris toktok we i pulap long suga na loli bai kamap. Ol kendidet bai tromoi mani olsem ol lip bilong diwai i mau na pundaun long taim bilong win. Ol kendidet bai egensim wanpela na arapela. Ol politikel pati bai tokaut long ol astingting bilong ol. Wanwan kendidet bai tokaut long ol samting em bai mekim sapos em i win long ileksen. Ol pipel bai givim wari bilong ol. Papua Niugini em i kantri bilong mipela. Olsem na mipela i no nupela long ol samting na pasin we i save kamap long taim bilong ileksen.

Moa long planti taim, mipela ol pipel i save tok olsem ol politisen i save grisim mipela long ol switpela toktok bilong ol na taim

mipela i votim ol na ol i go long Haus Tambaran (nesenel palamen), ol i no save tanim bek na givim luksave long mipela. Ol i save i go na go insait long Haus Tambaran na stap insait olgeta ol i save lusim tingting long ples bilong ol na ol lain husat i givim ol tokorait long wokabaut i go insait long Haus Tambaran. Ol i save lusim tingting olsem Haus Tambaran i bilong ol pipel. Mipela ol pipel i salim ol i go insait long Haus Tambaran long kisim namba na kamap man. Na bihain i mas lusim Haus Tambaran na kam ausait na givim tenkyu i go long mipela ol pipel.

Tasol mipela ol pipel i mas sindaun na skelim ol toktok bilong mipela gut. Mipela i noken egensim ol memba o tok olsem ol i no bringim gutpela developmen na sevis long eria bilong mipela. Mipela i noken tok olsem ol lida i sindaun long gutpela opis, ron long gutpela ka, kaikai gutpela kaikai na slip long gutpela haus. Olsem ol lida, ol i gat rait long mekim o i gat ol dispela samting. Wanem kain developmen na sevis mipela i wok long toktok long en. Sapos mipela i laikim gutpela developmen, orait mipela i mas wokbung wantaim ol memba o lida bilong mipela. Mipela i mas mekim samting olsem ol wok long soim ol memba olsem mipela i laikim developmen na sevis. Mipela i noken sindaun tasol toktok long developmen na sevis i kam insait long eria bilong mipela. Developmen na sevis i nogat lek

long wokabaut i kam kamap long mipela. Developmen i nogat han long mekim wok. Mipela i noken larim dispela hap tok bilong waitman i paulim mipela. Mipela yet i mas kamapim developmen. Developmen i save kamap long hatwok bilong man. Wankain olsem sapos mipela laik kaikai pis, mipela i mas pul long kanu i go aut long solwara na tromoi pislain i go insait long solwara long kisim pis. Sapos wanpela man i toktok long kaikai pik, em i mas go long bus na painim na kilim. Pik bai no inap lusim ples hait bilong en long bus na i go kamap long dispela man long ples. Long sait bilong mipela i save egensim o tok olsem ol memba i no save lukiuk long mipela taim ol i go long palamen, mipela i mas askim mipela yet dispela askim: Husat i salim ol i go long palamen?

Mipela i noken komplem. Bikos mipela yet i salim ol i go. Ol i no go insait long palamen long laik bilong ol. Nogat. Mipela i givim ol tokorait na ol i go insait long palamen. Olsem na sapos ol lida i no helpim mipela, orait em i taim nau mipela i mas skelim na glasim long luksave husat i gutpela na trupela lida. Mipela i mas lusim pasin bilong wantok sistem-pasin bilong sapotim na votim ankol, papa, anti, bubu, tambu, poroman na kandre. Sapos mipela i laikim gutpela na trupela developmen na sevis, em i taim nau mipela i mas luksave long ol lida na givim votim bihainim tingting na laik mipela i gat long kisim developmen.





□ Kanage em i wanpela garas pundaun mangi bilong Samarai long Milen Be provins. Em i maritim wanpela pukpuk meri bilong Sepik.

Olgeta de, Kanage save pinisim liklik wan siling bilong em long baim smel sop na grille marasin long dispela meri Sepik. Meri Sepik putim ol dispela marasin i go tasol grille i stap yet long skin bilong em. Long wanem meri ya i gat strongpela grille bilong ol tumbuna stret.

Mekim i go na olgeta bilak peni bilong Kanage i pinis.

Kanage belhat na salim pukpuk meri long 2 kina wan 40 long Nuigo maket, Wewak.

Jojo Pindo  
WEWAK

■ Kanage em patrol opisa bilong wanpela wanpela bois skaut grup long Kantri Sait. Wanpela de ol i laik patrol long bus i go kamap long taun. Namba wan nait ol i kaikai na slip long bus. Long moning ol i kirap na laik wok-abaut. tasol man, Kanage kisim taim stret long bel bilong em.

Ol i kamap arere long wanpela bikpela wara. Kanage kisim taim stret long pekpek wara. Kwiktaim em tokim ol bois bilong em olsem: Yupela wetim mi liklik long hia pastaim. Papa laik lusim mama na ol pikinini na go olsem. Na ol pikinini na mama komplek na krai. Olsem na mi go stretim wari bilong ol pastaim.

Kanage tok olsem pinis na tekov long bus. Ol bois i paul nabaut na wanpela i askim: Wanem famili? Mipela i no kam wantaim wanpela famili? I no longtaim, Kanage ron as nating i kam ausait long bus. Olgeta kirap nogut long lukim kanage ron i go long as bilong wanpela diwai. Na wok long rabim as i stap.

I no longtaim liklik, em kamautim na ron go kalap long wara. Na wok long kisim wesana na sikirapim as bilong em i stap.

Ol bois ting olsem Kanage i mas longlong. Samting tru em Kanage i go pekpek (rausim famili). Em pekpek pinis na i no save olsem em kisim bikpela lip bilong solat diwai na rabim long as. Olsem na salat mekim as i sigirap na em kisim taim stret.

Long nait, Kanage tokim ol bois i boilim hot wara. Na rabim long as bilong em.

David D. Koi  
WEWAK

□ Kanage i bilong ples Dawage long Kundiawa. Long 1993 em bin go lukluk raun long Angoram wantaim wanwok bilong em, Siriki Bot bilong ples Kambaramba.

Taim PMV bas Namba 24 bilong John Mongo i stap long Angoram maket, Kanage supim het i go ausait long windo bilong bas. Arere long rot ol yangpela meri Megendo i salim pis i stap. Kanage lukim ol meri Sepik na gras long skin bilong em i sanap. Kwiktaim em tromoi Tok Pisin bilong em i go long ol meri ya: Hei ol Mama! Gutde tru! Mi ya, Kanage! King bilong Hailans Okuk Haiwe. Mi kam raun long baim ol meri long wan kina wan kina long san, na tu kina tu kina long nait. Na wok long moning na belo bek. Bai king bilong Kundiawa yet bai skelim kago. Taim ol mama i harim olsem, ol i bel-hevi tru. Bikos kain strongpela Tok Pisin i bagarapim stret sindaun bilong ol. Mekim na sampela mama i pilim pekpek wara na i no sindaun gut. Ol i kalap long kanu isi tasol na pul i go bek long ples. Taim ol pul i go, wanpela yangpela meri singaut i go bek long Kanage: Kisim strong bilong papa bilong yu na kam. Yu ting mi K2 na K1 bilong yu. Yu save meri Sepik em dia tumas ya.

Kanage daunim spet tasol na singaut i go bek: Em i orait, win bilong yu!

Jojo Pindo  
WEWAK

LUKIM MOA KANAGE LONG PES 21.

# Wok bilong lukautim bebi em hat tru ya

Long Papua Niugini na ol arapela Melanesian kantri, wantaim planti kantri tu long wol, ol man save lusim dispela wok long ol meri. Na trangu ol meri save hatwok long lukautim nupela bebi bilong famili i go inap ol i bikpela.

Taim mama i karim bebi nupela, bebi bai slip planti taim. Na bai krai tasol long susu. Taim mama i givim susu pinis na bebi i pulap, em bai slip gen.

Tasol em i winim 6-pela mun pinis, em bai stat long krai planti taim sapos em i pekpek, pispis, hot, hangre o pilim sik. Dispela em taim nau wok bilong mama i mekim moa wok.

Bikpela mekimsave em taim bebi i winim 6-pela krismas na i sik. Long ol nupela mama na papa, em bai hat long painimaut olsem bebi i gat wanem kain sik.

Ol kain sik olsem pekpek wara, skin i hot, kus em mama i ken lukim na save. Tasol sampela kain sik bilong insait long bodi olsem het i pen o bel i pen, em bai hat tru long mama i luksave.

Dorothy Weku em i wanpela yangpela mama bilong Gall provins. Wantok i bungim em long nait taim em i kisim bebi bilong em i go long imejensi seksen bilong Mosbi haus sik. Dorothy i tok em wanpela i save lukautim bebi boi bilo Dorothy wantaim bebi save stap long Sabama setelmen long Mosbi siti.


Em i tok bebi bilong em i gat 7-pela mun tasol. Na save kisim strongpela sik malaria.

Em i tok taim em i yangpela meri, em lukim hatwok ol mama save bungim long karim na lukautim bebi. Na em i save tingting olsem watpo na em i no laik man, bai em i no inap mekim ol kain wok long bihain taim.

"Wantaim taim mi ting olsem, bai mi kamap Katolik sista, na noken marit. Na bai mi no inap hatwok long lukautim ol bebi," Dorothy i lap wantaim na toktok bihain long bebi i kisim sut na em kam aut long haus sik.

Tasol em kalap nogut taim em i painimaut olsem em i lusim sik mun bilong em, bihain long em i prenim boipren bilong em.

"Sampela prenmeri na famili bilong mi i tokim mi long kisim marasin na rausim dispela bebi. Bikos mi gat 16 krismas tasol taim mi bel. Tasol mi tingim bilip long sios bilong mi, olsem na mi karim na



□ Mama ya wantaim tupela twins. Sore em i hatwok moa long lukautim tupela bebi ya.

nau lukautim dispela bebi," Dorothy i tok.

Dorothy i tok maski boipren i lusim em taim em i bel, bikos boipren em i maritman, em i tok bebi em "presen i kam long God Papa", na mi lavim dispela bebi bilong mi, husat bai lukautim mi long bihain taim."

Dorothy i tok wok bilong mama i hatwok tru long lukautim bebi. Tasol em save pasim tingting na wokim. Bikos dispela em "wok bilong graun God papa i makim mipela ol meri long wokim," em i tok.

## Hatwok bilong nait

Taim papa wantaim ol arapela famili memba i slip gut long nait, mama i no save slip. Wanpela susu em bebi i pulim. Olsem na mama bai slip long wanpela sait tasol. Sapos wanpela sait i pen, bai em tanim long hapsait, na givim susu bilong hapsait gen na slip.

Ol bebi save pekpek planti taim tu long nait. Trangu mama bai kirap na hatwok long klinim pekpek bilong ol. Bihain bai givim susu gen long bebi na slip.

Planti taim sapos mama i tait tru na slip indai stret, em bai no inap save olsem bebi i pekpek i pispis. Olsem na trangu em bai slip wantaim smel bilong pekpek na pispis bilong bebi.

Susan Soya i bilong Wewak long Is Sepik provins. Long las mun, Mas 1996 em i kamap long Mosbi long stap wantaim wanpela wan pikinini man bilong em, husat i wok na stap long Mosbi siti.

Susan i gat moa long 45 krismas. Na em i gat 12-pela pikinini olgeta. Long dispela 12-pela pikinini, 7-pela em ol pikinini man. Na 5-pela em ol pikinini meri.

Tupela pikinini man bilong em i dai taim tupela i no winim wanpela yia yet, bikos long sampela kain sik bilong bodi.

Susa i tok ol meri bilong bipo em ol i gat moa strong long lukautim bebi. "Tru ol meri bilong tude i gat moa save long givim stret-pela kaikai bilong bebi i kamap gut, tasol mi ken tok ol save les long wok. Lukim ol tambu meri bilong mi, ol slek lain tu ya," em i tok.

Susan tok olsem bikos em ting em kam long malolo long siti. Tasol em lukautim nau ol tumbuna bilong em taim pikinini man wantaim meri i go wok.

Susan i tok long ekspiriens bilong em olsem bikos ol bebi i stap klostu long ol mama, ol i gat moa lav o pasin bilong laikim moa mama bilong ol long ol papa.

"Lukim ol pikinini bilong mi, olgeta i kisim

bikpela save na wok long kainkain hap bilong Papua Niugini. Ol save baim balus tiket bilong mi tasol i kam long Mosbi. Trangu papa bilong ol nogat, ... larim em i stap katim saksak long ples."

## Ol wok mama

Long planti mama husat i wok mani, ol save kisim wokmeri long lukautim bebi long haus taim ol i wok. Dispela ol wok meri em long Tok Inglis ol i kolim "baby sitter".

Ol dispela wokmeri save hatwok tu long lukautim bebi olsem ol yet i karim. Em i no isi wok tu long ol. Tasol em i olsem wokmani bilong ol.

Tasol i gat wanpela asua long dispela. Ol dispela kain wokmeri i no save lukautim bebi wantaim wantaim lav na laik em mama tru i ken givim.

Olsem na planti taim bebi bai karim oltaim.

Lucy Temu i bilong Sentrel provins, na i marit long Morobe. Em i tok em ave bungim dispela kain hevi long wokmeri bilong em.

Em i tok taim em stap long wok, em save tingting planti long bebi bilong em. Bikos em i no save sapos wokmeri i lukautim tu bebi o nogat.

"Yu save em ol nara-pela meri ya. Olsem na taim bebi i bikhet long

ol, mipela i no inap save sapos ol i paitim bebi o lukautim gut."

Lucy tok em save tokim sampela lain i stap klostu long haus long putim ai na lukim wokmeri i lukautim gut bebi o nogat. Na painimaut olsem wokmeri save mekim gutpela wok stret.

"Tasol long apinun taim mi go bek long haus, mi save hatwok stret long nait. Planti taim mi no save slip gut long nait. Olsem na long opis, mi save pilim olsem ai bilong mi laik slip. Tasol mi save tromoi wanpela o tupela buai long maus na stat wok gen," em i tok.

Tupela yangpela skulmeri i tokim Wantok olsem "em tru ya, wok bilong lukautim bebi em hat ya."

Tupela i sem long autim tingting bilong tupela long bihain taim. Tupela i tok tasol olsem "em wok bilong olgeta meri long dispela graun".

Tasol wanpela yangpela meri Daru, Stella Wilson, husat i skul long Tokarara Hai skul long Mosbi i tok "ol man tu mas helpim ol mama long lukautim bebi. Em i no wok bilong ol mama tasol."

Em i tok moa olsem ol man ting olsem em wok bilong ol meri we ol i rong: "Ol ting ol kamapim tasol na em inap, nogat sem bilong ol," em i tok.

## Planti man save helpim mama

Tasol planti man save helpim meri bilong ol long rausim pekpek, wasim na givim kaikai long bebi.

John Sarufa i bilong Kerema long Galp provins. Em i tok long planti hap bilong Papua Niugini, ol mama tasol save mekim wok. Tasol nau skul na save i kam, na ol man i luksave nau olsem em i no wok bilong ol meri tasol.

"Tasol wanpela samting mi save wari em, bilong wanem na God papa i no laik wokim susu long mipela ol man tu, bai mipela ken helpim ol meri long givim susu long bebi," em John lap wantaim na pinisim tok olsem.

Bikos meri bilong em, Emma i karim twins na save hatwok stret. Emma i tok bihain long wanpela wik, ol famili i helpim wantaim man bilong em, bihain em kam aut tasol long Mosbi haus sik.

Tasol nau em save sotwin stret.


"Wok bilong lukautim twins i winim olgeta wok bilong dispela graun," Emma i tok.







# SUPREME GUTPELA PRAIS



YU GUTPELA PRAIS!

FOR



# 'Graun em i laip bilong mipela'

BIKPELA kros pait na toktok i kamap tude nau long olgeta hap bilong Papua Niugini long graun.

Long ol provins antap long hailans, olgeta de mipela bai ritim long niuspepa, harim long redio na lukim long EM TV long ol wanpisin i pait long graun.

Long hailans em ol isave pait oltaim long winim graun. Bikpela as bilong dispela em bikos i nogat posin sanguma pasin, we ol pipel i ken yusim long kilim indai birua long winim graun.

Long ol nambis eria bilong kantri, posin sanguma pasin i strong yet. Olsem na nogat planti pait i save kamap. Sapos i gat kros long graun, birua lain bai yusim posin sanguma pasin long kilim narapela.

Ol dispela samting i kamap bikos long Papua Niugini na ol arapela Melanesian kantri olsem Solomon Ailan na Vanuatu, graun em i laip bilong mipela.

Sapos mipela i nogat graun, mipela i no inap stap laip. Mipela nidim graun long sanapim haus, wokim gaden, wokim bisnis antap long en, painim abus, na mekim ol arapela wok long lukautim mipela.


Olsem na i gat as long pait o tok kros long lukautim graun bilong mipela.

i go moa long pes 19



• Bikpela trak ya i kisim timba bihain long masin i katim. Dispela em ol kain projek o bisnis wok we i kamap long graun, na givim mani long kamapim gut sindaun bilong ol papagraun. Tasol kros pait save kamap tu long husat tru bai kisim ol dispela mani na developmen.

**ON SALE EVERY THURSDAY THROUGHOUT THE NATION**



# WANTOK



Established twenty six years ago, **WANTOK**, with local news and sport gathered from across the country, is Papua New Guinea's only Pidgin Newspaper.

WORD/HAUS/JAY'S/96

**PROUDLY PUBLISHED BY WORD PUBLISHING COMPANY PTY. LTD.  
P.O. BOX 1982, BOROKO, NCD, PHONE: 325 2500, FAX: 325 2579.**



# Mandawali kamaut wantaim nupela kaset

## ...Yambunawi em pawa song

WANPELA top musikman bilong Is Sepik provins, Christian Mandawali i kamaut pinis wantaim wanpela stail kaset rekoting bilong em long Pasifik Gol Studio long Mosbi.

Nem bilong dispela nupela kaset bilong em "Kolim em Kajan" i gat planti ol gūpela singsing bilong kirapim filings bilong ol manmeri husat i save laikim Sepik disko musik.

Sapos husat brata o susa i apim botol pinis na i laik sakim sakim skin liklik, orait dispela em i kaset bilong yu stret.

Narapela samting tu olsem dispela kaset tu i gat ol gūpela singsing we i ken mekim ol manmeri i sindaun isi tasol na skelim tingting bilong ol yet.

Dispela musikman bilong Sepik Wara i gat gūpela ol stail singsing bilong em we i save katim lewa bilong ol manmeri husat i save laikim harim ol singsing bilong Gawi kantri.

Namba wan song long sait A, em Yambunawi i gat kik stret na i go wantaim stail bilong ol lain bilong wara Sepik stret. I gat bikpela bilip olsem dispela song bai i kamap strong insait long kantri namel long ol manmeri husat i save laikim stail bilong lokal musik.

Tru olsem dispela singsing em olpela liklik, tasol kain stail Mandawali i putim long en i gat kik stret na planti manmeri bai i laikim tru long harim.

Hap bilong dispela song i go olsem "Yambunawi... wan katen, 12-peks, 6-peks, gol-kap na kumu garas....."

### JAMES KILA i raitim

I gat narapela hap bilong song tu i go olsem "Yambunawi..... polis raunim rasko paitim em long doti wara."

Insait long dispela kaset Mandawali i tingim tu ol pipel bilong em long Sepik Wara we bikpela aiwara i bin bagarapim ples bilong ol. Dispela em long yia 1994. Em i singim wanpela song ol i kolim Voice of Loss long stori long ples bilong em we i bin painim bagarap taim aiwara i kamap.


Bipo long Mandawali i bin rekotim kaset bilong em bagaros i bin mekim sampela gūpela wok taim em i stap long Mosbi long helpim long bungim mani na salim i go long helpim ol pipel long hap bilong em long Sepik wara.

Boi i bin pilai raun long sampela konsert long Mosbi wantaim ol grup olsem Bluffin Soles long helpim long kisim mani long baim ol samting olsem marasin long hepim ol dispela lain i painim bagarap.

Long dispela nupela kaset bilong Mandawali, em yet i go pas long singim olgeta song na bekap wantaim.

Ol narapela musikman husat i halivim em long rekot em Donald Lessy, husat i bin pilai ridem na bes gita na tu i bin pilai kibot. Narapela man husat i helpim em Kabu Rita husat i bin pilai lid gita, bes gita na ridem.

Man i lukautim pairap bilong dram long dispela kaset em John Hakalitz.



• Christian Mandawali.

Planti man long kantri i ken tingim yet dispela namba wan taim Mandawali i bin kamaut wantaim fes kaset bilong em long yia 1989. Dispela dispela taim namba wan kaset bilong em i kukim tru PNG wantaim ol song olsem Sore Lewa, Kikimo Sorone..

Bihain long dispela kaset Mandawali i go bek long Rabaul na i rekotim narapela kaset bilong em. Namba tri kaset

bilong em "Nak N" tu i stap strong yet. Mandawali i bin mekim nem bilong em taim em i stat pilai wantaim ol lain olsem Dua Dua, Raun Isi na Thumbs ben. Taim mangi nogut ya i stap pilai wantaim Thumbs ben ol i bin rekotim wanpela kaset wantaim Pasifik Gol Studio long Rabaul.

Long dispela kaset Mandawali yet i singim song ya Hangasip, we i bin kamap strong tru dispela dispela taim.

Kolim em Kajan

MUSIK

## 'Graun em i laip bilong mipela'

i kam long pes 18

Willaim Jones i bilong Westen Hailans provins. Em i wok na stap nau long Mosbi siti.

Em i tok long las yia, em bin go long ples bikos wan pisin bilong em i pait wantaim narapela wan pisin long graun.

"Lukim mi mas go bek long helpim na pait. Bikos mi wok mani nating long hia. Taim mi pinis long wok, baim i go bek we? Mi bas go bek long ples. Na graun i mas redi na stap," em i toktok strong olsem.

Johanes Rifunangu i bilong haiwe bilong Is Sepik. Mista Rifunangu i wk olsem wanpela kuskus long Waigani gavman opis. Em i wok moa long 20 yia nau.

Em i tok taim papa bilong em i kam stap wantaim em long 1984, em bin traim hat long kisim planti tumbuna stori bilong graun. Bikos em i no laik paul o i no save long stori, na sampela lain bai paulim na stilim graun bilong em na famili bilong em.

Dispela em bikpela samting nau long kantri bilong mipela, PNG. Planti yangpela manmeri i no save gut long stori bilong graun. Em ol wanwan lain long ples i save long stori.

Bikpela hevi tu em ol wanwan lapun manmeri husat i stap laip yet i save long stori tumbuna. Olsem na em i gūpela long ol yangpela i kisim planti stori hariap long ol, bipo ol i dai. Na stori i mas stap na i go long ol yangpela pipel.

Stori em i narapela samting. Narapela bikpela samting em long lukim mak bilong bus graun na wara.

"Yu ken save long stori, tasol yu mas save long mak i go olsem wanem long bus graun na wara. Dispela em i bikpela samting tru. Bikos sapos yu no save long mak, stori bilong yu i ken go wara nating," Mista Rifunangu i tok.

Nau yet planti kros pait, toktok na kot i kamap long graun. Olgeta de bai yu lukim ol papagraun i pulim lain i go antap long haus

kot, lens opis o long plis stesin long toktok bilong graun tasol.

Michael Simogu em wanpela bikman bilong Madang provins, husat i kam raun nau long Mosbi. Em i no kam raun nating. Em i no kam long kot bilong graun bilong em wantaim Katolik misin, husat i bin baim dispela hap graun long bipo yet.

Em i tok ol namba wan lain misinari i bin baim tumbuna bilong em long tamiok, sol, plet sospen, siot trausis na ol kain samting olsem. Na graun em misin i kisim i winim 20 hekta olgeta na planim lain kokonas long en.

Em i tok em i kisim dispela samting i go long kot. Tasol loya bilong misin i strong na winim em long toktok. Olsem na misin i papa yet long dispela graun.

Mista Simogu i tok em pilim olsem ol namba wan misinari i no baim ol tumbuna bilong em gut. Olsem na em i laikim misin long baim em gut. Sapos nogat, em i laik kisim bek graun bilong em:

"Mi gat save nau wantaim ol pikinini bilong mi. Mi ken tok ol waitman long bipo i kam paulim mipela nabaut na kisim graun bilong mipela. Dispela em i 'stilpasin' stret long ai bilong God papa," em i tok.

Stori bilong Simogu i olsem hevi em ol papagraun bilong ples Saure long Wewak, Is Sepik i bin bungim bipo.

Sampela yia i go pinis, ol i bin protes na pasin Kaindi Tisa Koles we i sindaun antap long dispela graun. Orait gavman i bin baim ol K100,000, tokorait long givim sampela kain developmen, na tu givim bek hap graun we koles i no yusim i go bek long papagraun.

Bikpela pret nau em hamas pikinini i save long tumbuna stori na mak bilong bus graun. I luk olsem wanwan pikinin tasol i save. Na dispela i ken kamapim bikpela pait insait long PNG long bihain taim long bus graun tasol.

Gūpela rot bilong helpim stretim dispela em long luksave long stori wantaim mak na rejistaim nau sampela graun.



**Fonde  
Epril 4**

5.30 PROGRAM HIGHLIGHTS  
5.57 TRANSMISSION OPEN  
6.00 ITN NEWS  
6.30 DAYBREAK NEWS  
7.00 TODAY SHOW  
8.00 SESAME STREET  
8.58 EMTV TOKSAVE  
9.00 TRANSMISSION CLOSE  
9.01 PROGRAM HIGHLIGHTS  
1.15 TRANSMISSION RESUME  
1.30 MIDDAY WITH KERRI ANNE  
3.00 SESAME STREET  
4.00 BOOKPLACE  
4.30 HOT SHOT  
5.00 CRO  
5.28 EMTV TOK SAVE  
5.29 EMTV NEWS BREAK  
5.30 HOME & AWAY  
6.00 NATIONAL EMTV NEWS  
6.30 A CURRENT AFFAIR  
7.00 SALE OF THE CENTURY  
7.28 LOTTO DRAW  
7.30 NEIGHBOURS  
8.00 PEPSI FIZZ  
An hour of local music entertainment and update of musical attractions around town.  
9.00 FISH INTERNATIONAL An A to Z guide to fishing; ultimate locations, mouthwatering dishes; and exotic locations.  
9.30 VIPERS FOOTY SHOW  
10.00 FOOTY SHOW  
10.30 THE EXTRA ORDINARY  
11.30 NATIONAL EMTV NEWS  
12.00 TRANSMISSION CLOSE

**Fraide  
Epril 5**

5.30 PROGRAM HIGHLIGHTS  
5.57 TRANSMISSION OPEN  
6.00 ITN NEWS G  
6.30 DAYBREAK NEWS G  
7.00 TODAY SHOW  
8.00 SESAME STREET G  
8.58 EMTV TOKSAVE  
9.00 TRANSMISSION CLOSE  
9.01 PROGRAM HIGHLIGHTS  
1.15 TRANSMISSION RESUME  
1.30 MIDDAY WITH KERRI ANNE  
3.00 SESAME STREET  
4.00 BOOKPLACE G  
4.30 HOT SHOT  
5.00 CRO  
5.27 EMTV TOK SAVE  
5.29 EMTV NEWS BREAK  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 SALE OF THE CENTURY  
7.28 LOTTO DRAW  
7.30 NEIGHBOURS G  
8.00 MARRIED WITH CHILDREN  
8.30 FRIDAY NIGHT FOOTBALL  
10.30 EMTV TOK SAVE  
10.37 A COUNTRY PRACTISE  
11.37 NATIONAL EMTV NEWS REPLAY  
12.37 TRANSMISSION CLOSE

**Sarere  
Epril 6**

7.00 PROGRAM HIGHLIGHTS G  
7.55 TRANSMISSION OPEN G  
8.00 TODAY ON SATURDAY A new weekend news program hosted by TRACY GRIMSHAW, the live one-hour national program is a hybrid of Channel Nine's top-rating ews shows, "TODAY" and "SUNDAY"  
9.00 TRANSMISSION CLOSE  
9.01 PROGRAMME HIGHLIGHTS  
10.55 TRANSMISSION RESUME  
11.00 RUGBY LEAGUE - COMMON-WEALTH BANK CUP  
12.00 WIDE WORLD OF SPORTS  
4.00 RUGBY LEAGUE  
5.00 BURKE'S BACKYARD  
6.00 NATIONAL EMTV NEWS G  
6.30 HEY HEY IT'S SATURDAY Each week Jo Beth Taylor will join Daryl Somers and the rest of the crazy Hey Hey team. Plucka, John Blackman, Dickie Knee, Molly Meldrum and the resident grouch, Red Symons for two hours of laughs.  
8.30 NCDC NEWS: NCDC news from around the city.  
9.00 WOPA WORLD CHAMPIONSHIP WRESTLING Features World championships wrestling including glittering array of talent such as Ric Flair, Sting, the Nasty Boys, Mean Gene, Okerlund and Bobby "The Brian" Heenan, and the return of Hulk Hogan. G  
10.00 PEGGY SUE GOT MARRIED  
11.30 NATIONAL EMTV NEWS REPLAY  
12.00 TRANSMISSION CLOSE

Note: Programmes are subject to change without notice

**Sande  
Epril 7**

6.00 PROGRAM HIGHLIGHTS  
6.47 TRANSMISSION OPEN  
6.49 CHIT CHAT WITH SIR PAULIAS MATANE  
6.57 EMTV TOKSAVE WITH DORIS BUIYO  
7.00 BUSINESS SUNDAY  
9.00 SUNDAY  
11.00 TBA  
11.30 RACING SHOW  
12.00 THE FOOTY SHOW  
1.00 TBA  
4.00 SPORTS SUNDAY  
6.00 NATIONAL EMTV NEWS  
6.30 SUNDAY NIGHT FOOTBALL - HIGHLIGHTS  
7.30 60 - MINUTES Charles Wooley, Jeff McMullen, Richard Charlton and Tracy Curro present in-depth reports on public affairs program, featuring hardhitting investigative interviews from around the world.  
8.30 SING WITH JOY  
9.00 SHE DEVIL  
11.00 CHIT CHAT WITH SIR PAULIAS MATANE  
11.03 CHURCHES MAGAZINE  
11.30 NATIONAL EMTV NEWS REPLAY  
11.57 MEDITATION  
12.00 TRANSMISSION CLOSE

**Redio**

**NAU FM**  
06.00am Headline News  
Ricki and Nikki  
06.30am French Bake Haus Horoscopes  
06.45am CHM New Local Release  
07.00am News  
07.30am Worthless Information  
07.35am First Investment Finance Ltd. Business Report  
07.40am Coca Cola Breaker  
07.00am News  
08.20am This "Day in History"  
08.40am Birthday calls  
09.00am News  
09.15am Telikom Phone in challenge  
10.00am News  
Eli Webb  
11.00am News  
11.05am Big Rooster Forty Minute Music Marathon  
12 Noon News  
12.15pm CHM New Local Release  
05.00pm News  
More Muzac  
02.00pm News  
02.05pm 3 from 1 at 2: (3 songs from 1 artist at 2 o'clock).  
02.30pm Telikom Phone in challenge  
03.00pm News  
Kanawi Danomira  
04.00pm News  
More Muzac  
05.00pm News  
05.05pm Pepsi Top 5 at 5  
06.00pm News  
More Muzac  
07.00pm News  
H.B. Brew. (The Night Man)  
07.15pm CHM New Local Release  
08.00pm News  
More Muzac  
12 Midnight News  
More Muzac until 6 am  
**KALANG**  
0500 OPENING/PRAYER  
0505 BREAKFAST  
0500 NEWS/WEATHER  
0530 BIRTHDAY CALLS  
0700 NATIONAL NEWS/WEATHER  
0715 SONG & ARTIST COMP  
0730 ON THE SPOT  
0800 NATIONAL NEWS & WEATHER  
0810 BREAKFAST (Continued)  
0900 NEWS & WEATHER  
0903 TALKBACK RADIO  
1000 NEWS & WEATHER  
1003 TALKBACK (continued)  
1100 NEWS & WEATHER  
11.03 TALKBACK  
1200 NEWS & WEATHER  
1203 MUSIC  
1300 NEWS & WEATHER  
1303 MUSIC  
1400 NEWS & WEATHER  
1403 YOUTH OF TODAY  
1500 NEWS & WEATHER  
1503 YOUTH OF TODAY  
1600 NEWS & WEATHER  
1603 DRIVETIME  
1700 NEWS  
1800 NEWS  
1810 GLOBE SPORTS DESK  
1820 TODAY WITH DEREK PRINCE  
1900 NATIONAL NEWS & WEATHER  
1910 PNG SUPERSOUNDS  
1930 LOTTO DRAW  
1933 PNG SUPERSOUNDS  
2000 NATIONAL NEWS  
2003 PNG MUSIC REQUESTS  
2100 NEWS & WEATHER  
2103 LATE NIGHT RADIO  
2200 NEWS & WEATHER  
2203 LATE NIGHT RADIO  
2300 NEWS & WEATHER  
2303 LATE NIGHT RADIO  
2400 CLOSE

**Mande  
Epril 8**

4.00 PROGRAM HIGHLIGHTS  
4.25 TRANSMISSION OPEN  
4.30 BRAZILIAN FORMULA ONE GRAND PRIX  
6.00 ITN NEWS Up to the minute round up of the latest world news sport and business nformation from Britain's respected International Television News service.  
6.30 DAYBREAK NEWS Up to the minute round up of Australia's as well as international news.  
7.00 TODAY SHOW The best in breakfast television presented by ELIZABETH HAYES & STEVE LIEBMAN  
9.00 SESAME-STREET  
10.00 KISIM SAVE  
10.30 TRANSMISSION CLOSE  
10.31 PROGRAM HIGHLIGHTS  
1.15 TRANSMISSION RESUMES  
1.30 MIDDAY WITH KERRI ANNE A pacy one and half hour show, packed with entertainment and information feturing a combination of taped stories and studio guests.  
3.00 KIDS KONE/SESAME STREET  
4.00 RUGBY LEAGUE  
4.30 HOT SHOT  
5.00 SPELLBINDER  
5.28 EMTV TOK SAVE  
5.29 EMTV NEWS BREAK  
5.30 HOME & AWAY  
6.00 NATIONAL EMTV NEWS  
6.30 CURRENT AFFAIR  
7.00 SALE OF THE CENTURY  
7.28 LOTTO DRAW  
7.29 CHIN H MEEN SUPERSOUND NEW RELEASE  
7.30 NEIGHBOURS  
8.00 MIND & BODY  
8.30STREET JUSTICE:  
9.30 WILD LIFE  
10.30 YOUNG DOCTORS  
11.30 NATIONAL EMTV NEWS REPLAY G  
00.00 STATION CLOSE

**Tunde  
Epril 9**

5.30 PROGRAM HIGHLIGHTS  
5.57 TRANSMISSION OPEN  
6.00 ITN NEWS  
6.30 DAYBREAK NEWS  
7.00 TODAY SHOW G  
8.00 SESAME STREET  
9.00 MIND & BODY (repeat)  
9.30 TRANSMISSION CLOSE  
9.31 PROGRAM HIGHLIGHTS  
1.25 TRANSMISSION RESUME  
1.30 MIDDAY WITH KERRI ANNE  
3.00 SESAME STREET  
4.00 BOOKPLACE  
4.30 HOT SHOT  
5.00 SPELLBINDER  
5.28 EMTV TOK SAVE  
5.29 EMTV NEWS BREAK  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 SALE OF THE CENTURY  
7.30 CHIN H MEEN SUPERSOUND NEW RELEASE  
7.33 NEIGHBOURS  
7.55 COLD POWER CASH CALL DRAW  
7.57 EMTV TOKSAVE  
8.00 BORAL GAS HOMEAKER'S SHOW Homemaker's show gives you handy hints on sewing, crafts, health and nutrition as well as product demonstrations from electrical goods to beauty products.  
8.30 BLUE HEELERS Police drama with a difference set in a small country town.  
9.30 EMTV TOK SAVE  
9.33 DR. QUINN MEDICINE WOMAN  
10.30 YOUNG DOCTORS  
11.30 NATIONAL EMTV NEWS REPLAY  
12.00 STATION CLOSE

**Trinde  
Epril 10**

5.30 PROGRAM HIGHLIGHTS  
5.57 TRANSMISSION OPEN  
6.00 ITN NEWS  
6.30 DAYBREAK NEWS  
7.00 TODAY SHOW  
9.00 SESAME STREET  
10.00 KISIM SAVE  
10.30 TRANSMISSION CLOSE  
10.31 PROGRAM HIGHLIGHTS  
12.55 TRANSMISSION RESUME  
1.30 MIDDAY WITH KERRI ANNE  
2.30 BORAL GAS HOMEAKER'S SHOW  
3.00 SESAME STREET  
4.00 BOOKPLACE  
4.30 THEY MUST BE MAD  
5.00 CRO  
5.28 EMTV TOK SAVE  
5.29 EMTV NEWS BREAK  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 SALE OF THE CENTURY  
7.27 CHIN H MEEN SUPERSOUND NEW RELEASE  
7.30 NEIGHBOURS G  
8.00 GOLDEN MEKIM MUSIC  
8.57 PNG GARDNER  
9.00 MOVIE: CHINA O'BRIEN 1  
10.30 A COUNTRY PRACTISE  
11.30 NATIONAL EMTV NEWS  
12.00 TRANSMISSION CLOSE

Note: Programmes are subject to change without notice

**AUSTV**

LIGHT  
12.30 ASIAN FOOTBALL SHOW  
1.30 QUANTUM  
2.00 MOTHER AND SON  
2.27 NEWS UP-DATE  
2.29 AUSTRALIAN MARKET SPOT-LIGHT  
2.30 PAGE - GRADUATE STUDIES  
3.30 CHILDREN'S - MULLIGRABS  
4.00 PLAYSCHOOL  
4.30 SHIP TO SHORE  
5.00 OPEN LEARNING  
5.28 THAI NEWS  
5.29 AUSTRALIAN MARKET SPOT-LIGHT  
5.30 OPEN LEARNING  
5.58 VIETNAMESE NEWS  
6.00 ABC NEWS  
6.30 7.30 REPORT WITH KERRY O'BRIEN  
7.00 AUSTRALIA TV EVENING NEWS  
7.28 MANDARIN NEWS  
7.30 LANDLINE  
8.28 NEWS IN INDONESIA  
8.30 AUSTRALIA TV NIGHTLY NEWS  
8.58 CANTONESE NEWS  
9.00 THE LONG WAY HOME - FILM  
10.30 LATELINE  
11.00 CNBC: INSIDE OPINION  
11.30 MARKET WRAP  
12.30 THE MONEY WHEEL  
3.00 MARKET WRAP (US)  
5.00 TODAY'S BUSINESS  
7.00 FIRST EDITION  
7.30 CNBC ASIA: TODAY'S BUSINESS  
8.00 MONEY WHEEL  
10.59 AUSTRALIAN MARKET SPOT-LIGHT  
11.00 WORLD AT NOON  
11.30 OPEN LEARNING  
12.29 AUSTRALIAN MARKET SPOT-LIGHT  
12.30 NATIONAL PRESS CLUB LUNCHEON





■ Kanage i bilong Sepik tasol i stap na wok long Lae siti. Orait wanpela wiken boi i go long asples long lukim ol lain famili bilong em.

Em i go stap tupela de long ples na long namba tri de, boi i go tromoi ai raun long Wewak taun. Yu save, kain ol boi bilong siti ya. Em i dres ap na stailim em yet na i go raun long Wewak taun.

Em raun i go na les na em i go sanap ausait long Air Niugini opis i stap. Boi sanap i stap na wanpela yangpela supun bilong K-Ave i skul long Kaindi Tisa Koles i wokabaut i kam. Em nau Kanage kirap na tokim dispela yangpela supun bilong K-Ave: Tisa, tisa. Today is a sunny day. Nice time to...you know ah.

Dispela sumatin bilong KTC kirap na askim Kanage: To do what?...yu tokim mi...naispela taim bilong make what?

Kanage lap na tokim meri ya long hapkas tokples Kerema na tok pisin: Se Saki, soa hea lofeare...yu save, safos yu staf long feles, kain fikfela san osem fai yu gat laik long waswas. K-Ave Born, KEREMA

□ Kanage i bilong Wali Kantri long Madang. Wanpela Sarere em i go lukim tupela soka tim bilong ol meri i pilai soka long Madang.

Em i go sindaun na lukim ol pilai bilong dispela tupela i wok long kikim bal nabaut na em i singaut i go long ol: Olosem wanem ya, taraim na pasim desela bal gut na sokorim samfala masta gol na mifala lukim. Em i tok osem pinis na kirap singaut long wanpela yangpela meri bilong Kranget Ailan long em i abrusim bal na klostu arapela tim i skoaim gol long tim bilong em. Meri ya harim Kanage i singaut long em na em i wokabaut i go long sait bilong fil na tokim Kanage: Sapos yu mekim wanpela toktok gen, bai mi kam na kikim bal bilong yu.

Kanage harim dispela hap tok na lap i wilwilim em wansait. Na em i kirap tokim meri Kranget ya osem: Ain o, sapos yu sekelim olosen yu wanpela eks difens orait yu ken taraim. Sapos nogat orait yu noken taraim. Bikos bal bilong manki Wali i olosem soton bilong Wara Gogol we i sitorong moa olosem ain bolong ol Yapan. Wali Gaunist, MADANG

■ Lapun Kanage raun long Vanimo taun i go na nek i drai na i go insait long wanpela stua long painim sof dring. Lapun Kanage i go insait long stua na askim yangpela stuakipa meri: Gutpela pikinini meri bilong mi, yu salim sampela kain loliwara o liminit we i ken rausim nekdrai na holim i stap inap mi go bek long ples long apinun? Yangpela stukipa meri ya skelim tok pisin bilong lapun Kanage i go na askim em: Papa, wanem samting em loliwara na liminit?

Kain bilong lapun Kanage ya, em i smail long stuakipa meri na tokim em: Pikinini, mitupela wantok na wanskin na yu askim mi gen na mi sem. Mi tok tok long ol dring bilong ol waitman...long tokples bilong ol, ol i kolim sof dring na mi long namba tu tokples bilong mi, tok pisin, mi save kolim loliwara na liminit.

Yangpela Lapun, VANIMO

□ Kanage i save wok long Ok Tedi osem wanpela draiva bilong ol bikipela ka. Wanpela taim em i kisim malolo na i go stap wantaim ol tambu lain long Mosbi siti.

Wanpela de em i kisim liklik ka bilong tambu bilong em na spin raun long siti. Kanage spin i go na kamap long Waigani na ol polisman bilong putim rot blok. Kanage i go stop na wanpela polisman i go na askim Kanage long laisens bilong em. Em nau Kanage i wok long putim han i go insait long poket bilong trausis long kisim walet bilong em long kisim laisens. Trausis i pas long skin na Kanage i wok long isi isi long rausim walet bilong em i kam ausait.

Polisman ya wet samting osem tripela minit na kirap tokim Kanage: Bras, yu traim na hariap liklik. Nogut yu giaman osem yu gat laisens.

Kanage harim osem na tokim polisman ya: Bras, dispela ka em westap ka ya...osem wanem, inap yu isi liklik long mi?

Taim polisman ya hatim Kanage na tokim em long givim em laisens hairap, Kanage givim em laisens long polisman ya na tokim em: Yu kisim na skelim na tokim mi...mi no klia sapos laisens bilong mi i givim tokorait long draivim ol kain liklik ka osem ol tripela wil wilwil bilong ol bebi i trening long wokabaut. Khasfer Gasjatar, TABUBIL

## Tupela brata kilim masalai Kuakua

BIPO, bipo tru long taim bilong ol tumbuna, i gat wanpela masalai man nem bilong em Kuakua. Dispela masalai man ya i save stap long wanpela ailan insait long Is Sepik provins-nem bilong dispela ailan ya em Vokeo. Kuakua i save stap long wanpela maunten ol i kolim Yam. Na maunten Yam i stap klostu tasol long nambis na arere long nambis i gat wanpela ples ol i kolim Ga i stap.

Kuakua em i no wanpela pilai pilai man, nogat, em i wanpela bikipela man stret. Olgeta taim em i save lusim ples bilong em na holim wanpela stik na i save wokabaut i go daun long ples Ga. Taim em i wokabaut i go daun, yupela graun i save guria na seksek stret.

Taim em i go kamap long ples Ga, em i save kilim ol manmeri na pikinini na kaikaim ol. Kuakua i mekim osem i go na klostu ol manmeri na pikinini long ples Ga i laik pinis. Em nau ol liklik lain manmeri na pikinini i stap i stat long painim ples bilong hait o ranawe. Tasol i nogat ples we ol i ken hait. Ol i painim hat na stap long en, Kuakua i save mekimsave long ol. Em i save lusim maunten bilong em olgeta de na i go daun long ples Ga. Na i save holimpasin wanpela o tupela bilong ol na karim i go antap



long maunten bilong em na i save kaikaim.

Mekim i go na namba bilong ol manmeri na pikinini i wok long surik i go daun isi isi. Na ol bikman bilong ples i pasim toktok na singautim olgeta manmeri i kam bung. Na ol i paitim toktok long ol i mas lusim ples na ranawe i go long wanpela arapela ples o ailan. Olgeta i wanbel long dispela plen na ol i pasim toktok osem long warapela de, ol i mas stat long redim ol samting bilong ol.

Em nau long arapela de, ol man i go long bus na katim ol diwai bilong sapim kanu. Ol i katim na wanwan famili i sapim ol kanu bilong ol, sapim pul bilong kanu na tu wokim sel bilong kanu. Ol meri i redim ol samting bilong haus na tu i go long gaden long kisim ol kaikai na arapela samting.

Bihain long tupela de nau, long bikmoning tru, wanwan famili i pulim ol kanu bilong ol i go daun long solwara. Na ol putim ol samting bilong ol na ol i stat pul i go aut long solwara long i go daun long bikiples.

Tasol ol i lusim wanpela meri i stap. Dispela meri ya i nogat man tasol em i gat bel. Taim em i askim ol arapela lain long helpim em o kalap long kanu bilong ol, ol i tok nogat.

Em nau, turangu meri ya i krai nogut tru pinis na wokabaut i go long haus bilong em. Na kisim ol samting bilong em na wokabaut i go antap long dispela maunten Kuakua i stap long en. Na em i go insait long wanpela hol long sait bilong maunten na stap.

Meri ya hait na stap i go na em i karim tupela pikinini man. Na em i givim nem osem Fitfit na Lolo. Em i lukautim tupela pikinini bilong em i go inap tupela i gat samting osem 4-pela krismas na mama bilong tupela i stat long lainim tupela i long wokim na sut long bunara na spia. Em i tokim tupela tu long masalai man Kuakua na wanem samting i save mekim na ol manmeri na pikinini long ples Ga i lusim ples na i go long bikiples.

Meri ya wantaim tupela pikinini bilong em i stap i go na tupela pikinini i kamap bikipela man. Na tupela i tokim mama bilong tupela osem tupela bai kilim masalai man Kuakua. Taim mama i harim osem em i wari long tupela pikinini bilong em. Tasol tupela i

tokim mama osem em i noken wari.

Wanpela de Fitfit na Lolo i redim ol spia na bunara bilong tupela pinis na tokim mama bilong tupela osem tumora tupela bai kilim Kuakua. Em nau tupela i tokim mama bilong tupela osem long tumora moning, taim draiwara i kamap na rip antap long solwara i drai, em i mas go aut long rip na painim ol sel, kuka na ol arapela samting. Orait taim Kuakua i lukim em na i go daun long kilim em na kaikaim, em i mas ranawe i kam long hol bilong ston we ol i stap long en. Na tupela bai putim was i stap na taim Kuakua i bihainim mama i go antap, tupela bai kilim em.

Long bikmoning tru mama i kisim basket na tekov i go daun long nambis na go antap long rip. Na i wok long painim ol sel na kuka i stap. I no longtaim na Kuakua i lukim em na kirap singaut: Wi ya, mi ting osem olgeta i pinis tasol sampela i hait na stap yet. Longpela taim tru ya mi no kaikai osem na nau bai mi mekimsave stret.

Tupela pikinini man bilong meri ya harim Kuakua i singaut na tok osem na tupela i redi gut tru na stap. Taim Kuakua i go daun long rip na i laik kilim meri ya, em i givim siksti i go antap long hol bilong ston. Kuakua singaut wantaim na raunim meri ya i go

antap. Meri ya i go antap na go insait long hol bilong ston. Taim Kuakua i go antap na kamap long hol bilong ston, em i kalap nogut long ol spia i pas long bodi bilong em. Tupela brata ya i no isi isi long Kuakua, tupela i mekim save stret long em. Tupela i sutim em long ol spia i go na em i dai.

Em nau tupela brata ya wantaim mama bilong tupela i karim nek bilong Kuakua na pulim bodi bilong em i go daun long nambis. Na ol i wokim wanpela kanu na putim bodi bilong Kuakua antap long kanu na pusim i go aut long solwara. Orait solwara i kisim dispela kanu i go na kamap long bikiples na pas long wesana. Na ol lain long bikiples i lukim na kalap nogut na i luksave osem em bodi bilong Kuakua tasol.

Long arapela de ol i salim wanpela man i go long ailan long sekap. Em i go kamap na lukim meri ya wantaim tupela pikinini man bilong em i stap. Man ya lukim osem na tanim i go bek long bikiples na tokim ol lain na ol i redim ol samting pinis na kalap long ol kanu bilong ol na i go bek long ailan.

Bihain nau ol i redim ol kaikai na ol wokim bikipela pati na amamasim Fitfit na Lolo wantaim mama bilong tupela.

Jimmy Sakie  
Vokeo Is, WEWAK

## Bai mi kontrolim ol filings bilong mi osem wanem?



Dia Laiplain,

Taim ol tisa long skul bilong mi i painim aut osem mi mekim pasin nogut wantaim wanpela yangpela singel man, ol i rausim mi long skul. Na nau olgeta lain i no laikim mi.

Mi no ting osem mi egensim o brukim mandato bilong adalteri (wanpela maritman na maritmeri i mekim pasin nogut). Tasol ol sios lida i tok osem mi bai no inap serim komunien sevis long 6-pela mun.

Long sait bilong mi wantaim dispela yangpela man, mi no patna bilong wanpela man na em i no patna bilong wanpela meri. Osem na mi no klia long wanem kain sin mi wokim.

Mi ting osem mi wanpela Kristen tasol mi no klia long ol filings insait long bodi bilong mi. God i givim mi olgeta pat bilong bodi bilong mi. Bai mi mekim wanem samting long ol dispela strongpela filings?

DISGRACED

Dia Pren,

I luk osem yu wok long wari long wanem rot wanpela Kristen i ken bihainim ol strongpela filings we yu eksperiensim insait long bodi bilong yu. Planti Kristen manmeri i save bungim dispela hevi. Na em i no isi long givim wanpela gutpela stretpela ansa.

Osem yu yet yu tok, nogat wanpela bilong yutupela i marit. Osem na yutupela i no brukim mandato bilong adalteri. Wanem samting yutupela i mekim ol i save kolim osem fonikesen-yangpela man na yangpela meri i mekim pasin nogut. Tasol dispela tu i egensim ol Kristen tising.

Ol sios lida i gat wok long tisim ol Kristen lo na ol arapela samting i stap insait long Baibel long ol kongrigesen. Long mekim pasin nogut ausait long marit i wanpela samting ol sios lida i save toktok long en.

Tasol mipela i mas luksave osem Kristeniti

i moa long bihainim ol mandato. Kristeniti i toktok long pasin long laikim na lukautim ol arapela pipel. Planti Kristen i luksave osem em i hat tru long laikim na lukautim arapela pipel.

Dispela paul tingting yu gat i soim pasin bilong wanem rot ol yangpela pipel i mas luksave long ol pasin bilong ol taim ol i gro. Na tu i no long mekim ol samting we bodi bilong ol i laikim o askim ol long mekim. I tru osem em i hat long abrusim long mekim. Wanpela bikipela samting em tingting na laik long mekim pasin nogut. Wanpela gutpela samting tasol i mas kamap aninit long ol lo we i stap long Baibel. Sapos i nogat kontrol i kamap, dispela pasin i ken bagarapim laip. Planti manmeri insait long wol i kisim ol STD sik bikos ol i no kontrolim tingting na laik bilong ol long mekim pasin nogut.

I moa gutpela long beten na askim Papa

God long helpim yu long kontrolim ol filings insait long bodi bilong yu. Sapos yu bilip osem yu mekim wanpela rong, yu ken beten na askim Papa God long porgivim yu. Mipela i mas luksave osem Papa God i ken luksave na i ken porgivim mipela sapos mipela i toksori insait long bel bilong mipela long em na mipela yet long rong mipela i mekim.

Wanpela gutpela rot long i noken larim ol filings bilong yu i daunim yu em long traim na noken stap wantaim wanpela man tasol. Taim ol arapela lain tu i stap, yu bai no inap tingting tumas long larim o mekim ol filings insait long bodi bilong yu i karim kaikai.

Mipela i bilip osem nau yu ken luksave long watpo na ol sios lida bilong yu i egensim yu, maski yu no amamas long ol lo bilong sios ol i bihainim.

Laiplain



# No ken yusim ol trangu lain long kisim mani

**Dia Edita,**  
Mi laik putim aut liklik wari bilong mi long pablik. Long planti taim mi save lukim ol manmeri husat i ai i pas o lek nogut na ol lapun manmeri we ol i no inap long wok mani na kaikai.

Ol wantok bilong ol dispela kain lain i save kisim ol i kam na putim ol long kona bilong stua na strit na bihain long

ol opis nabaut na larim ol i askim long 1 toea na 2 toea nabaut.

Taim mipela sampela lain lukim dispela kain lain meri na man, mipela i save sori nogut tru long ol tasol yupela ol wantok tru bilong ol dispela kain manmeri yupela i save ting olsem wanem na kam putim ol long dispela kain hap o pablik ples?. Yupela yet i save sori tu

long ol o nogat?. Mi ting sapos ol i stap long asples bilong ol stret bai ol i no inap long sot long wanpela samting.

Ating yupela ol gutpela wantok bilong ol i sot tu long mani olsem na yupela i laik giaman yusim ol trangu lain olsem long kisim mani bilong baim kaikai na samting.

Mi ting yupela yet inap long helpim ol gut

long ol samting na i no ken mekim nabaut long ol olsem.

Tingting gut na kisim ol i go bek long ples bai ol i ken painim gutpela helpim na sindaun na ol i ken amamas moa.

Em tasol na husat i laik sapot o egensim mi em welkam tasol.

**Iyave Banogowa  
Mosbi**

# Ol Enga lida i no mekim wok

**Dia Edita,**  
Mi laik askim long ol memba bilong Enga i stap we nau?

Mi wanpela manki Kaman insait long Kampiam sab distrik na mi laik komplek liklik long ol memba bilong mipela bikos long ol narapela provins, i gat ol wok prosek we ol memba i save helpim sanapim. Dispela em ol prosek olsem somil na ol arapela liklik prosek moa olsem.

Mipela long Enga i gat bikpela prosek tasol mipela i no pilim olsem gutpela sevis i kamap long mipela.

Taun bilong mipela i stap olsem wanpela liklik sab distrik. Nogat gutpela wara saplai, bris na rot i go long

taun na insait long ol ruel eria bilong Enga provins.

Long taim bilong ol ileksen kempein, yupela i save tok bai yupela i makim maus bilong yupela ol pipel, tasol planti long dispela em i mauswara tasol. Long taim bilong nesenele ileksen neks yia, mipela bai lukluk long husat man i gat bikpela tingting long helpim mipela ol grasrut na makim dispela ol lain. Nau yupela ol memba bilong mipela ya, mipela i save olsem yupela em ol aipas.

**Leo Lem  
Kimbe  
Wes Nu Briten.**

# Meri laik winim man bilong em

**Dia Edita,**  
Mi wanpela manki husat i save ritim Wantok niuspepa olgeta taim. Olsem na mi laik putim wanpela toktok bilong mi tu.

Mi laik tokaut long sampela trupela pasin i save kamap long ol marit meri. Mi save lukim meri bilong bikpela brata bilong mi i save go sanap long dua bilong opis long olgeta fotnait Fraide.

Taim pe masta i kolim nem bilong brata bilong mi, bai meri

Kerema bilong em i singaut, yesa na i go kisim fotnait moni bilong bikpela brata wantaim pasol.

Mi sori tasol long dipsela meri bilong bikpela brata i bin mekim olsem na bikpela brata i kilim em hap indai na em tekov i go pinis long sampela hap bilong dispela kantri.

Em i lusim Wewak na mipela i no moa save long wanem hap em i stap.

Ol meri, plis no ken hangamap long wil bilong man bilong yupela olgeta taim. Traim na sindaun bosim haus kuk liklik. Nogut bai yupela ronawe lusim man bilong yupela wantaim nogat gutpela as.

Mi bai amamas long harim bekim bilong yupela sapos toktok bilong mi ya i gutpela o no gut.

**Damien Napoli  
Maprik**

# Jerry Nalau em Morobe lida stret

**Dia Edita,**  
Mi wanpela manki Boana insait long Morobe provins na mi laik tok amamas tru long lida bilong Morobe, Hon Jerry Nalau.

Mi ken lukim olsem Jerry Nalau em pikinini tru bilong Morobe stret na em i lidaman stret bilong ol Morobe pipel.

Ol kain wok em i mekim i soim tru olsem dispela em lida bilong pipel na em i tingim ol pipel na mekim samting. Em i no tingim poket bilong em yet o biknem bilong em.

Mipela i amamas long Mista Nalau long wok bilong em.

Maski long ol arapela lida bilong Morobe i laik kamap birua long Mista Nalau, mipela ol pipel i skelim olsem ol dispela lain lida ya bai lusim sit bilong ol long 1997 nesenele ileksen. Ol bai i no inap go bek long palamen.

Em tasol toktok bilong mi na husat i laik tromoi moa tingting antap em welkam tasol long mekim.

**Sambom Ikat  
Lae**

# Lapun laik tokaut long song; Yau Saganema

**Dia Edita,**  
Mi wanpela lapun tumbuna bilong Pindiu insait long Finsafen eria long Morobe provins.

Mi bekim pas bilong tumbuna pikinini Masta Maigo Kongrama we i bin kamap long Wantok Niuspepa bilong Ogas 31, 1995.

Yu bin rait na tok olsem "Yau Saganema" i min olsem meri i gat bel na bihainim man bilong em i olsem olsem.

Mi laik tokim yu stret olsem dispela song i no min olsem. Na tu em i no song bilong Reks Ben. Em i song bilong Sagic Kuwic. Sori tru long yu bubu. Yu no save gut long tupela popula ben bilong Finsafen em long Reks ben na Sagic Kuwic.

Yu givim nem nogut long Reks ben na tu yu no save gut long tokples Pindiu na stia bilong tok tru. Olsem na tumbuna pikinini, mi laik

bai yu kam lukim mi long Morobe setelmen long 9 Mail na mi bai stretim yu long mining tru bilong Yau Saganema Waina Kembo.

Olgeta lain Wain long Morobe setelmen insait long Nain Mail i save gut long mi. Askim ol tasol na ol bai i soim yu long blok bilong mi.

Sori tru tumbuna, ating ol lain bilong mi long olgeta hap bilong PNG bai i rait long

bekim pas bilong yu. Tasol i gutpela long yu i kam lukim mi na bai mi tok klia long mining bilong dispela song ya. Husat pikinini na tumbuna i laik bekim pas bilong mi, plis rait i kam tasol long Wantok Niuspepa na mi bai amamas long lukim.

**Tomar Memau  
Tumbuna Papa  
Nain Mail  
Mosbi.**

# Bus na graun em strong bilong pipel

**Dia Edita,**  
Mi wanpela olupela TVC long Madang provins na mi painimaut olsem taim ol diwai kampani i kam insait long katim diwai long provins na kantri bilong yumi, ol i save bagarapim bus wara we ol tumbuna papa makim long yumi.

Mi i no egensim ol loging kampani we ol i save katim diwai long ol provins tasol mi tingting long ol bagarap ol kampani ya i save kamapim.

Insait long Bunabun inlen bilong Not Kos rot long Madang provins, ol i putim tupela kam-

pani Papir na Ambea holders olsem na mi rait i kam long niuspepa.

Mi skelim olsem ol pipel bilong ples i save kros nating long ol kampani husat i save kam katim diwai na kisim ol samting long graun. Tasol bikpela laik na tingting bilong ol asples em ol tu i laik kain sevis olsem rot, bris, skul, haus sik na arapela moa samting.

Olsem na sapos kampani i laik brukim bus na diwai long kisim ol samting, em i mas skelim gut ol hap em i brukim. No ken bagara-

pim olgeta. Na dispela inap helpim ol papagraun na ples lain wantaim ol liklik sevis na helpim.

Yumi save olsem God i wokim graun na ol samting i stap long en. Tasol dispela graun em i givim long yumi long mekim wok bilong helpim bodi na spirit tu. Yumi mas mekim wok antap long graun long helpim yumi yet.

Husat arapela i laik sapotim o egensim em laik tasol long rait.

**Cosie Purit  
Madang**

# Stretim gut mining bilong tokples

**Dia Edita,**  
Mi laik autim tingting bilong mi i go long ol pipel bilong Yangoru /Kubalia distrik olsem nem Kanagi i no makim tru mining bilong em. Kanagi em i nem bilong wanpela hap graun tasol. Olsem na bilong makim tru tupela eria na bungim ol wantaim, mi ting dispela nem Yangku o Kuya distrik em i orait.

Dispela em bai mekim ol pipel bilong tupela hap wantaim i klia long mining long tokples bilong mipela yet. Yanku em i min olsem kam na Kuya i min olsem wara kam. O tupela distrik i bun na stap wantaim. Plis mi laikim planti sapot o tok egensim long tingting bilong mi.

**Pius Kramahun  
Kubalia  
Is Sepik provins.**

# Yama i no mekim gut wok

**Dia Edita,**  
Mi laik sapotim pas bilong brata Walter Robert bilong Kimbe na bekim pas bilong Charles Loke. Mipela i save long yu Charles Loke olsem na mipela i laik tok-save long yu olsem noken giamanim ol pipel bilong Sumkar. Brata Charles, mi laik yu harim gut. Mipela ol pipel long Sumkar i no lukim wanpela gutpela wok developmen we nesenele palamen memba Peter Yama i helpim kamapim. Mi laik tokaut olsem mipela ol pipel bilong Sumkar i gat belhevi long memba bilong mipela long em i no bringim gutpela sevis o wok developmen i kam long ol elektret bilong em, tasol i luk olsem em wokim bisnis long resis wantaim mipela. Long 1995, memba i bin baim tupela kago sip na nau em i gat tripela sip we i wok namel long Madang, Karkar na Bagbag antap tu long ol arapela bisnis we em i gat.

Mipela ol pipel bilong Sumkar i sem pinis long harim nem long memba bilong mipela i kamap nogut long niuspepa.

**Peter Bai, Madang**

# Komiti kisim gris moni long pipel

**Dia Edita,**  
Mi wanpela manki Wabeg na mi gat bikpela komplek olsem ol Lens Komiti bilong Pogera i save mekim olsem. Taim ol man i go painim wok long PJV ol Lens Komiti i save sainim aplikesen pepa, bai em askim ol man long baim em long K50 o K100 pastaim bai ol i sainim pepa.

Taim ol sainim pinis bai ol postim i go long Pesenele Opis bilong PJV. Na taim ol i laik bihainim na sekim ol dispela pas, ol komiti husat i sainim em bai askim papa bilong pepa long givim narapela moni o pik long givim em bai Lens Komiti i ken givim wok long em.

Brata, mi laik tok klia olsem yupela ol Lens Komiti no ken putim bisnis long dispela na kism moni o pik bilong ol manmeri husat i painim wok long Pogera.

Mipela i gat inap skul livas i stap long Enga. Em tasol komplek bilong mi na sapos wanpela brata o susai laik salensim o egensim pas bilong mi em orait tasol long rait ikam long Wantok niuspepa bai mi amamas long lukim.

**D Martin  
Wabeg**

# No ken paitim ol referi

**Dia Edita,**  
Mi laik autim komplek bilong mi long Wantok Niuspepa na pablik i ken lukim na givim tingting bilong ol long en. Mi wanpela man husat i no wanbel tru long pasin we ol sapota bilong ol wan wan tim i save mekim long paitim referi long taim feveret tim bilong ol long wanpela gem i lus.

Mi bin lukim dispela soka pilai we i bin kamap namel long Blu Kumuls na Mopi long Lae Futbol Asosiesen graun i no longpela taim i go pinis. Mopi i bin winim dispela gem. Dispela em bin klia win bilong Mopi tasol ol sapota bilong Blue Kumuls i tok wanpela gol we ol Mopi i putim em i opsait.

Mi bin stap lukluk long gem long dispela taim na mi bin lukim olsem Mopi i pilaim klinpela gem. Tasol sampela sapota i komplek na go insait long klab haus na paitim nogut tu referi. Namel long 10 na 20 man i go insait na paitim em.

Plis inap yupela ol tim na ol sapota, pilaim klinpela gem na no ken belhat sapos wanpela tim i win. Soim trupela pasin bilong spotmensip na noken bel kaskas kwiktait. Tu mi askim yupela long lusim pasin bilong paitim referi nating. Yupela i save minim long lukim pilai o go long paitim referi.

**Gusa Yaap  
Lae.Morobe provins.**



## Ol meri mas sindaun isi

**Dia Edita,**

Mi laik autim komplem bilong mi long sampela ol meri hailans husat i save salim skin bilong ol olsem ol buai na daka na ol arapela liklik samting bilong kisim mani long en.

Mi save lukim planti meri Simbu na Goroka i raun raun nabaut na bagarapim skin bilong ol. Na tu givim sem i go long ol papamama na ol famili bilong ol.

Tu taim ol i bungim hevi, ol i save ron i go long haus sik na giamanim ol dokta na nes na ol nes i save givim ol marasin long ol bilong stapim na pasim pikinini long bel. Mi lukim dispela kain pasin i kamap bikpela long Goroka na Kundiawa haus sik na taun.

Yupela ol dispela lain meri husat i raun olsem na karim pikinini yupela yet i mas karim pikinini na lukautim na maski long amamasim bodi bilong yupela tasol na ranawe long hevi.

Dispela tu i egensim ol tokok long buk Baibel olsem na husat i save raun long rot na bagarapim skin bilong em plis traim na stap isi bikos yu wokim doti long haus holi bilong God.

Ol meri, yupela i noken seksek long ol traim na gris bilong dispela graun. Nau taim i senis na ol kain kain samting bai i kamap na bagarapim yumi ol Kristen. Olsem tasol na yupela i holim pas bilip na wetim tasol Bikpela bai i kam long kisim ol bilip manmeri bilong em.

Ol kain kain samting bai i kamap long bagarapim gutpela sindaun bilong ol manmeri tasol yu yet i mas sindaun isi na skelim laip na wokabaut bilong yu. Traim long painim gutpela man bilong maritim na sindaun isi.

**Gibson Kila  
Kundiawa  
Simbu provins.**

**Ol yangpela i laikim nem bilong ol i stap insait long niuspepa long painim penpren i mas prinim tupela nem wantaim edres, na wanem samting yupela i save laikim long mekim. (Hobbi).**

# Ol meri i haitim mani long baim kaikai

**Dia Edita,**

Mi wanpela manki Sepik husat i save amamas long ritim Wantok niuspepa. Olsem na mi laik autim wanpela toktok bilong mi long egensim pas bilong brata Ronald Alek i bin kamap long Wantok 16 Novemba, 1995.

Brata Ronald i bin tok olsem ol meri Maprik i gat insait poket na bra long haitim mani bilong ol.

Mi laik tok olsem ating em namba wan taim bilong Ronald long lukim bra bilong ol meri olsem na yu tok olsem. Ating yu i no wanpela manki Maprik olsem na yu no gat sori long ol meri long haitim mani bilong ol long bra.

Yu no save long wanem kain hevi i save kamap long haiwe rot bilong Maprik olsem na yu toktok nabaut.

Mi save sori long ol trangu meri bilong ples bikos ol i save hatwok tru long painim liklik mani long maket. Tasol ol raskel na bikhet man i save stopim ka long haiwe na kisim ol mani bilong ol.

Brata, mi laik tokim yu stret olsem ol susa na mama bilong mipela i save pret long dispela kain raskel pasin long haiwe na ol i save painim ples bilong haitim liklik mani ol i hatwok tru long kisim.

Mi ting sapos yu ron long sampela haiwe rot long arapela provins tu, mi ting dispela kain

pasin bikhet tu i stap. Na ol meri i save painim hat long haitim mani bilong ol olsem na ol i save hatim mani long bra bilong ol olsem yu yet i lukim na toktok long en. Dispela i no wanpela samting bilong toktok na lap long en bikos yu mas skelim gut wanem as na ol i mekim dispela kain pasin.

Brata Ronald, sapos yu i gat ol susa na mama bilong yu, ating yu mas skelim gut pastaim na yu toktok long ol arapela meri.

Em tasol toktok bilong mi na husat i gat moa gutpela tingting long tromoi Antap em laik tasol.

**Sepik boi  
Maprik**

## Olgeta Simbu i no bikhet lain

**Dia Edita,**

Mi laik autim wari bilong mi long komplem bilong Henry Mone bilong Mendi long Sauten hailans provins long ol pipel bilong Simbu.

Long komplem bilong Henry, em i tok olsem "Ol pipel bilong Simbu i save mekim nois tumas long olgeta hap". Dispela komplem i kamap long Wantok 22 Disemba, 1995.

Mi wanpela manki Simbu na taim mi ritim dispela komplem bilong em, mi pilim i no stret long mi yet na tu long ol arapela pipel bilong Simbu. Olsem na mi laik askim em. Em i bilong Mendi stret o bilong Simbu na i go stap long Mendi?.

Sapos em i bilong Mendi, em i mas took stret long husat ol lain

bilong Simbu i save mekim nois tumas. Simbu em bikpela nem na mipela ol kain kain man i stap.

Yu kolim Simbu na yu bagarapim gut nem bilong mipela.

Sapos yu sae long nem o waem hap bilong Simbu, orait yu mas tok stret. No ken tok Simbu tasol na bagarapim gutpela nem bilong mipela. Sapos yu no save long

wanem lain o man yu komplem long en, bikos yu harim tasol, ating yu painim toktok tasol.

Olsem na yu pasim maus bilong yu na no ken bagarapim gutpela nem bilong mipela ol Simbu pipel.

Em tasol na husat i laik jonim moa em welkam tasol.

**Robert K Gene  
Mosbi.**

**Dia Edita,**

Mipela painim wanpela famili bilong mipela i bin i go wok wantaim Kamusi Timba kampani long Daru, Westen provins long 1990 na long 1991 em i bin pinis long Daru na em ikam bek long ples.

Na long 1992 em i bin lusim Lae na em i go we em no gat toksave long mipela ol famili bilong em. Em klostu 5-pela krismas na mipela i no kisim

### PAINIM WANTOK

wanpela pas o toksave bilong em yet.

Olsem na mipela i putim dispela pas long husat lain i save long em o i lukim em, plis toksave long em olsem mipela ol famili long ples i painim em.

Nem bilong brata ya em Mona Susak o narapela nem em Immanuel Sesinu. Em

bilong Makam long Morobe provins.

Plis givim em dispela edres o raitim pas long mipela long dispela adres:

Sapen and Family  
PO Box 3632, Sibi Village,  
Erap, Lae Morobe province.

Tenkyu long helpim bilong yupela ol gutpela brata susa.

**Sapen and Family  
Lae**

## Noken bagarap long hap tok 'Yu karim ya'

**Dia Edita,**

Mipela tupela meri long Madang i laik egensim pas bilong brata Joseph Yasi i bin kamap long Disemba 28 1995.

Brata, yu tok olsem ol meri i save singaut long ol man olsem 'Yu karim ya'. Brata ating yu mas faul ya. Plis, dispela singaut o toktok em hap toktok bilong ol man tu ya. Ol man tu i save bikmaus na singaut long dispela toktok.

Na narapela tu yu tok olsem sapos ol meri i singaut ol man bai givim dispela samting. Brata, ating yupela ol man taim yupela harim dispela, yupela save tingting krangi tru na kisim filings ah?. Ating taim yu man i harim ol meri i singaut 'Yu karim' yupela

kirap pinis. Rabis tingting bilong yu yet bagarapim yu yet na yu bai bagarap olgeta.

Long makim maus bilong ol meri, mi laik tok olsem ol meri taim ol i singaut ol i no save tingting nogut olsem yu husat i ting. Ol i amamas tasol long stail na smat bilong man ya. I no long dispela samting yu tok long en. Ating sapos yu save liklik long rit na rait na sapos yu save tok pisin, bai yu ken save gut long mining bilong ol kain toktok.

Sapos yu ting tok pisin i kraik krangi long ia bilong yu, em yu yet nau.

Em tasol na sapos yu husat brata na susa i laik egensim o sapatim em laik tasol.

**Rona na Serah  
Madang**

## Pasto Wippon mas toksave long K45,000

**Dia Edita,**

Mi laik raitim dispela pas i go long askim Pasto Godfried Wippon long tokaut klia long dispela mani ol brata sios long Australia i save kam long olgeta ya.

Mi save olsem brata sios long Australia i save salim olsem K45,000 i kam long olgeta via tasol mi no lukim

kaikai bilong wok we dispela mani i save go long en.

Olsem na mi laik askim Pasto Godfried Wippon long tokaut long em i save yusim dispela K45,000 olsem wanem tru?.

Dispela sios bilong Rivaivel long PNG i bin stat long 1982 na inap nau, bikpela mani em yumi save

kisim olgeta taim. Tasol mi ting nogut Pasto Wippon yet i wok long paulim mipela gut tru long dispela mani.

Em tasol na husat i laik bekim em laik tasol.

**Godfrey Wenl  
Lumi  
Sandaun provins**

## Samson Napo givim loli long pipel

**Dia Edita,**

Mi laik putim dispela komplem bilong mi i go egensim memba bilong mipela long Bulolo Open, Samson Napo.

Mi skelim olsem memba bilong Bulolo, Samson Napo i wanpela switpela na grisman tru long givim loli long ol manmeri bilong iektoret bilong em. Dispela loli bai ol manmeri i kaikai na pilim swit na laikim em bikos em i saplaim ol swit loli.

Mi skelim olsem ol kain helpim na sapot Mista Napo i mekim long givim helpim mani long ol wok projek, sios na bisnis insait long Wau, Bulolo na Mumeng eria i no gat wanpela stretpela tingting long en. Em i mekim dispela wantaim sait tingting bilong winim sapot na win gen long ileksen.

Tasol ol projek na wok bisnis wok we memba i givim mani long ol i no gat gutpela strong o menesmen bilong ol. Memba i givim mani tasol long amamasim ol pipel tasol em i no wari sapos bisnis bai wok gut o bai bruk daun long bihain. Tasol wok bilong olgeta lida em long was na lukim olsem ol kain wok olsem i mas ron gut long helpim ol pipel na bringim sevis long longpela taim bihain.

Sampela promis memba i mekim long kempen bilong em long 1992 nesenel ileksen em mipela i wet nating na nogat samting i kamap yet.

Mipela yet long Mumeng em memba i no kamapim wanpela gutpela samting yet. Liklik stesin bilong mipela long Mumeng i kamap gut na mipela i no save amamas. Wanpela bikpela haus bilong ol kausil i stap na memba i mas traim long stretim gut dispela haus long mipela ol yut i ken yusim long mekim sampela wok o pilai long putim mani na strongim wok yut bilong mipela. Spot long Mumeng i nogat helpim bikos no gat wanpela kampani bai helpim mipela long sponsa. Olsem na dispela wok i mas go bek long han bilong memba long bungim na amamasim ol yangpela long wok bilong spot.

Mipela i save kolim nem bilong Yut Kaunsil, Spot Kaunsil, Wimens Kaunsil na planti arapela kaunsil tasol bai mipela i mekim wanpela wok tru long kamapim ol dispela kaunsil sapos memba i no givim sampela sapot.

Mipela givim 5-pela krismas olgeta long Mista Napo na em i lukim tru tru hevi i stap namel wantaim ol pipel. Ol distrik woka o pablik sevans i no mekim wanpela wok bikos memba i no makim wok long ol i mekim.

Mi laik askim memba long noken givim planti loli tumas long ol manmeri. Bikos loli em switpela kaikai bilong giamanim maus tasol na bel tru i no inap pulap yet.

Em tasok komplem bilong mi na husat i laik bekim em laik tasol.

**Dabol Bond  
Mumeng-Morobe provins**

## Ol famili pulap long dipatmen opis

**Dia Edita,**

Mi gat komplem bilong mekim long Lens Dipatmen.

Mi lukim olsem Lens Dipatmen i wokim bikpela pasin bilong wantok sistem i stap.

Planti ol bikman long dispela dipatmen i kisim ol meri bilong ol, ol pikinini, ol brata, ol kandere na o, arapela hauslain bilong ol long wok wantaim ol.

Long sampela, i gat papa, mama na pikinini i wok wantaim na olsem mi ting insait long tripela na 5-pela krismas i kam, bai yumi lukim Lens Dipatmen olsem wanpela

famili dipatmen bilong gavman.

Narapela samting tu em dipatmen nau i wok long kisim moa yangpela meri olsem na bai em i wankain tu. Long tripela na 5-pela krismas i kam, diaptmen bai i pulap tasol long ol meri.

Mi laik askim Pablik sevis komisen na kisim wanpela bekim long olsem wanem em i orait long papamama na pikinini i ken wok long wanpela dipatmen o nogat.

**Robert Amos  
Sabama setelmen  
Mosbi.**


### TOKSAVE:

Sapos yu gat hevi, rait i kam long LAIPLAIN, P.O.Box 6047, Boroko, o yu ken ring mipela long telipon namba 26 0011.

Ol trupela hevi em mipela bai tokaut long dispela spes long niuspepa. Tasol trupela nem bilong yu em mipela bai no inap long tokaut.



# ON SALE EVERY THURSDAY THROUGHOUT THE NATION



# WANTOK

Established twenty six years ago, **WANTOK**, with local news and sport gathered from across the country, is Papua New Guinea's only Pidgin language newspaper.

**50t tasol**

**WANTOK**  
Niuspepa bilong Papua Niugini  
Namba 1,125  
Wik i s...

**Gavman p...  
long ol...**

**WANTOK**  
NIUSPEPA BILONG YUMI OL PAPAUA NIUGINI STRET - 26 VIA NAU  
Wik i s... long Fonde, Februar 1, 1996  
Namba 1,127

**Ol Makam  
laik blokim  
haiwe rot**

**Ol i tok ol Goroka mas baim K200,000  
kompensesen long dai bilong boi**


**YAKAM KELO i raitim**

**PRUDLY PUBLISHED BY WORD PUBLISHING COMPANY PTY. LTD.**

**P.O. BOX 1982, BOROKO, NCD, PHONE: 325 2500, FAX: 325 2579.**

**PRUDLY PUBLISHED BY WORD PUBLISHING COMPANY PTY. LTD.  
P.O. BOX 1982, BOROKO, NCD, PHONE: 325 2500, FAX: 325 2579.**






# WANTOK PABLIK NOTIS

Sapo yu laik advertais, telepon 325 2500 na askim long

Miri Aiori Ext. 214  
Jeffrey Maliou Ext. 215  
Jack Mahuru Ext. 217



1996 MOSBI SO  
JUNE 8,9,10

## OL LAIN HUSAT BAI PUTIM AUT OL SAMTING NA OL STOL HOLDA

yupela i mas tok aut olsem bai yupela i stap long so taim olsem na yupela i mas baim ol rent fi hariap na noken abrusim mun Epril 30.

Ol nupela ol lain husat bai putim aut ol samting olsem sosel, spots, yut o sios grup, olgeta i ken kam. Sapos yu bai stap insait tu long so, o baim fi bilong yu askim long:

The Port Moresby Show Office  
Cnr. Croton & Frangipani St. Hohola  
PO Box 6958  
BOROKO

Telipon namba: 325 6579

Opis aua: Mande i go long Fraide 9:00am-3:00 pm

BIKPELA SPONSA  
COCA-COLA NA WINFIELD



1996 MOSBI SO  
JUNE 8,9,10

## TUMBUNA SINGSING

Mosbi So Sosaiti bai givim ol gutpela prais mani long ol tumbuna singsing grup.

Ol tumbuna singsing grup i mas gat namba long ol lain i singsing namel long 15 na 30 manmeri.

## I NOGAT WANPELA FI BAI MIPELA SASIM OL TUMBUNA SINGSING GRUP.

Kisim moa tok klia long:

The Port Moresby Show Office  
Cnr. Croton & Frangipani St. Hohola  
PO Box 6958  
BOROKO

Telipon namba: 325 6579

Opis aua: Mande i go long Fraide 9:00am-3:00 pm

BIKPELA SPONSA  
COCA-COLA NA WINFIELD



1996 MOSBI SO  
JUNE 8,9,10

## OL LAIN BILONG PUTIM OL PLAWA NA OL KAIKAI BILONG GADEN LONG SO

Ol lain husat bai putim so long ol kaikai bilong ol gaden bilong ol i ken kam insait tu long so na soim ol plawa, prut, ol kaikai bilong gaden na ol narapela ples kaikai. Redim ol samting nau yet long karim i kam long taim bilong so.

Ol prais bai i go long wanem liklik so em i winim tru ol narapela.

Sapos yu laik stap insait long resis ya, kisim wanpela entri fom long Mosbi So Opis.

Cnr. Croton & Frangipani St. Hohola  
Telipon namba: 325 6579

Opis aua: Mande i go long Fraide: 9:00am-3:00pm.

BIKPELA SPONSA  
COCA-COLA NA WINFIELD

## BUK BILONG OL SEVISIS

### HAIR & BEAUTY

*His N Hers*

HAIR SALON

All Hair Care

Black Hair

& Beauty Products

42 1843

P.O. Box 1721, Lae, Central Arcade.

### HAPPY B/LATED BIRTHDAY



ROSSIE KENNI

**'STAY GORGEOUS  
AND KEEP SMILING'**

FROM THE 1996  
POM WOMENS SOCCER  
SQUAD.

7  
REASONS  
TO  
UNICEF  
CARDS  
GIRLS



For more information phone the  
Wantok advertising department  
today on:

**325 2500** or fax **325 2579**

**DON'T MISS THIS  
GREAT OFFER!**

1. **UNICEF helps** educate mothers to enable them to better care for their children through breastfeeding and growth monitoring and by teaching them income-generating activities.
2. **UNICEF supports** community-based projects that provide education and training to people to develop skills that will benefit their families and their communities.
3. **UNICEF works** with governments in developing countries to eliminate disease, malnutrition and poverty from the lives of children and their families.

For information, please contact:

**EILEEN KOLMA**


Telephone: 321 3000

Fax: 321 1372, Telex: 22197

P.O. Box 472, Port Moresby.

**unicef**   
United Nations Children's Fund





## BOGENVIL TRENSISINEL GAVMAN

### OPIS BILONG PRIMIA

#### ISTA TOKSAVE

Ol dia man, meri pikinini long olgeta ples, kea senta na lon narapela senta, wanwan man, meri, pikinini i stap lon ol femeli o narapela grup i stap long naispela Bogenvil Provins.

Mi tok tenkyu long God na yupela olgeta long mekim Bogenvil i naispela ailen. Na tu mi mas akim God long marimari bilong em long ol sampela husat i mekim dispela ples i nogut na ol pipel bilon em i no amamas, kisim pen na wari.

Maski long ol pen, wari, sore na pen, na maski long wanem ol samting nogut i stap, mi mas tok long tupela olgeta Hepi Ista 1996. Wantaim kamap bek bilon fridom em Kraiss husat i Kirap bek i givim yumi, yumi mas traim lon go egensim pasin nogut.

Na olsem, mipela bai wetim yet gutpela sindaun long olgeta hap bilong Bogenvil. Mi tokim ypela strèt olsem gutpela sindaun i stap lon rot bilong mipela na em bai bilong mipela. Gutpela sindaun na amamas bai bilong mipela wanwan taim wanwan i senisim bel na tingting, long taim wanpela i bilong narapela na wanpela femeli i bilong narapela, wapela klen i bilong narapela klen, Sekyuriti fos memba i go wantaim BRA ig go log Resiten na PNG gavman i go lon pipel bilong Bogenvil Provins long amamas bai i tok long narapela, "Mi Sori, mi rongim yu. Plis fogivim mi." Na ol narapela long gutpela bel na amamas bai i ken tok," Mi tu mi rongim yu, plis fogivim mi tu olsem mi fogivim yu." Plis yumi mas mekim olsem na sindaun gen olsem brata na susa bilong Jisas, Kraiss, Pikinini bilong God, Lod bilong yumi.

Mipela ol pikinini bilong papa god husat i save stap klostu tru husat em pes bilong em Jisas Kraiss i soim, husat long wankain taim i soim yu na me, long mipela olgeta yet, wanem samting em i trupela man, meri na pikinini.

Em i no mekim wapela rong, tokorait long toktok bilong papa bilong em long nilim amamas bilon yumi, pawa na grid, olgeta grid bilong yumi we i no gat biknem, olgeta grid bilon yumi log mani na ol welt, olgeta envi na jeles pasin, resentmen na bel kros, les bilong mipela long ol narapela na laik bilong mipela long kamapim pait na kamapim pen, safaring na wari long nogat gutpela pasin long eksen bilong wanpela na narapela-olgeta dispela rabis na stin samting, Jisas i rausim ol lon ston, putim ol antap lon diwai kros bilong em na tromoi long las win bilon em taim em i dai, dispela samtingi kamap bipo antap lon diwai kros na i wankain olsem long nau long mambu bilong gan i as bilong olgeta pasin nogut. Mipela i mas askim Jisas lon helpim mipela log tanim ol dispela rabis samting bilong pasin nogut i go insait long win bilon God, olsem dispela God, Em papa bilong em i tok isi tru olsem 'NO! NO!' long dai bilong man Jisas, dai bilong yumi. Dispela bikpela NO em win bilong yumi. Dispela bikpela NO em laip bilong yum na kirap bek bilong yumi. Olsem na yumi olgeta traim mekim bel isi log Bogenvil Provins we stori bilon Ista i mas go pas wantaim dispela em Ista Ekspiriens. Yumi yusim dispela samting em Papua Niugini Gavman i apim Sispaia NOKEN lon kilim yumi na

narapela TASOL mekim dispela i olsem wanpela bikpela samting bilong kamapim bel isi namel lon yumi, yumi olgeta, man, meri na pikinini, ol bikpela bilong mipela, ol interim atoriti sief na ol Bogenvil Trensissinel Gavman memba, ol Resiten na Sekyuriti Fos memba bilong yumi na ol lida bilon yumi long BIG/BRA. Yumi olgea tanim bel na kamapim bel isi wantaim BEL ISI BILONG JISAS i stap long leva bilong yumi na tingting bilon yumi. Wantaim dispela BEL ISI, yumi toktok long wanpela na narapela na toktok lon bihain taim lon wanem samting bai yumi sanap na bikpela samting lon Mama graun bilon yumi, Bogenvil Provins wantaim ol pipel bilong em insait log Gavman na lon Independen Stet bilong Papua Niugini.

Yumi noken mekim WAR. Plis BIG/BRA putim daun ol smtingbilon yupela long pait na mekim Bel Isi bilong Kraiss i stap long Leva na tingting bilong yupela. Plis ol Resiten Fos na Sekyuriti Fos, lusim Bel Isi bilong Kraiss i stap lon leva na tingting bilong yupela. Olgeta liklik war em wanpela i kamapim, long hia o hap, log wanem hap bilong provins, i mas pinis; na olgeta rot bilong mekim bel isi em i no stap moa i mas kirap bek gen. Yumi olgeta mas traim kisim olgeta eksen long rot bilong mekim bel isi long Bogenvil Provins bilong yumi.

Mipela bai mekim BEL ISI wantaim wanpela na narapela long grasruts namel long ol femeli bilong yumi na logn antap namel long ol Lida namel long PNG Gavman, BTG na BIG na namel long BRA na ol Resistens na Sekyuriti Fos. Mipela bai mekim BIKPELA BEL ISI long wanem mipela em ol Pikinini bilong God Papa bilong Mipela, na ol brata na susa bilon Jisas na wanlain bilong Holi Spirit, wanpela samting bilong karim toktok namel long yumi wanwan na yumi olgeta. Em i toktok long yum insait lon leva na tingting bilong yumi. Yumi harim toktok bilong Em na mekim Bel Isi na bilong Bel Isi.



Dispela em Spirit bilong yumi, na Trut bilong mipela, na Laip bilong mipela. Mipela bai wok hat yet long Mekim Bel Isi i kamap. Mipela bai bildim gen Bogenvil. Bogenvil bai kamap gen na kamap gut na stap long olgeta taim aninit long lukaut bilong God.

#### HEPI ISTA I GO LONG YUPELA OLGETA YET

**THEODORE MIRIUNG**  
Premia



Ol poto bilong Skulbois soka resis long Pot Mosbi na Hara Kap resis bilong PMSA las wiken. *Ol poto: Ivan Bayagau na Sape Metta*





# RAGBI LIG

NIUS

## Morobe Kantri Lig rausim George Mack olsem presiden

VAIS President Roy Milenki kisim ples bilong George Mack nau olsem presiden bilong Morobe Kantri Lig bihain long Mack i no kamap long tripela miting olgeta em ol i makim long en.

Olsem na man husat i statim Morobe kantri Ragbi Lig Roy Milenki wantaim 6-pela klap ol i dropim em, long wanem emi no tingting long wok strong wantaim ol, na stap aninit long Mosbi Ragbi Lig na ARL Australia Ragbi Lig.

"Morobe lig i gat plenti samting long wokim em yet, bai mi annaunsim ol nupela official bilong mi long neks wik, na tu bikpela tenkiu i go long ol Lae Siti Authoriti na tu bai mipela developim Omili Oval, na attendens emi kamap gut na plenti man oli sapatim Morobe lig."

### ALWIN GORDON i raitim

Milenki i tok olsem long miting bilong ol tu, ol i makim dro bilong ol long pilai long sisen propa na fainel bilong ol bai kamap olsem wanem.

Fes namba 4 tims bai oli go long gran fainel, tupela fes na sekond tim bai pilai long fainel fes na sekond ples na third na bai pilai long fainel third na fourth ples.

Mr Milenki tok tu. "Morobe kantri ragbi lig tu ol i redi nau long Ista Kap Salens bilong ol. Mi tin plenti man meri bai oli witnessim dispela pilai we bai kamap long Omili, na dispela dem bilong nambawan event bilong Morobe kantri long histori long pilaim Ista Kap resis, mipela apil igo ol busines hands na gavana long sponsorim dispela pilai."



• Pot Mosbi ragbi lig eksen long PRL pilai graun las wiken. Poto Ivan Bayagau.

## Yalu Aliwaong winim Hawks long Morobe kantri lig

MOA long ova 500 man meri na pikinini bilong ples Yalu na Munum autsait long Law siti i bin witnessim Morobe kantri ragbi lig i bin pilai antap long ples Yalu.

Yalu Aliwaong wantaim 4 points bomim Hawks Yalu Aliwaong 4 na Hawk 2. Dispela emi wanpela strongpela pilai stret kamap long las raun bilong ol long pri-sison kompetisen.

Gran fainel bai kamap long dispela wiken long Omili ragbi field long Kambumu, Tim we igo pas long skoa em Ten Siti Rengers, orait Hawks bihainim ol, na Bungandi Shell Souths, Yalu Aliwaong na 10 mile Brothers.

Yalu Aliwaong i soim wanpela gutpela pilai stret na winim ol

Hawks 4-2 points, tasol ol Hawks oli kisim nambawan fenelti na namba 17 bilong Hawks Asi Buro kikim gol go insait na oli lid long points 2-nil.

Pilai igo strong moa yet tasol long 10 pela minits tasol na namba 10 bilong Yalu Andrew Emos skoarim wanpela trai long rait wings tasol referee wantaim lains men ino lukim dispela trai, tasol ol lain Yalu oli no wari oli kilim skin stret long pilai na nambawan resev bilong Yalu Jack Sagaling emi spin stret long rait winga gen na skorim trai na kika emi no kikim go insait, Ebal Joe na skoa sanap 4-2.

Hawks pilai olsem, Jona Hofa, Levi Tetepa, Asi Buro, Erick Malom, Gibson Kia na Loi

Wari. Oli pilai gutpela pilai stret, nau oli pasim ball na ron na gutpela tackal oli wokim.

Yalu Aliwaong oli soim tu gutpela football we kam long han bilong Dia Philemon (Prop) Andrew Nablu Kelly (captain) Wongs Matamat na Anga Mike long fulbek.

Wanpela naispela gem we ol brata long ples Yalu oli soim, wantaim ol Hawks, tasol liklik asua ibin kamap ol Hawks pilai paitim referee na referee stopim pilai long las 10-pela minits.

Long narapela pilai ibin stap namel long Wiru Riders na 10 mill Brother, Wiru Riders 14 dampim 10 mill Brothers 4, na (Ten Siti) Sulua Raiders 12 nekim Bugandi Shell Souths.

## Koiari lig kamap strong moa yet

KOIARI Ragbi Lig bihain long em i stap 5-pela krismas olgeta i wok long kamap strong moa yet nau.

Presiden bilong lig Ogi David i tok olsem, long bipo lig i nogat gutpela disiplin tumas tasol bihain long ol klab i tingting gut na mekim gutpela wok, lig i wok long kamap moa gutpela nau.

David i mekim dispela toktok bihain long ol pilai bilong las wiken i soim ol gutpela skoa tru we i no go antap. Dispela i soim gutpela difens na save bilong ol pilaia ol i putim long pilai graun.

Koiari lig i statim sisen propa bilong ol long las wiken tasol tupela tim insait long junia divisen i no kamap na ol narapela tim i win long fofit.

Long ol bikpela pilai bilong las wiken, Crystal Lakers i winim Ice Panthers we skoa i stap long 4-0 na Elcom Rauna long namba wan sisen bilong ol tasol i kisim tupela points

### KENNEDY EDENE i raitim

bihain long ol i fofitim ol Bluff Inn Knights long wanem ol i no bin putim wanpela sait i go insait long pilaim dispela geim.

Long ol A gret pilai, Vakasu Souths husat i wanpela strongpela tim bilong pri sisen i no pilai strong tumas na ol Hooks Tigers i winim ol long 2-0. Dispela 2-pela points i kamap long wanpela penelti kik tasol.

Sogeri Choice i kisim tupela kompetisen points isi tasol bihain long ol i fofitim primia tim bilong las yia Country Brothers husat i no bin putim wanpela tim long pilai long las wiken.

Na wanpela narapela tim gen Sogeri Owls i kisim tupela points tu taim ol i winim ol Doma United 2-0. Nupela tim Elcom Rauna i kisim tupela points isi tasol bihain long ol i fofitim tu ol Bluff Inn Knights.

## Mosbi Vipers lusim namba wan pilai bilong ol

OL Coca Cola Mosbi Vipers i kisim namba wan bikpela lus bilong ol long Kwinslen Stet Wide resis long han bilong ol Brisbane Brothers 40-20 long namba wan pilai bilong ol long las wik Sande.

Ol lain Mosbi ya husat i brukim rekot long putim tim bilong ol long namba wan taim tru long pilai long dispela resis i kamapim gutpela pilai tru long ai bilong ol sapota long Bray Park long Brisbane.

Tasol ol Vipers i no kamapim gutpela difens pilaia na tol taim ol i laik atek dispela i no bin

kamap gut tru. Long taim ol i holim bal tu, ol i no holim gut inap long longpela taim liklik long lukim olsem ol i kisim moa skoa.

Tasol kosa Steve Malum i tok olsem dispela yangpela sait bilong em i no bin gat planti pilaia husat i gat bikpela ekspiens long dispela bikpela pilai ovasis na yu ken lukim long risals bilong pilai.

"Yu ken lukim Stanley Haru husat i pilai gut tru na skorim tripela trai olgeta long wanem em bin pilai long dispela hap pinis long bipo." Malum i tok. "Yu lukim ol narapela

lain i no pilai gut na sapos ol i pilaim sampela moa pilai, i luk olsem ol bai kamap wanpela strongpela tim tru insait long dispela resis."

Long narapela sait tu, kosa bilong ol Brothers Don Gailer i tok olsem tim bilong em i no laik long pilaim ol Vipers gen. Em i tokaut tru olsem ol Vipers em ol wanpela strongpela tim tru na ol i ken winim sait bilong em. Em i tok olsem sapos ol Vipers i kisim sampela moa pilai, ol bai kamap wanpela strongpela tim tru long winim insait long dispela resis bilong Kwinslen ragbi Lig (QRL).

## Hisiu Knights winim Sentrel lig prisisen

HISIU Knights i winim pri sisen salens bilong Sentrel Lig long Mosbi tupela yia wantaim nau bihain long ol i daunim ol Koita Cowboys 22-10 long pri sisen fainel long Kone Tigers pilai graun.

Dispela win bilong ol i lukim ol i kisim K1000 namba wan prais mani wantaim pri sisen tropi.

Ol klabs ya husat i kisim prais mani em Hisiu, Koita Cowboys, Buria Reds na Saint Pauls. Tasol ol bai i no nap kisim yet prais mani inap long ol klab opisal i sekim gut registresen buk bilong ol pas-taim. Dispela sempion tim ya ol Hisiu i gat ol bikpela man na ol pilaia husat i save ron spit tru i kam bek strong tru long namba tu hap bilong pilai long winim ol Koita.

Taim pilai i stat long namba tu hap, ol Hisiu i go pas long 12-10 bihain long ol i salim winga Patrick

Aihi i go insait long skoarim wanpela trai bilong ol na ol i go pas long 16-10. Tasol ol Cowboys i kam bek strong tru wantaim ol pilaia bilong ol olsem Daure Ova na Nunu Vaguia long helpim ol beklain bilong ol long klostu tru winim ol Knights.

Tasol ol mangi Kairiku i sanap strong tru na i no mekim wanpela rum bilong ol Koita long skoa.


Ol Knights i pilai strong moa yet na riplsman pilaia Isaro Vari i bihainim wanpela liklik kik i go na skorim wanpela moa trai long bringim skoa bilong ol i go antap. Bihainim dispela, kika bilong ol Knights Allan Tamati i kikim wanpela penelti gol long bringim skoa bilong ol Hisiu i go antap olgeta long 22-10. Na bihainim dispela skoa, ol Knights i strongim gut tru difens bilong ol i go inap long pilai i pinis.

### TOKSAVE I KAM LONG EDITA:

Ol manmeri husat save laikim long redim ragbi lig nius

- putim was long 8 pes ragbi lig spesel bai kam klostu nau





*Kings of the street ... Anthony Mundine with fellow band member Damien Lane. INSET: Mundine the footballer does his thing with St George last year. Photos: JOHN ELLIOTT*

## Mundine mekim samting bilong ol yut

ANTHONY MUNDINE I WAKABAUT pinis long boksing ring i go antap long pilai ragbi lig na em i toktok olsem wanpela rap singa.

"Choc" Mundine, wanpela strongpela pilai bilong lig i laik mekim planti toktok i klia insait long rap grup bilong em Black Venom. "Mi les long stap olsem wanpela futbol pilai tasol," Mundine i tok. "Mi gat sans long bosken na pilai basketbal tasol bikpela tingting bilong mi em pilai lig...na mi amamas tru long dispela disisen. "Tasol sapos dispela ben i go stret long rot mipela i laikim, mipela i bilip em bai go, mi save olsem mi mekim planti gutpela samting long ol yangpela man na meri." Mundine i tok olsem stail bilong ol Black Venom bai i narakain long ol strongpela rap ben we i save pilai long ol strit bilong New York na Los Angeles long Amerika.

"Ben bilong mipela i olsem gutaim ben bilong danis," em i tok. "Singsing bilong ol Amerika em bai strong moa long wanem ol i stap long hatpela strit moa long mipela." "Mi save laikim planti musik, tasol mi no nap tingim mipela i singsing long plis i kilim

man...bilong wanem? "Ol singa bilong Amerika i singsing long laip em ol i save long em tasol noken ting olsem dispela i wankain. I tru mipela i gat wankain pasin tasol i no wankain tumas olsem long LA o Harlem."

Mundine i bin raun i go long Saut Sentrel Los Angeles long ples we ol blakman i bin pait long anem samting ol waitman i mekim long Rodney King tupela yia i go pinis na i tok olsem dispela em i wanpela samting i opim ai bilong em gut tru.

"Dispela ples em wanpela hatpela tru," Mundine i tok. "Olgeta manmeri i redi long go tasol...i gat planti pait bilong ol raskel;tasol dispela em mi no laikim. Mi laikim dispela gutpela sindaun bilong Sidni.

Dispela olupela skulboi sta i redi tasol long pilai long tim bilong em St George husat em bin lusim na joinim Supa Lig. Nau Supa lig i no nap stat na Mundine i kam bek gen pinis wantaim St George. Mundine husat i tokaut olsem em bin nogat wanpela tingting long kamap singa tasol ol lain husat i sutim bel bilong em tru em olupela skulmait bilong

em Daniel Lane na strongpela mangi bilong pilai gita Leroy Cummins. "Tupela wantaim i gutpela tru na stap on tasol," Mundine i tok. "Damien em dispela man husat i kisim dispela ytingting na tu em i laikim tru na luki; i nau mipela i go antap. "Dispela i nap kam op na kamap bikpela samting tru. Mi laik kamap olsem wanpela gutpela man na i no bilong ol mangi Aborijinias tasol.

"Bikpela tingting bilong mipela em long pilai long musik long bus longol Aborijinias misen...long kisim dispela samting i go long pipel em planti taim ol i no save lukim.

Kamapim gutpela samting em bikpela samting tru i stap arere long leva bilong Mundine. Olsem wanpela mangi, papa bilong em i save draivim em i go long Kings Cross we em bai soim em long ol rabis pasin i save kamap. Long dispela samting tasol long lukim ol yangpela i kisim drag na mekim ol kainkain rabis pasin i givim em strongpela tingting long stap gut wantaim laip bilong em. Mundine nau yet i no save drink, no save kisim drag na tu, i no save smok. "Laip i sot tru na bilong wanem bai

yu bagarapim wantaim ol dispela rabis samting," Em i tok.

Em tu i save olsem futbol i no longpela aninit long dispela pait i stap nau namel long Supa Lig na ARL na tu em i gat wari long dispela. St George i kamapim wanpela kot salens bihain long Mundine i lusim ARL kontrak bilong em na go wantaim Supa Lig. Em i sain wantaim ARL na long wankain taim tu em i sain wantaim Supa Lig. Em bin gat sampela toktok wantaim ol Bulldogs, Broncos na Cronulla long pilai wantaim ol tasol long op sisen em i tren long em yet i stap. "Wanpela kot oda em ol St George i kisim i soim olsem mi no nap tren wantaim wanpela tim," em i tok. Tasol mi no kamap olsem les man, mi tren hat tru long mi yet.

"Mi laik dispela sisen em bai wanpela gutpela sisen bilong mi na wanpela we i ken go insait na makim Australia. Sapos olgeta samting i bihainim plen gut tru, sisen 1996 em bai taim bilong yangpela Anthony long singsing gut tru.



## LFA makim fainel 22 man bilong MSF Kap

LAE Futbol Soka Asosiesen (LFA) i makim fainel 22 man skwat long Mande wei ol bai pilai long Morobe Soka Federesen Kap (MSF) tonomen long Finschafen long Easter wiken. Dispela tim bilong LFA i nau i stap aninit long nupela kosa Max Foster, foma international goal kipa bilong PNG husat i kisim peles bilong Luowig Peka husat i bungim hevi long sik na resign.

Foster i tok "dispela em namba wan taim bilong em long kisim dispela top pos bilong LFA kisim senior men squat igo long tonamen so mipela i no nap long daunim strong bilong arapela tims i kam, bai mipela kisim ol olsem ol i kam. Em i tok long line up bilong em i olsem tasol ol i go long Port Mosbi national taitels tasol i gat sampela junior tu na istap insait tu long dispela squad.

Ol dispela fainel 22 man squat ol i makim em long performance insait long field na tu outsait.

Mista Peka i tok dispela em wanpela bikpela tonomen olgeta i kamap long kantri wei mo long 20 tims bai pilai. Em i tok i gat askim kam long sampela tims outsait long provins tasol ol i no bin acepim olsem em long Morobe provins tasol.

Willis Pty Ltd yet i sponsorim dispela tonamen wanta.m K2000,00' na trophy em wanpela ples man long Malasiga long hap bilong Finsch i carvim dispela kap wei i kos olsem K500.00. Dispela em namba tu yia long dispela Morobe soka federesen kap. Namba wan i bin kamap long Lae las yia wei Lahi i autim dispela taitel.

Grand fainel bai kamap laip long redio Morobe long Mande wei olgeta pipel bilong Morobe i ken harim long redio. Long dispela taim yet ol meri tu bai brukim bun long Madang long national womens taitel wei las yia 95 ol i sensim i kam long Easter wiken long dispela yia.



• St Peter Chanel soka tim husat i save pilai long skul bois soka resis long Mosbi.

# 9-pela senta bai kamap long PNGFA Wimens Sempionsip

ISTA wiken em wanpela bikpela taim tru bilong tupela spot insait long kantri, sofbal na soka taim tupela wantaim i kamap long bikpela sempionsip bilong tupela.

Long Madang em bai Papua Niugini Futbol Asosiesen i holim bikpela Wimens Sempionsip bilong ol we 9-pela tim olgeta bai kamap long pilai.

Ol dispela 9-pela tim husat bai kamap long Nesanel Wimens Sempionsip em Mosbi Soka Asosiesen, Madang Soka Asosiesen, NCD Pablik Sevans Soka Asosiesen, Fae Futbol Asosiesen, Lahi Soka Asosiesen, Karkar Soka Asosiesen, Enga Soka Asosiesen, Hagen Soka Asosiesen na Vanimo Soka Asosiesen.

### RODNEY KAMUS i raitim

Wanpela senta we i mekim ai bilong planti ol senta i op em Vanimo husat i soim bikpela sapot bilong ol tru long dispela spot long salim wanpela tim bilong ol i kam long dispela resis.

Ol biknem senta olsem Mosbi, Lae, Lahi na NCD Pablik Sevans bai strong tru long winim dispela bikpela taitel bilong ol meri.

Presiden bilong PNGFA Peter Mommers i bin tokaut pinis long bipo olsem dispela sempionsip bilong ol meri em bai taim bilong makim wanpela nesenel skwat bilong ol meri long go pilai

long Tonga long namel bilong dispela yia 1996.

Olsem na dispela i mekim na planti senta tru i laik pilai long dispela sempionsip.

Presiden bilong ol meri Pablik Sevans long Mosbi, Francis Kasau i long tok gut-bai long tim bilong em i go long Madang i tokim ol pilai bilong em olsem dispela em i wanpela bikpela tonamen na em bai amamas tru long lukim tupela o tripela pilaia bilong em i stap long PNG Wimens skwat.

Tonamen ya bai stat long Fraide na pinis long Ista Mande.

### KOIARI RUGBY LEAGUE DRAWS

Round One Game Two  
Iarowari Oval

Sunday April 7, 1996.

#### B Grade

Time	Fixtures	Referee
09.00	Knights vs Sharks	Vincent
09.55	Tigers vs Owls	Henry
10.10	Choice vs Panthers	Andrew
10.45	Rouna vs United	Vincent
11.20	Brothers vs Lakers	Henry

Bye: Souths

#### A Grade

12.00	Knights vs Sharks	Andrew
12.45	Tigers vs Owls	Vincent
01.30	Choices vs Panthers	Henry
02.15	Rouna vs Doma	Andrew
03.00	Brothers vs Lakers	Vincent

Bye: Souths

### GABONE VOLLEYBALL ASSOCIATION POINTS LADDER

WOMEN TEAMS	GP	W	F	L	PTS
B/Raiders	5	4	-	1	8
Spiders	5	4	-	1	8
Seli Rocks	5	1	-	4	2
Pune Roos	5	1	-	4	2

MEN	GP	W	F	L	PTS
Spiders	5	4	-	1	8
Bi Raiders	5	3	-	2	6
Pune Roos	5	2	-	3	4
Seli Rocks	5	2	-	3	4

### DRAW EASTER MONDAY

TEAM	VS	REF
WOMEN		
Seli Rocks	vs B/Raiders	Paul Aoae
Spiders	vs Pune Roos	Taua Magela
Men		
Seli Rocks	vs B/Raiders	Stan Poko
Spiders	vs Pune Roos	Paul Maina

## Finschafen redi long holim MSF tonamen

NAMBA tu Morobe Soka Federesen kap (MSF) bai kamap long Finschafen long dispela Easter wiken. Ripot i kam long opisal long Finsch long tonamen i tok ol komyuniti wantaim ol bisnis haus i wok wantaim long redim ol samting long dispela tonamen. Presiden bilong MSF John Peka i tok, em i namba wan taim bilong Finschafen long holim dispela kain tonomen wei ol komyuniti i wok wantaim long redim ples bilong pilai na silip bilong ol pilaia.

Em i tok igat tripela ples bilong pilai, tupela long Dregafen H/S na wanpela em long Gagiou stasion yet Ripot i kam long Finschafen i tok olgeta samting go het olsem long plan. Dispela tonamen i pulim tupela ten (24) tims long Morobe provins husat bai brukim bun long dispela kap wei ol bai pilai long fopela pools. (Simpela tim long wanwan pool).

### FRANCO NEBAS i raitim

Defending champion Lahi, KDS, LFA na Gaifar husat i memba bilong PNGFA tu bai traim bun wantaim ol arapela tims long ol fainel squad i stap olsem, David Peter, Jack Jonathan, Charlie Beguma, Kule Matu (captain), Dennise Zengoe, Gidix Nasa (vice captain), Masi Ngaiya, Samson Mera, Paulo Issac, Issa Mathew, Bob Tara, Robin Jojo, Yakam Kipu, Maky Bob, Richard Kaizam, Zemo David, Samson Steven, Duta Yema, Michael Yangum, William Akaipe, Murawa Gogowa na Lopat Bokifa.

Head kosa Max Foster, namba tu em Chris Yanga na tim menesa em Joe Exton. Kosa Foster i tok ol bois bilong em i redi tasol long dispela resis na ol i trening hat wei i nogat planti pilaia bilong ol i kisim bagarap long ol.

## Ista Salens Kap bai kukim Lae lig

OL MAN na meri na pikinini bai paspas long Lae ragbi lig oval gen long Ista wiken long lukim stail bilong BHP Stil Ista Klub sempionsip em bai stat tumoro (Fraide)

BHP Stil Building prodaks long Lae i sponsaim dispela kompetisen inap long nain 9-pela yia nau.

Kampani i putim olsem K6200-00 prais moni na ol 8-pela Lae klabs Bratas, Spaidas, Difens, Royals, Tarangau, Morobe Taigas, Pentas na Margani na Ramu Hawks na Madang Tarangau bai brukim bin wantaim masol long winim dispela prais moni.

Lae lig i salim i invetesis i go long Vanimo, Billa, Kimbe na Buka long salim sempion klub bilong ol long salensim ol Lae klub tasol ol i no inap long mekim.

Problem bilong painim moni na sponsa long dispela senta i hat tumas na tu ol nau i redim tim bilong ol long pilai long inta-siti na Kambris cup salens, Lig Secretary, Zeph Aigel, i tok Aste. Em i tok olsem bipo, dispela tonamen i bilong sempiontim nau bai soim tru stail na strong bilong ol pilaia taim pinis bilong fopela dei hat futbol long Monde.

Bratas tim bilong Lae i winim K2500 namab wan prais moni las yia tasol ol bai pilai ekstra hat long winim gem. Ramu Hawks na Madang Tarangau i kamap wantaim na luk tim na bai givim hat pen long Lae tim. Madang Tarangau tim i gat sampela bik nem bilong Globtrotters i stap na ol bai traim long pulim bikpela wari long Lae sapos ol was long ol mari bilong strong na yusim gem pen bilong olsem kosa bilong ol i skulim ol.

Tripela Lae tim, Panthers, Spaidas, na Morobe Taigas em bai go long semi fainel sapos ol stap long fom bilong ol. Nogat bai Royals Madang Tarangau bai bagarapim Sindaun bilong ol long dispela wiken.

## Lae junia lig pri sisen fainel long Ista Mande

LAE Pepsi Junia prisisen ragbi lig gren fainel bai kamap long Ista Mande neks wik. Junia fainel namel long Fairdeal Magani na LB Spaidas bai keten resa gem bilong fainels bilong BHP Stil Ista Cup salens sempionships. Bihain long dispela tim bai ol Lae lig spetatas bai lukim tupela fainel gems, tim na fo ples


na tu na wan posisen bilong dispela Ista salens.

Magani na Spaidas bin winim ol gems bilong ol long prisisen nastap wan na tu long leda na bai ol traim bun long winim K250-00 prais moni junia ofisel i putim op long prisisen kompetisen.

Lukluk long save na pilai bilong tuepla tim ya i sem tasol Spaidas i gat spit na i ken pilai ful 80 mint gem.

Ol bai lukluk long ful bek Kevin Baira, Raymond Topi (insait-senta) na faviet Robin Kinsim long mekim rot isis long skorim tries.





• Dairekta bilong lens taitel komisen, Josepha Kanawi i givim tropi bilong Heida kap long Christine, kepten bilong Wanzesi. Wanzesi nekim ol meri Sunam 1-0 long Mosbi soka pri-sisen.

## Minj redi long pilai egensim Banz

MINJ Ragbi Futbol Lig i wok long wok hat tru nau long redim ol pilai graun bilong ol bipo long bikpela pilai bilong Cambridge Kap i kamap long sampela wik taim. Minj bai pilai wantaim poroman bilong em Banz long wanpela pilai we planti manmeri tru bai lukim. Minj na Banz i bin pilai pinis long bipo tasol dispela em bai wanpela bikpela pilai tru bilong dispela sisen. Insait long las wik i go pinis, tupela senta wantaim i wok long ronim ol klab pilai bilong tupela na ol pilai i wok long redi gut tru long dispela bikpela pilai bilong April 14.

Ol sait bilogn Minj i wok long tren hat tru long las tupela wik na bai i no nap kisim Banz isi tasol. Banz long narapela sait i gat stail long pilai strongpela futbol na bai pilai strong tru egensim ol Minj. Wanpela sinia pilai William Raim i tokim Wantok namel long wik olsem tupela sait wantaim ya Minj na Banz i gat ol gutpela pilaia tru long tim bilong ol tasol husat lain i no mekim planti asua long taim bilong pilai bai win. Raim i tok olsem ol Minj sait em ol wanpela strongpela sait tru long wanem ol i save mekim ol tim i wari na ol mangi long Banz i mas redi gut tru long dispela bikpela pilai.

William Raim em wanpela fainel yia sumatin long Holi Trinita Tisa Koles na i save pilai olsem faiv-eit long lokel klab bilong em Brothers long Baz. Planti man bai putim was long em taim em i pilai. Long ol lokel kompetisen long las wiken, West i winim Brothers 20-16, Tigers i winim United 16-12 na skoa bilong ol Raiders na East i no kamap long taim wantok i ripot. Long narapela stori, Match Committee siaman Kevin Yuants i tok olsem ol bai sotim taim bilong pilai long wanem ol pilaia i save kamap leit long pilai graun. Yuants i tok olsem long dispela wiken sapos wanem tim i kam leit olsem 10 minits, ol bai fofitim pilai i go long narapela tim.

### PORT MORESBY RUGBY FOOTBALL LEAGUE Patrons Cup Easter Sevens Challenge

<b>Pool I</b>	<b>Pool II</b>
1. Post Puma I	5. Defence II
2. Paga II	6. Wests
3. Royals II	7. Souths
4. Magani	8. Brothers
<b>Pool III</b>	<b>Pool IV</b>
9. Paga I	12. Post Puma II
10. Hawks	14. Defence I
11. Buria Reds	15. Royals I
12. Kone Tigers	16. Tarangau
P1 11.50 Paga II vs Magani	
P2 12.10 West vs Brothers	
P3 12.30 Hawks vs Kone Tigers	
P4 12.50 Defence I vs Tarangau	
1.10 Game A Winner Pool I vs Winner Pool II	
1.30 Game B Winner Pool III vs Winner Pool IV	
1.50 Game C Looser Game A vs Looser Game B	
2.10 Game D Winner Game A vs Winner Game B	
.. Presentation Of Trophy And Prizes	
3.00 Pom Coca Cola Vipers vs Sunshine Coast	

### Patrons Cup Easter Sevens

Saturday April 6, 1996.  
Gates Open 9.00am

P1 10.30 Post Puma I vs Paga II
P2 10.50 Defence II vs Wests
P3 11.10 Paga vs Hawks
P4 11.30 Post Puma II vs Defence I
P1 11.50 Royals II vs Magani
P2 12.10 Souths vs Brothers
P1 12.30 Buria Reds vs Kone Tigers
P1 12.50 Royals I vs Tarangau
P1 1.10 Post Puma I vs Magani
P2 1.30 Defence II vs Brothers
P3 1.50 Paga I vs Kone Tigers
P4 2.10 Post Puma II vs Tarangau
P1 2.30 Paga II vs Royals II
P2 2.50 Wests vs Souths
P3 3.10 Hawks vs Buria Reds
P4 3.30 Defence vs Royals I

### Sunday April 7, 1996.

Gates open - 9.30am

P1 10.30 Post Puma I vs Royals II
P2 10.50 Defence II vs Souths
P3 11.10 Paga I vs Buria Reds
P4 11.30 Post Puma II vs Royals I
P1 11.50 Paga II vs Magani
P2 12.10 West vs Brothers
P3 12.30 Hawks vs Kone Tigers
P4 12.30 Defence I vs Tarangau

### PNG FOOTBALL (SOCCER) ASSOCIATION CALENDAR 1996

DATE	EVENT
27 Jan	PNGFA Annual General Meeting Goroka
28 March	Youth Coach and Referees Course Auckland NZ
23 March	OFC Congress Auckland NZ
5-8 April	PNGFA CUP (Women) Madang
June	
	National Squad trials selection Goroka, lae Madang
	• National women club championship (Queen's Birthday) Wewak, Pom, Kimbe
July	• 1st National squad camp Lae (NWCC)
August	• 2nd National squad camp Goroka
16-25 Sept	• Melanesian Cup and World Cup Qualification Goroka
November	• National women club Champions Lae
	• Junior tournament (after S Exam) Lae
1997 January	OFC- Under 20
6th April 1997	Christchurch NZ Tahiti

# Morobe Tigers kisim Lae prisisen taitel

KUMBIM Traking Morobe Taigas haf bek, Morea Mona, skorim fil gol na trai bilong em i helpim tim bilong em long winim Lae ragbi lig pri sisen fainels las Sande.

Morobe Taigas nekim LB Spaiders 17-12 na kisim K500-00 prais moni Lae Ragbi Lig yet sapatim.

Lae lig ronim pri sisen inap long seven-pela wik olgeta we ol 8-pela tim insait long kompetisen salens long winim dispela moni. Lae lig President, Russ Kaupa, i tokim ol pilaia na sapatas olsem em ino inap long givim bikpela prais moni bilong wanem lig i no painim wanpela kampani long sponsaim dispela kompetisen yet.

Em tok olsem moni lig kisim long geit fi tasol i go bek long prais moni na hap i go long stretim klab haus na lig graun.

### ZEPH AIGAL i raitim

BOC Pantas ta winim K300 prais moni taim ol wilwilim Fairdel Magani 30-20 na Difens wantaim Spaiders holim K150-00 long kam namba tu ples.

Taigas winim dispela gen insait long las 10 minit bilong gem pinis taim tupela wantaim sko i stap 12-12.

Kapten na fulbek, Tebby Beko na fowad Allan Mambo i go pas long atek na difens wok we mekim rot isi long bek lain long skoim points.

Four minit behind long pilai stat long seken hal, kapten na senta Billy Kinsim kikim penalti gol na Spaidas led long tu points.

Lok forward Paul John pilai hat tru long Spaidas tasol nogat sapatot i kam kwik long

arepela pilaias long pininsim mov na sko.

John putim Spaidars i go pas 12-9 behind long fil gol bilong Mora wantaim trai tasol Mora kisim bal long Membo na salim wing Paul Kasi i go insait long mak bilong Spaidas.

Sko em 13-12 na Tigers i go pas na long wanpela mov bilong bek lain Mona ken paulim difens bilong Spiders na isi tasol givim bal long forward Buka Elana long go namel long hul kamap long difens bilong Spaidas na sko na winim 17-12 gem.

Yangpela Royals tim klostu bagarapim tim sprit bilong Defence taim favet na kapten. Abraham Henau ful bek Augustine Justin na prop fowad Alfred Morobang soim stail na spid bilong ol. Royals

lus logn 20-21 long ol sodia boi.

Henau-Justine Konbinesen planti taim paulim bek lain bilong Difence kamapim tripela isi trai tasol Difence luk save long dispela kwik na sensim gen plen long seksin haf givim kaikai.

Difence kapten forwad Simson Kundi, Francis Nema na faviyet Samson Tamien setim plen gut na levelim sko 20-20 taim klo i gat wan minit i stap.

Tamion tingim dispela na long las takol, 40 mitas long we hang gol pos kikim fil gol na Difence win.

Long arepela pilai, Tarangau i strong tumas long Bratas 44-30 na Pantas pulaimin turangu Magani 30-20 na givim bek taitel "wuden spunas" bilong Lae lig.



# Kunsi kisim top spots awot

BOKSA Henry Kunsi i gat tupela samting long amamas long las wik Sarere nait. Wanpela em Kunsi i winim taitel bilong em long Osenia Boksing Sempionsip long Australia na narapela em Kunsi i kisim top awot olsem spotsman bilong yia 1995 long SP Sports Awot.

Kunsi husat i bin stap long Sidni long pait long dispela taitel bilogn em long Osenia rijin i no bin stap long kisim awot bilogn em olsem Spotsmen bilong Yia tasol meri bilong em Pereptua i bin stap long kisim awot bilong Kunsi.

### RODNEY KAMUS i raitim


Kunsi i kisim dispela top awot pas long long sprinta Ivan Warkit na weilifta Peter Kilapa.

Mangi Not Solomons ya i kisim dispela awot bihain long em bin stap long wanpela gutpela yia tru na holim yet nesenen na osenia taitel bilong em inap long namba 7 taim olgeta.

Long sait bilong ol meri, meri husat i save kalap long Long Jump Angela Way i kisim top awot tu olsem Spots Meri bilong Yia.



# WANTOK SPOT



# Paiyo joinim Raiders

*Kumul huka tok Tim Sheens i kisim em pinis long pilai wantaim ol*

KEPTEN bilong Papua Niugini Kumul Elias Paiyo bai joinim Canberra Raiders long dispela sisen.

Paiyo i bin joinim Adelaide Rams aninit long Supa Lig tasol nau kot i stapim Supa Lig na ol pilaia i painim tim. Planti ol pilaia long tupela nupela klap, Adelaide Ram na Mariner Hunter i joinim bek olpela klap bilong ol long ARL.

Paiyo i tokim *Wantok* olsem kosa bilong Canberra Raiders Tim Sheen i kisim em na em bai pilai pastaim long wanpela liklik klap na bihain bai go antap A o riserv gret.

Arapela tupela Papua Niugini Kumul i stap pinis long Canberra Raiders em David Westley na Bruce Mamando. Mamando i joinim Adelaide Rams tu tasol kot i rausim Supa Lig na Mamando i go bek long Raiders.

Sheen em wanpela strong sapota bilong Elias Paiyo taim em i save pilai long Kumul. Em i amamas tru long lukim Paiyo i joinim klap bilong em.

## HENRY MORABANG i raitim

Huka bilong Kumul i tok menesa bilong em i winim tupela arapela kontrak long pilai long Ingran tasol em i les. Em i tok Ingran i longwe tumas long Papua Niugini ya.

Paiyo i tok em i amamas tru bikos i gat tupela arapela wantok i stap pinis we em bai kisim strong long ol ya.

Jeneral menesa bilong PNGRFL, Martin Adamson i amamas tru long harim olsem Elias Paiyo i joinim Canberra Raiders.

Em i tok amamas long kosa Tim Sheen na ol lain bilong Canberra Raiders long kisim huka bilong Kumul.

Insait long ol arapela ripot, tripela Papua Niugini pilaia long Ingran John Okul, Stanley Gene na Marcus Bai i wok long pilai gut long klap bilong ol.

Okul na Gene i pilai long Hull Kingston Rovers, wanpela seken divisen klap na Marcus i brukim bun long Hull - fes divisen klap.



□ Elias Paiyo i sanap long namel wantaim ol sapota bilong em long taim em i kam bek wantaim ol Kumuls long Wol Kap tonamen long Ingran long las yia.

# PMSA, Lahi na Lae em ol feveret bilong win

## RODNEY KAMUS i raitim

TRIPLELA biknem soka senta insait long kantri, Mosbi, Lahi na Lae bai pait strong tru long dispela lta wiken long kisim taitel bilong ol meri long Papua Niugini Futbol Asosiesen (PNGFA) Wimens Sempionsip long Madang.

Dispela tripela biknem senta ya em ol i gat ol planti pilaia bilong ol husat i gat intanesenel ekspiriens na ol bai traim hat tru long kisim dispela taitel.

Wanpela nupela senta husat i mekim planti i kalap nogut em Vanimo husat i kam insait bihain tru long resis long dispela tonamen. Vanimo ol lain bilogn laspels bai traim hat tru long mekim mak bilong ol long soka bilong ol meri long dispela wiken.

Long wankain taim tu, tupela senta husat i bin tokaut pastaim olsem ol bai kamap long dispela resis, Wau na Gaifarwap i no nap kamap long dispela tonamen bihain long sampela kain las minit disisen.

Ol narapela senta husat bai kamap tu em Hagen, Wabag, NCD Pablik Sevans, na Karkar.

Narapela tim Nesenel Kapitel Distrik Pablik Sevans tu em wanpela strongpela tim husat bai resis insait long dispela tonamen.

Ol Pablik Sevans husat i kamap pinis long Madang na i wok long redi gut long dispela pilai i laik tru long winim dispela tonamen na tu lukim olsem tupela ol tripela insait long tim bilong ol i stap insait long PNG skwat.

## PNGFA WIMEN'S SOKA SEMPIONSIP, MADANG, EPRIL 5-8, 1996

PARTICIPATING TEAMS:						
Port Moresby Lae Karkar			Madang Lahi Mt Hagen			NCD-PSSA Enga Vanimo
<b>Friday April 5, Day 1 Matches:</b>						
Game:	Team:	vs	Team:	Pool:	Time:	Ground:
1.	LFA	vs	Karkar	A	11:00-12:30pm	1
2.	Lahi	vs	NCD-PSSA	B	11:00-12:30pm	2
3.	LFA	vs	LFA	A	1:30pm-3:00pm	2
4.	Madang	vs	Mt Hagen	B	1:30pm-3:00pm	1
5.	PMSA	vs	Vanimo	A	3:20pm-5:00pm	1
<b>Saturday April 6, Day 2 Matches:</b>						
6.	Karkar	vs	PMSA	A	10:00-11:30am	1
7.	Madang	vs	NCD-PSSA	B	10:00-11:30am	2
8.	PMSA	vs	Enga	A	1:30pm-3:00pm	1
9.	Mt Hagen	vs	Lahi	B	1:30pm-3:00pm	1
10.	Enga	vs	Vanimo	A	3:20pm-5:00pm	1
<b>Sunday April 7, Day 3 Matches:</b>						
11.	LFA	vs	Vanimo	A	10:00am-11:30am	2
12.	Enga	vs	Karkar	A	10:00am-11:30am	1
13.	NCD-PSSA	vs	Mt Hagen	B	12:30pm-2:00pm	2
14.	Madang	vs	Lahi	B	12:30pm-2:00pm	1
15.	PMSA	vs	LFA	A	2:20pm-4:00pm	2
16.	Karkar	vs	Vanimo	A	2:20pm-4:00pm	1
<b>Sunday April 7, Day 3 Matches:</b>						
17.	Winner Pool A vs Runner-up Pool B.				10:00am.	
18.	Winner Pool B vs Runner-up Pool A.				10:00am.	
19.	Runner-up Game 17 vs Runner-up Game 18.				1:30pm.	
20.	Winner Game 17 vs Winner Game 18				3:00pm	

Hagen na Wabag em tupela senta tasol i makim hailens rijin na ol bai traim hat tu long kirapim das long dispela tonamen bilong ol meri.

Long dispela tonamen tu, PNGFA i

bin tokaut pinis olsem ol bai makim wanpela skwat bilong ol meri long makim PNG i go pilai logn Polinesia Kap long namel bilong dispela yia.

Dispela pilai bilong Polinesia Kap

em i wanpela invetesin tasol na ol meri PNG bai gat sans long kisim sampela ekspiriens.

Tonamen ya bai stat long Fraide na pinis logn Mande.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.